



TUSI FAITAU ASO

2025

IANUARI - IUNI

**Ekalesia Faapotopotoga Kerisiano
i Amerika Samoa**



IANUARI – IUNI 2025

TUSI FAITAU ASO

EKALESIA FAAPOTOPOTOGA KERISIANO I AMERIKA SAMOA

1 Kanana Fou St, Pusa Meli 1537, Pago Pago, Amerika Samoa 96799

+(684) 699-9810 <https://efkasonline.org>

Faaliliuina e le Ofisa o le Lamepa, Ofisa Tutotonu EFKAS:

Etele Falealii AKF, Faatonu (Ianuari—Mati 1; Aperila 20—26; Iuni 15—30) **Charis**

Sao AKF (Mati 2—Aperila 5)

Soosoo Tuiulemotu FS (Aperila 6—19)

Tamilo Palepua AKF (Aperila 27—Iuni 14)

Maliliega mo lenei Fa'aliliuga

O lenei Tusi Faitau Aso ua mafai ona lolomia ona o se maliliega i le va o le Ekalesia Faapopototoga Kerisiano i Amerika Samoa (EFKAS) ma le *International Bible Reading Association (IBRA)*, ua aumaia ai le faatagaga e faaliliu ai lana tusitusiga Peretania, *"Fresh From The Word: A Bible for a Change 2025,"* i le gagana Samoa. Talu ai fa'afitauli masani i le fa'aliliuina o gagana, e i ai vaega o lenei fa'aliliuga Samoa e le o mafai ona maua le uiga atoatoa o manatu ma mafauauga o loo aumaia i le gagana Peretania. Peita'i, o le agaga maua i le Ofisa Tutotonu, fa'apea le Ofisa o le Lamepa sa feagai ma lenei fa'aliliuga, ia mafai ona maua e tagata Samoa se punā'oa fa'aleagaga e utuvai faatasi ai ma tagata Kerisiano i le lalolagi, e fai ma ta'iala o le soifua tapua'i ma le ola su'esu'e i le Afioga Paia a le Atua i aso faisoo.

UPU TOMUA

I le suafa manumalo o Iesu Keriso, **Le Ao o le Ekalesia**, matou te tuuina atu le lima o le faatalofa, ma faafeiloa'i atu i le pa'ia ma le mamalu o le **EFKAS** – afio lau Afioa i le Ta'ita'ifono ma le mamalu o le Laulauafono o le Fonotele; afio le Komiti Au Toeaina, faapea le mamalu o Komiti Tumau uma ma Mafutaga Lagolago; le paia maualuga o nofo a Matāgaluega, mamalu o Pulega, seia oo i 'aulotu ma totino uma o le tatou EFKAS – **Malo le folau! Malo le malaga manuia i lenei Tausaga Fou!**

E ui na afatia lenā faigamalaga i peau lagavale ma galu fatitō, ma ua afemoe le faigamalaga o nisi e pele i loto ma agaga; a e lē faaitiitia ai le viiga ma le faamanu i le Matai Sili, Le Leoleo Mamoe Lelei e, ona o Lana tausiga ma le malu puipua o le soifua faatuatua o lana Ekalesia. **Faafetai le Atua ua aulia lenei Tausaga Fou 2025!**

A o tapenapena le sā folau auā le folauga umi o lenei tausaga fou, o le upu moni, “E lē faigofie le pale ma le folau”... e matuā faigata lava, talu ai e taupale i le matagi ma le au, aemaise pe ā faapea ua matagia le vaa i le vasa. E tumu i le popole ma le fefe, ona taumate lea pe tūlau'elele pe gotouga i le sami ulaula. A o se auaunaga a le *Tusi Faitau Aso 2025*, e taupale lo ta faamoemoe auā le **Upu Fou a le Alii**, e faatupuina ai le soifua faatuatua ma le faalagolago i le Atua.

Ua vaevaeina le Tusi Faitau Aso 2025 i vaega e lua: *Vaega Muamua: Ianuari – Iuni 2025; Vaega Lua: Iulai–Tesea 2025*. O tusitusiga ua lolomia nei, o loo faaaatuina ma le agaga e faatupuina le malamalama ma le soifua faatuatua o tagata Kerisiano, e tusa ma aso fai soo. E tomua matā'upu su'esu'e o lenei tausaga i **FOLAFOLAGA MA FAAI'UGA** na tatou faia i lenā tausaga, aemaise o se fuata'iga mo le tausaga fou ua amatalia. O nisi matā'upu o le a su'esu'e loloto ai la tatou faitauga mai le tusi o **KOLOSE**, ma **LUKA**, ma **IOSUA**, aemaise o upu **FAAMAFANAFANAGA MA LE FAAMOEMOE mai le ISAIA 40-55**. O loo i ai foi i lenei tapenaga le tāua o le **SAVAVALI MA IESU: OLAGA KERISIANO**, faapea le toetepa i le vaitaimi o Iesu a o **OLA FAATASI MA TAGATA ROMA**. O nei tapenaga ma tusitusiga e taula'i uma i le mafutaga vāvālalata ma le Atua Tolutasi Paia, auā o le faavae lea o le soifua faatuatua faaKerisiano.

O le faamoemoe maualuga, ia avea lenei tusi e fai ma ta'iala o sauniga lotu a le EFKAS i aso ta'itasi o le vaiaso; faapea foi sauniga lotu a lo tatou Atunuu, i soo se tasi e fia faaaogāina lenei tusi. O lo matou tatalo, ia faateleina ma faatumuina atu e le Alii lona Agaga, aemaise o le togiola ua faia e le Tamā e ala mai le Alo pele to'atasi, a o feagai ai ma lau tapua'iga.

Ia Manuia le Folauga! Manuia le EFKAS!


Etele T. Falealii AK
Fa'atonu Lamepa

O FOLAFOLAGA MA FAAI'UGA – PROMISES AND RESOLUTION

1. O Folafolaga Leaga (*Bad Promises*)

Aso Lulu – Ianuari 1: “O Fuafuaga, Talotaloga ma Folafolaga”

Tusi Faitau – 1 Samuelu 14:24-30 (*Plans, prayers and promises*)

Matua – f. 30: “*Ai lava ana matuā aai le nuu i lenei aso i mea a le itu tau na latou maua, poo penei ua faatele lava se fasi o Filisitia.*”

A o tatou aga mālīe atu i le amatalia o lenei tausaga fou, se'i tatou toe tepa ane i le tausaga ua mavae, ma toe tō manātu pe na tatou faia ea se faai'uga, se folafolaga, poo se ta'utinoga, na mulimuli ane toe nofo salāmō i ai. Se taimi na tatou tali atu ai i le “ioe” i se tagata, peita'i ua e lē faataunuuina la tatou folafolaga. O le tusi faitau o lenei aso, fai mai ua faia e Saulo se faai'uga lē talafeagai, ua faatigaina ina ai le nuu o Isaraelu. Ua faatautō e Saulo le nuu, ia 'aia lava ne'i a'ai seia faaumatia ona fili uma. Peita'i, ua lē usita'i Ionatana i le faatonuga a lona tamā o Saulo. Ua loto tele Ionatana e tautala atu i le mea moni, e pei ona iai upu o le tatou matou. O se lu'i fo'i lea mo i tatou i lenei tausaga fou. Tautala i le mea moni pe afai ua i ai ni faaletonu, a e aua le tafitafia i lalo o le fala.

Tatalo: Le Atua e, alofa ma se'i e fesoasoani ina ia matou filifili ma le potō i lenei tausaga fou. **Amene!**

Amata Fuifui Lotu EFKAS – Ianuari 2—4.

Aso Tofi – Ianuari 2: “Ua Faitaulia, Fuatia, ma Vaevaeina”

Tusi Faitau – Tanielu 5:13-30 (*Numbered, weighed and divided*)

Matua – ff. 25-28: “*O lenei le tusi na tusia, MENE, MENE, TEKELE, UPERESA. O le uiga lenei o le upu, MENE, Ua faitaulia e le Atua lou malo, ua faaiuina. TEKELE, Ua fuatia oe i le fuafaatautau, a ua iloa oe ua mamasagia. PERESA, Ua vaevaeina lou malo, ua foaiina atu ia Metai ma Peresia.*”

O le tusi faitau o le asō ua filifili ai le tala ia Tanielu—se tagata na faamaoni i ala ma tulafono uma a le Alii. Ina ua faafesāga'i Tanielu ma le tupu o Papelonía, ina ia faamatala e ia le uiga o upu na tusia i luga o pa a le tupu, famai le tala, e le'i faafiti pe na alofia sana faamatalaga, a e na tautala i le mea moni e tusa ma le faaaliga a le Alii ua faali mo le tupu o Papelonía, “MENE, MENE, TEKELE, UPERESA.” O lona uiga, *Ua faitaulia e le Atua lou malo, ua faai'uina. Ua fuatia oe i le fuafaatautau, a ua iloa oe ua māmāsagia. Ua vaevaeina lou malo, ua foaiina atu ia Metai ma Peresia.*

Atonu o se faamanatu tāua tele lenei mo le aso lona lua o le tausaga fou: Ia tatou mulimulita'i pea i ala o le faamaoni, ma tautala i le upu moni, faapei ona faia e Tanielu.

Tatalo: Le Atua mamana e, foa'i maia le loto tele matou te fesāga'i ai ma le filifiliga e faia le mea tonu i lenei tausaga a savalia. **Amene!**

Aso Faraile – Ianuari 3: “Ua Faaeaina, Faato'ilaloina ma Faagaloina”

Tusi Faitau – Kenese 40:1-23 (*Promoted, demoted and forgotten*)

Matua – ff. 14, 23: *“A ia e manatua mai a’u pe a oo le manuia ia te oe, ma ia e alofa mai ia te au, ma ia e ta’ua a’u ia Farao, ma ia aveina atu a’u i lenei fale ... A ua le manatua Iosefa e le ua sili i e tautu uaina, a ua galo lava ia te ia.”*

E i ai se taimi na e faia ai se mea lelei mo le isi tagata, ma le faamoemoe e te maua mai ai se fesoasoani aogā mo oe; a e peita’i ua lē taulau ma ua faagaloina mai lou alofa? O le mea lea na oo i ai Iosefa, e tusa ma le tusi faitau o lenei aso. Ua le manatua e le tautūipu le agalelei o Iosefa. Ua faaeaina o ia, a e faagaloina ai o lē na agalelei ia te ia.

O se feau faamanatu o lenei aso lona tolu, pe faagaloina ma faato’ilaloina o i tatou e nisi ua faaeaina, ona o lo tatou agalelei ma le alolofa atu i ai, ia aua lava ne’i galo ia te oe, e manatua pea oe e le Atua. E galo lou agalelei e tagata, a e lē faagaloina oe e le Atua. Na faagaloina Iosefa e le tautūipu o Farao, a e le’i galo lava o ia e le Atua.

I le tamāoaiga faaleAtua, e leai se agalelei e lilo; o loo faitauina e le Atua mea uma, e tauia foi e le Atua mea lelei uma. I lenei tausaga fou, ia e faia le lelei ma ia agalelei atu; ia maua le loto faamagalo ma le loto foa’i.

Tatalo: Le Atua alofa e, fesoasoani ia ou faaali atu lou agalelei ma le agaaloa i aso uma o lo’u ola, e tusa lava pe tauia pe leai. **Amene!**

Aso Toona’i – Ianuari 4: “O Filifiliga ma Taunuuga”

Tusi Faitau – Faamasino 11:29-40 (*Choices and consequences*)

Matua – ff. 30-31: *“Ona faia lea e Iefata le tauto i le Alii, o loo faapea, Afai e te tuuna mai lava le fanauga a Amoni i lo’u lima; ona fai lea mo le Alii o se na te ulufafo i faitotoa o lo’u fale e faafetaiai ia te au i lo’u foi atu ma le manuia nai le fanauga a Amoni; pe ou te fai ai le taulaga mu.”*

I talaaga o le Tusi Paia e uiga i le filifiliga sesē a tagata, o Iefata ua tū mati’e i tagata uma. I le taua a Isaraelu ma le fanauga a Amoni, na fai e Iefata se tautoga e faapea, afai e tuuina mai e le Alii le manumalo i ona lima, ona faia lea mo le Alii o sē na te muamua ulufafo i faitoto’a o lona fale. O le mea na le’i mate’ia e Iefata, o lona lava afafine o le a fai mo le Alii.

E i ai taimi tatou te faia ai ni folafolaga poo ni faai’uga faanatinati, e aunoa ma le mafaufau muamua i taunuuga e toe faaletonu ai tatou. O le fesili, E faapefea la ona puipuia i tatou mai i tulaga faapenei? O le tali, sa’ili muamua le mana ta’ita’iga a le Atua; po ua ō gatasi le folafolaga ma le finagalo o le Atua, pe ua na o se mea ua tatou loto lava e fai. Afai e galo ona tatou fesili muamua i le Atua, e le mafai la ona tatou tuua’ia fua le Atua mo ni taunuuga e mulimuli mai, e tusa ma a tatou filifiliga faanatinati. Ia oe ne’i faapei o Iefata i le savaliga umi o lenei tausaga.

Tatalo: Le Atua paia e, fesoasoani ia ou le faia ni filifiliga ma ni folafolaga e aunoa ma le moe manatunatu i ona taunuuga. **Amene!**

O FOLAFOLAGA MA FAAI’UGA – PROMISES AND RESOLUTIONS

1. O Folafolaga Lelei (*Good Promises*)

Lotu Aofa'i o Pulega – Ulua'i Aso Sā Tausaga Fou

Aso Sā – Ianuari 5: “Faafesaga'i ma faanoanoaga” (*Facing regret*)

Tusi Faitau – Ruta 1:6-18

Matua – ff. 6e-7: “... Auā ua ia faalogo i le nuu o Moapi, ua asiasi le Alii i lona nuu, ma na foai atu mea e ‘ai ia te i latou. Ona alu ese ai lea o ia i le mea sa i ai, o ia ma avā a ana tamā e toalua faatasi ma ia; ua latou ui i le ala e foi mai ai i le nuu o Iuta.”

O le tusi faitau o lenei Aso Sā, o le tala ia Naomi ma le fesaga'i ai o ia ma ona faanoanoaga. Sa siitia atu Naomi ma lana tane i Moapi e sa'ili se olaga lelei, mo i la'ua ma o la aiga; auā sa tupu le oge i Isaraelu i lea vaitau. O le mea e faanoanoa ai, na maliliu lana tane ma lana fanau tama e to'alua, a o nonofo ai latou i le nuu o Moapi. Na suia fo'i e Naomi lona igoa ia **Mara**—lona uiga, “oona”—auā o mea ia na atagia mai i lona olaga (f. 20). O le matua o lenei aso, ua iloa ai le mea e tasi na suia ai e Naomi lona ala, a o maua pea e ia le ola.

Ua faalogo Naomi ua faamanuia e le Atua lona nuu o Isaraelu, ona ia filifili loa e sili le toe fo'i i lona nuu moni. Atonu e le o se filifiliga faigofie lea mea, auā e leai sana mea aogā lava e tasi e faaalua mo na tausaga e tele na tuua ai lona nuu. Ua na'o mala ma faanoanoaga. E ui i lea, o le filifiliga a Naomi e toe fo'i i lona nuu moni o Isaraelu, toe fo'i e faafesaga'i ma faanoanoaga, o iina ua toe faamanuia ai le Atua lona olaga, e ala mai ia Ruta. Ia tatou fesaga'i pea ma o tatou faanoanoaga.

Tatalo: Le Atua e, ia matou avatu i lau Afio a matou faanoanoaga uma. O lau Afio matou te maua ai le amataga fou. **Amene!**

Aso Gafua – Ianuari 6: “O le faia o folafolaga” (*Making promises*)

Tusi Faitau – 1 Samuelu 20:12-17

Matua – f. 12: “Ona fai mai lea o Ionatana ia Tavita, le Alii le Atua o Isaraelu, ia sisila mai o ia, a uma ona ou tofotofo i lo'u tamā e faapenei le aso taeao po o ē luā; faauta foi, afai e loto lelei o ia ia Tavita, afai ou te le auina atu se tasi ia te oe e ta'u atu ai ia te oe.”

O Ionatana ma Tavita, sa ia te i la'ua se faigauō e faapitoa, faapitoa lava. A o sa'ili'ili e Saulo se auala e fasiotia ai Tavita, na faaalua e Ionatana lona alofa moni ia Tavita, i lona faia o se folafolaga e faasaoina ai le ola o Tavita mai i lona tamā o Saulo. Na tuu atu e Tavita lona ola i lima o Ionatana; o lē na semanu e faalataina o ia. A e na talitonuina e Tavita le moni o le alofa o lana uō pele o Ionatana.

O folafolaga e fua mai ai le faatuatua, auā ua ia te i tatou le faamoemoe ona o folafolaga. “O le faatuatua, o le faalagolago lea i mea ua faamoemoe i ai, o le mautinoa lea o mea e le o vaaia” (Eperu 11:1). O lona uiga, ua tatou faamoemoe ona e i ai le mea o le a tupu. A o le faatuatua e maua ai le faamautinoa o le a tutupu ai nei mea. O le fesili: O fea la e maua ai le

faamautinoa? E maua mai lea i “folafolaga” o loo tatou faia. Peita’i ane, e le o folafolaga uma e faia e faatuatua; auā e fua lava i le tagata o loo faia le folafolaga. Ua na o le tagata faamaoni e faatuatua ma talitonuina e na te tausia ana folafolaga uma. Faapei lava ona tatou faatuatua i le Atua i aso uma, auā o loo tausia lava e le Atua ana folafolaga uma.

Tatalo: Le Atua e, alofa ma fesoasoani mai ia ou tausia ma faataunuuina a’u folafolaga uma i tagata, aemaise o lau Afio. **Amene!**

Aso Lua – Ianuari 7: “O le tausia o folafolaga” (*Keeping promises*)

Tusi Faitau – 2 Samuelu 9:1-13

Matua – f. 7: *“Ona fai ane lea o Tavita ia te ia, Aua le fefe, auā ou te agalelei lava ia te oe, ona o Ionatana lou tamā; ou te toe tuu atu lava ia te oe le fanua uma o Saulo lou tamā; a o oe, ta te aai faatasi ma a’u i la’u laoai e le aunoa.”*

Sa iai ia Tavita se loto alofa e ese nauā, ua ia tausia ai lana folafolaga ia Ionatana. A tuufesilisili poo fea na ia maua ai le alofa e faamagalo ai le aiga o Saulo, faitau i le tusi o Salamo o loo aumaia ai se malamalamaga ia Tavita. I le Salamo 55, o loo faamatala ai le tatalo a Tavita—ua ole atu i le Atua e puipuia o ia mai ona fili, ma ua filifili o ia e faalagolago i le Alii. Na tuuina atu e Tavita lona tiga ma lona faanoanoa i le Alii, ma faatagaina ai le Atua e faamalolo atoatoa o ia. I le i’uga, na ia faamamaluina le aiga o Saulo e ala i le toe faafo’isia o lo latou tamaoiga ma faafeiloa’ia le atalii o Saulo i lana lao’ai.

O le tali a Mefiposeta ua faaalua ai lona le’i faatalitalia o se ituaiga agalelei faapei ona faia e Tavita; auā sa ia manatu lava e lē tatau. Ae e le’i vaai Tavita iā te ia o le atalii o le atalii o Saulo, ae o se tagata e tatau ona alofa i ai. Ua aoao mai e Iesu i tatou i le Mataio 5, o i latou e faaalua le alofa mutimutivale i isi, o le a faaalua foi le alofa mutimutivale. Oka se ata matagofie o le mana o le faamagaloga ma le toefuataiga.

Tatalo: Le Alii e, fesoasoani ia ou faaalua le alofa ma le agalelei nai loo le loto ita ma le tau ma sui, ona o lou viiga. **Amene!**

Aso Lulu – Ianuari 8: “Poto mo le tofiga” (*Wisdom for the assignment*)

Tusi Faitau – 1 Tupu 5:1-12

Matua – f. 7: *“Ua faalogo Hiramo i upu a Solomona, ona fiafia tele ai lea o ia, ua faapea foi o ia, Ua faafetai i le Alii i le aso nei, o le ua avatua ia Tavita lona atalii poto na te pule i lena nuu tele.”*

Sa mana’o le tupu o Turo e faatumauina pea le faia lelei faalemalo ma le nuu o Isaraelu, o lea na ia auina atu ai ana avefe’au ia Solomona le tupu. Na tuuina atu e le Atua le poto ia Solomona e iloa ai le gafatia o lenei faigauō faavāomālō; ma o le ki foi lea o le faataunuuina e Solomona o lana fo’i tofiga mai le Atua, o le fausiaina lea o le Malumalu o Ierusalem. Na talileleia le sāvali. Na auauna atu foi le tasi mo le tasi, ma i’u ai i le manuia.

Sa faamanuia Solomona i le poto, e le gata ina ia iloa le mea e tatau ona fai, a e pe faapefea foi ona fai, ma o ai foi na te fesoasoani e galulue faatasi

ma ia. O tofiga uma ua tatou maua, e mana'omia uma nei vaega e tolu: o a mea e fai ai (*the what*), e faafelea ona fai (*the how*), ma o ai fo'i na te fesoasoani i ai (*the who*). E to'atele tagata o le a faafetaia'i ma i tatou, a e mana'omia le poto mai le Atua, poo ai o le a faaaogā e le Atua e fesoasoani e faataunuu lo tatou tofiga. O le upu moni, e lē tatau ona tatou savavali to'atasi—**o le tele o lima e māmā ai se avega**. O le poto lea na tuuina e le Atua ia Solomona.

Tatalo: Faafetai le Atua, auā ua e foa'i au meaalofo tagata i totonu o matou ola, ina ia matou auauna i le tasi. **Amene!**

Aso Tofi – Ianuari 9: “O Tapulaa FaaleAtua” (*Godly values*)

Tusi Faitau – Tanielu 1:8-16

Matua – f. 8: *“A ua manatu Tanielu, o le a leaga o ia i mea taumafa a le tupu, po o le uaina e inu ai o ia; ona aioi atu ai lea o ia i le alii e pule i eunuka ina ia le leaga ai o ia.”*

O Tanielu ma ana uo, na filifilia i latou e auauna i le maota o le tupu ma le malo o Papelonía. Aepeita'i le tofiga ma lenei filifiliga sa lē aumaua e nisi o le nuu o le tafeaga, sa mana'omia fo'i ona latou tuulafoa'i a latou Atua, a e auga atoatoa i mea sa manana'o ai le Papelonía ma lo latou faiga malo. I le fuaiupu filifilia o lenei lava aso, o loo ta'ua ai le faafitāuli o mea'ai sa tatau ona taumamafa ai Tanielu ma ana uo, ae peita'i sa iai faatasi ma mea'ai e lē māmā e tusa ma le faavae o le tulafono a Mose.

O le soifua faatuatua ma le mulimulita'i i le Atua ma lana finagalo, e le o se mea faigofie i soo se taimi, e tusa ma talafaasolopito a le Tusi Paia. Na faatusaina e Iesu lenei mea i se ala vaapiapi, auā e lē o tagata uma e mafai ona uia lenei ala. Faapei o Tanielu, e mana'omia ona tatou “faamautū” ma “faamausalī”, a e le o le faagutugutulua.

Tatalo: Le Atua e, fesoasoani mai ina ia ou tumau i le faamaoni e savali ai i ala uma o lou finagalo i lenei tausaga fou. **Amene!**

Aso Faraile – Ianuari 10: “E sili le alofa i lo le faamasinoga”

Tusi Faitau – Kenese 9:8-17 (*Mercy outweighs judgement*)

Matua – f. 11: *“Ou te faatumauina lava la'u feagaiga ma outou; e le toe faaumatia lava mea ola uma i le vai o se lolo; e leai foi se toe lolo e faaumatia ai le lalolagi.”*

E tulaga ese le tala o lenei aso, auā o loo faailoa mai ai le Atua o le faamasino aemaise fo'i le Atua o le alofa. O vaaga uma ia e lua o loo faamanino mai e le tala; o loo faaalua ai fo'i le finagalo moni o le Atua, **“E sili le alofa i lo le faamasinoga”**. E lē ona o le amiotonu a Noa na mafua ai ona finagalo le Atua e faaola le lalolagi, a e ona o lona lava alofa tunoa ma lona alofa mutimutivale.

I le amataina o lenei tausaga fou, ia faasifo le loto vivii ona o le alofa o le Atua ia i tatou. Ia faasifo le agaga faafetai ona lona alofa mutimutivale ua

faaolaina ai lenei lalolagi agasala, e ala i le Maliu ma le Toetu. Esili le alofa i lo le faamasinoga. E leai fo'i se agasala e sili atu i lona alofa mutimutivale.

Tatalo: Le Alii e, faafetai mo lou Alofa tele nauā. Fesoasoani ia ou lē faagaloina ma ia faaloloto mai lou alofa ia i matou uma. **Amene!**

Aso Toona'i – Ianuari 11: “O le tausia o folafolaga” (Keeping Promises)

Tusi Faitau – 2 Korinito 1:16-20

Matua – ff. 17-18: *“O lenei, pe i ai ea sa'u manatu faaletonu ina ua faapea ona ou filifili? Pe ou te filifili ea i la le tino i mea ou te filifili ai, ina ia ia te au le ioe, ioe, ma le leai, leai? A e faamaoni le Atua, sa le Ioe ma Leai la matou upu ia te outou.”*

Na folafola atu e Paulo, o le a asiasi atu i le ekalesia i Korinito, a e foliga mai e na te le'i faataunuaina. Na faamatala atu e Paulo i lana tusi ia Korinito, e le'i taumafai o ia e faasese ia te i latou, auā sa ia malamalama i le tāua o lana upu mo i latou. Na faamanatu e Paulo, e tatau i tagata talitonu ona faamautinoa lo latou “ioe” ma lo latou “leai”; ma e tatau ona tatou ola e tusa ai ma tapulaa a le Atua mo le faamaoni, aemaise pe a oo i a tatou upu ma a tatou folafolaga e faia. Na iloa e Paulo le tāua o folafolaga i totonu o mafutaga. Na ia malamalama fo'i i le faanoanoaga ma le lē fiafia e tutupu mai ai, pe a lē tausia lelei o folafolaga.

Tatalo: Tatalo mo le poto e faia ai folafolaga e mafaia ona tausia; ia maua le loto maulalo ma le faamaoni e ta'utino ai a matou sesē. **Amene!**

FAITAUGA MAI KOLOSE (1) – READINGS FROM COLOSSIANS (1)

Aso Sā – Ianuari 12: “Mausali ma fuatele” (Firm and Fruitful)

Tusi Faitau – Kolose 1:1-8

Matua – ff. 4-6: *“Auā ua faalogologo i ma'ua i lo outou faatuatua ia Keriso Iesu, ma lo outou alofa i le au paia uma lava; ona o le faamoemoe ua teu mo outou i le lagi; ua outou faalogologo i ai anamua i le upu o le mea moni ua i le tala lelei, o loo i ai ia te outou, e pei ona i le lalolagi uma lava; o loo fua mai ai foi le fua, faapei ona faia ia te outou foi talu le aso na outou faalogologo ai, ma iloa lelei ai ma le faamaoni le alofa tunoa o le Atua.”*

E le'i faavaeina e Paulo le ekalesia Kolose. O le mea lea, i le amataga o lenei tusi, na taumafai le Paulo e faafesoota'i lelei atu ona lagona ma ona manatu mo le 'au faatuatua i Kolose. Ua faalogologo Paulo i mea lelei e uiga ia te i latou, ua ia mana'o fo'i e faamautinoa lana faauōga ma le lagolagosua e tusa ma le galuega i Kolose. I le mae'a ai o lenei amataga lelei, mulimuli ane o le a galue fa'asolosolo le Aposetolo i ni vaega e patino i a'oa'oga, fautuaga, ma lapataiga mo le aga'i manuia i luma o le ekalesia i Kolose.

O Kolose o se aulotu na faaalai ai le mausali ma le fuatele o le talalelei, ina ua faasalalauina le tala ia Keriso i na ona aso. O le talalelei na mua'i maua ai e tagata e tele se taofiga i le alofa tunoa o le Atua; faamautinoa ai le lelei o

le Atua ma lona alofagia o le lalolagi; i le ma le faatasi o Keriso ma ona tagata, ma i totonu fo'i o ona tagata talitonu uma. O le talalelei o loo fua mai fo'i i totonu o tagata, i lo latou alolofa atili atu mo nisi ma le olioli ma le loto foai. O le fesili faalaua'itele: Ua mausali ea lena talalelei i totonu o tatou olaga? Ua fuatele mai pea ea lena talalelei i nei ona po, faapei ona faaalua ia Kolose i na ona aso?

Tatalo: Alii e Iesu Keriso, ia fuateleina lou talalelei i totonu o matou loto ma ia fua mai ai ni fua lelei i a matou galuega ma le faatuatua. **Amene!**

Aso Gafua – Ianuari 13: “Tagata ua suia” (A People Changed)

Tusi Faitau – Kolose 1:9-14

Matua – ff. 9, 13-14: *“O ia ua na laveai mai ia te i tatou nai le pule a le pouliuli, a ua na aumaia i tatou i le malo o lona lava Alo pele; o ia ua tatou maua ai le togiola, o le faamagaloina lea o agasala.”*

O le tusi faitau o lenei aso, o loo naunau Paulo ina ia mautinoa ma tutumau Kolose i le avea ma soo moni—faamaoni i le faatuatua e tusa ma faaosoosoga ma ia olioli i le agaga. E manao Paulo ia faatumuina Kolose i le malamalama o le finagalo o le Atua (f. 9). Auā o loo filogia Kolose i nisi o tala'iga e ese mai ia Keriso. O le lapataiga a Paulo mo lana uō o Kolose, ia aua ne'i sē ese i ala fememeai. O le alafua lea na tautala lelei ai Paulo e uiga i le atoatoaga ua uma ona tuuina atu i Kerisiano i Kolose.

O le Kerisiano o se tagata ua suia. Ua iai le faamaoni ma le puleaga fou, “... ua na aumaia i tatou i le malo...” (f. 13), o Iesu Keriso lea. Ua ia i tatou se malamalama fou: lavea'iina mai le mana o le pouliuli e aoao ai 'le malamalama i le finagalo o le Atua.

Tatalo: Le Alii e, fesoasoani ia ou ola o se tagata i lalo o lou pulega, ta'ita'ina e lou finagalo, ma faamagaloina ona o lou alofa. **Amene!**

Aso Lua – Ianuari 14: “Fatu o le Fofoaga atoa, Ao o se Fofoaga fou”

Tusi Faitau – Kolose 1:15-20 (Heart of all Creation, Head of a new Creation)

Matua – ff. 15-16: *“O ia o le faatusa o le Atua e le vaaia, o le ulumatua o mea uma lava ua faia; auā na faia e ia o mea uma lava, o mea i le lagi ma mea i le lalolagi, o mea o vaaia ma mea e le o vaaia, o nofoālii, ma alii, ma alii sili, ma faipule—na faia e ia mea uma lava, na faia foi mo ia.”*

O le fuaitauga o lenei aso e foliga lava o e fatuga pese ma e faagaetia. O upu e faalatele ai le mafaufau ma faagaee ai le loto. Pe faitauina poo le usuina fo'i, o le mea mautinoa latou te tosina mai le agaga tapua'i. O le taula'iga o Iesu – o mea uma na ia faia, ma mea uma na ia faia mo le lalolagi. A o tatou mulimuli i fuaiupu, e lua ni manatu autu e aliali mai.

Muamua, o Iesu i totonu o le fofoaga (fuaiupu 15–17). E pei o le amataga o le Evagelia a Ioane, o Iesu o le loto ma le fatu o le fofoaga a le Atua. Sa iai o ia i le amataga, ma galulue faatasi ma lona Tamā e fofoaina le vateatea ma mea ua tumu ai. Lona lua, o Iesu i totonu o le fofoaga fou (fuaiupu 18–20).

I le avea ai ma Alii Toetu, o ia o le fa'ata'ita'iga o se tagata fou, o lē na te ta'ita'i tagata uma mai le oti i le ola. Afai na faaososoina nisi i Kolose e sa'ili i se isi nofoaga mo le faataunuaina o mea tau tapua'iga, o lenei fuaitauga o le a toe suia ai Kolose, ma mausali ai le taula'i atu pea ia Iesu.

Tatalo: Le Alii e, fesoasoani ia ou iloa ma malamalama atili i le lautelega o lou mana ma le loloto o lou filemu. **Amene!**

Aso Lulu – Ianuari 15: “Mana Faafouina ma le Mana Faatumauiina”

Tusi Faitau – Kolose 1:21-23 (*Renewing Power and Staying Power*)

Matua – f. 23: *“Pe afai lava tou te tutumau i le faatuatua o faavaeina, ma mausali, ma le le faateaeiseina outou i le faamoemoe i ai, sa tala'iina atu foi i tagata uma lava i le lalolagi; o a'u foi o Pualo ua fai a'u ma auaua i ai.”*

O lenei fuaitauga, e tolu faamoemoega o loo faafesoota'i atu ai Paulo ia Kolose. **Muamua**, o le faaauauina e Paulo lana sootaga lelei ma Kolose, e pei ona mua'i amata ai lana tusitusiga—o le talalelei ia Iesu ua aumaia ai i latou i le faamoemoe—e le mala ese lenei mea ma le olaga a Paulo. **Lona lua**, o le maliu a Iesu ua ala ai ona latou maua le faaleleiga ma le Atua—ua maua ai nei le mafutaga fou ma le Atua, i se tulaga fou ma se olaga fou; o le mana faafouina lea o le maliu a Keriso. **Lona tolu**, e i ai le lapata'iga—ia tutumau i le faatuatua ma le mausali, ma le le faate'aeseina i le faamoemoe. O le augani a Paulo ia Kolose, ia iai le mana faafouina, faatasi ai ma le mana faatumauiina, ina ia le faate'aeseina se tasi mai le faamoemoe ua saunia e ala i le maliu ma le toetu. O nai fesili faatupu manatu: 1) O a ni mea e ono faatumauiina ai ma faamausali ai le faatuatua o Kerisiano e tusa ma aso fai soo o le olaga? 2) O a ni mea tutupu i le olaga, poo mea faatosina a le olaga, e ono lepetia ai le faatuatua?

Tatalo: Le Alii e, fesoasoani ia ou maua le lou mana faafouina ma lou mana faatumauiina, ia le faate'aeseina ai ma lou faamoemoe atali. **Amene!**

Aso Tofi – Ianuari 16: “Tauiviga ma Manuia” (Struggle and Glory)

Tusi Faitau – Kolose 1:24-29

Matua – f. 27: *“Na finagalo foi le Atua ona faailoa atu ia i latou le uiga o le silisili o le lelei o lenei mea lilo o i nuu ese, o Keriso lea o loo ia te outou, o le faamoemoe i le manuia.”*

Sa i ai le mea lilo o le finagalo o le Atua, poo lona “misiterio” (*mystery*) sa nofo pogisa ai le lalolagi. O se faamoemoega ua leva ona natia, a e peita'i o lenei ua faaaliga ma faailoa mai i le vaitaimi tonu a le Aposetolo. Ua tuuina mai e le Atua i le lalolagi se faaaliga o lana manuia. Mo lenei “misiterio”, e lua ona itu tāua. O le itu muamua o le “lautele” – *breadth*: e mo mālō uma, o nuu ese, faapea foi ma le nuu pa'ia o le Atua o Isaraelu. Ua oo oo atu le manuia o le Atua o Isaraelu mo le lalolagi atoa. O le itu lona lua o le “loloto” – *depth*: ‘O Keriso i totonu ia i tatou’. O loo tautala le talalelei e uiga i se sootaga faavae i le va o le Ekalesia ma lona Alii. O loo ola Keriso faatasi ma i tatou, o loo i

totonu fo'i Keriso ia i tatou. Tatou te faatinoina lona soifua, ma e oo oo atu i luma lenei olaga, i le taimi nei seia oo i le faavavau, i tala atu o le oti seia oo i le toetu – O le tauiviga lea ma le manuia ia Keriso toetu.

O le tautua o le Kerisiano e le taugofie. Faapei ona puapuagatia o Iesu, ia faapea foi ona tatou faafetaia'i ma finafinau i mea tiga o lenei lalolagi. Auā o tala atu o na mea uma, o loo i ai le “misiterio” o le Atua, o le manuia lea o loo ia Keriso.

Tatalo: Le Alii e, matou te tatalo mo e o loo tausoina le avega ia Keriso. Aumai le loto tele ma le faamoemoe e tauivi ai i aso uma. **Amene!**

Aso Faraile – Ianuari 17: “Alofa tauivi” (Love’s struggle)

Tusi Faitau – Kolose 2:1-7

Matua – f. 1: *“Auā ou te manao ina ia iloa e outou o lo'u finau matuā tele ona o outou ma i latou o i Laotikaia atoa ma i latou e ua le iloa mai a'u i le tino.”*

O Paulo o loo tautala atu e uiga i le tiga ma le tauivi, a o se tauiviga e le mo ia, a e mo Kolose faapea fo'i ma Laotikaia atoa ma i latou ua le iloa mai o ia i le tino. O le finauga a Paulo na faasoaso mai i le amataga o lenei tusi, o lona tautiga e le mo ia lava a e mo Keriso ma lona Ekalesia—ekalesia uma na faavaeina e Paulo, faatasi ai ma nisi o ekalesia e le'i faavaeina e ia. O le ta'uina atu e le Aposetolo o nei mea ia Kolose, o lona taumafai lea e faailoa atu, o lana ta'ita'iga ma ana a'oa'oga e faavae i le alofa ma le faamaoni. E le na'o upu ma tala, a o loo tautala fo'i Paulo i ana galuega mo le manuia o le talalelei.

Fesili faatupu manatu: Poo e iloa nisi o loo galue tauofo mo le leleiga ma le manuia o le talalelei a Keriso? Ua tatou galulue ea mo le talalelei ona o i tatou lava ia, poo ua faia ona o le alofa ma le faamaoni o le Atua?

Tatalo: Le Alii e, fesoasoani i o matou tofiga i le talalelei, ia matou faia ma le alofa ma le faamoani, faapei ona e faia mo i matou. **Amene!**

Aso Toona'i – Ianuari 18: “O le Atua na faaolaina oe”

Tusi Faitau – Kolose 2:8-15 (God made you alive)

Matua – ff. 8, 13: *“Ia outou, ne'i faapologaina outou e se tasi i le poto le aogā e faasese ai, e tusa ma le uputuu a tagata, e tusa ma aitu o le lagi ma le lalolagi, ae le tusa ma Keriso ... O outou foi sa oti i amio leaga ma le le peritomeina o outou tino, na ia faaola mai faatasi ma ia, ina ua faamagaloina mai a tatou amio leaga uma lava.”*

“O le Atua na faaolaina oe!” O le finauga lea a Paulo ia Kolose e tusa ma le faafitauli na oo mai i taliga a le Aposetolo. E le o se poto faalelalolagi poo uputuu a taga, a o le alofa o le Atua e ala ia Keriso. E le o se mea fou o loo tautala atu ai Paulo ia Kolose, a o le mea ua uma ona tuuina mai e Keriso. Ua totona e Keriso i totonu ia te i tatou le ola fou; o i taotu la o tagata o le toetu; o le papatisoga o loo faaalai ai lenei mea (f. 12). Ua faamagaloina i taotu; o o tatou agasala ua faamagaloina, ua soloiesea, tuuese ma tutu'iina i luga o le

satauro (ff. 13–14). Ma e le tatau ona tatou toe fefefe. O lo tatou Alii o le ‘ulu ia o alii sili uma lava atoa ma faipule’ (f. 10). O le Atua na faaolaina oe!

Tatalo: Le Atua e, tatalo mo e o loo mana’omia lou fesoasoani ina ia iloa ua uma ona e faamagaloina a matou agasala uma. **Amene!**

FAITAUGA MAI KOLOSE (2) – READINGS FROM COLOSSIANS (2)

Aso Sā – Ianuari 19: “Se tagata fou: sa’oloto mai le tuana’i”

Tusi Faitau – Kolose 2:16-23 (*A New Self: Free from the Past*)

Matua – ff. 20-21: *“O lenei, afai ua outou oti faatasi ma Keriso i aitu o le lagi ma le lalolagi, se a le mea tou te savavali peiseai ua nonofo pea outou i le lalolagi? Se a foi le mea tou te usiusitai atu ai i faatonuga, ‘Aua ne’i pa’i atu i ai, Aua ne’i tofo, Aua ne’i tago.”*

Sa feagai Kolose ma se faafitauli tele, le fevaevaea’iga sa taatele i totonu o lea ekalesia: o le taufaasesē a le ‘au faafiapoto i mea tau le agaga (*Gnosticism*), o filosofia fou, ma le su’esu’eina o le tagata lava ia te ia, o mea ia na fetosoa’ina ai le faatuatua i totonu o Kolose. Ua tusi atu Paulo e faamanatu i tagata Kolose le mealilo paia ua valaauina ai i latou, ua toe faafouina ai i latou, ma ua latou ola ai fo’i. O loo ola fo’i i latou ia Keriso, o le faatusa lava lea o le Atua e le o vaaia, ua filifilia ai i latou, ua togiolaina ai i latou, ma ua valaauina ai i latou i le ola fou.

Atonu e le malaese faafitauli na oo ia Kolose ma nisi o tatou i nei ona aso. Ua tele lava mea o loo fetosoa’ina ai le faatuatua ia Keriso, ma ua faalilolilo ai le misiterio pa’ia o le Atua na ia finagalo ai mo le lalolagi. Manatu o se faamanatu tāua lea o le upu o lenei aso. Ia tatou faia se tagata fou, ma ia tatou ola sa’oloto mai i mea o le tuana’i.

Tatalo: Le Atua e, ia faia se loto fou i totonu ia te a’u, ma ia ou sa’oloto mai le tuana’i. **Amene!**

Aso Gafua – Ianuari 20: “Se tagata fou: sa’oloto mo le lumana’i”

Tusi Faitau – Kolose 3:1-4 (*A New Self: Free for the Future*)

Matua – ff. 1-2: *“O lenei, afai ua toe faatuina outou faatasi ma Keriso, ia outou saili i mea o i lugā, o i ai Keriso, o loo tietie i le itu taumatau o le Atua. Ia outou loto lava i mea i lugā, a e le o mea i le lalolagi.”*

O lo loo faaauau pea le mataupu o le aso ananafi, o le faamanatu a Paulo ia Kolose, ua tagata fou i tatou ia Keriso. O le faamamafa o lenei aso, o se valaau faanatinati e tatau ona ave i ai lo tatou faamuamua. E le mafai ona alofia mea faalavefau. O faalavelave e o’o mai e aunoa ma se fa’atagaina. A e peitai e le o faatatau le silasila a le Aposetolo i ia mea. O loo faatatau i le taula’iga a le tagata fou o le Alii: o fea tonu o loo i ai le gauai atu, a o le a fo’i le puna o lana talitonuga. E tatau ona tatou iloa po o ai i tatou, a o le a fo’i le mea na faia ai i tatou.

Ua faatuina i tatou faatasi ma Keriso. Poo a lava mea faatiga o lenei olaga, ia mau pea le taula’iga ia Keriso ma mea o i lugā. Ua ia i tatou se meaalofo

sili, o le meaalofo foa'ifua o le alofa tunoa. Na te le'i aumaia lenei meaalofo e aveesea ai mala ma mea faatigā o le olaga; peita'i o lenei meaalofo ua fāoa ese ai le malosi ma le pule o mea faatigā i luga ia'i tatou.

Tatalo: Le Alii e, Iesu e, ia e faatumuina lo'u olaga i lou ola, ma ia le aunoa ona ou ola i lou meaalofo o le alofa tunoa. **Amene!**

Aso Lua – Ianu. 21: “Fanaufouina: talaatu o le pologa ma le sa’oloto”

Tusi Faitau – Kolose 3:5-11 (*Reborn: beyond slavery and freedom*)

Matua – f. 10: “*A ua outou oofu i le tagata fou, o le ua faafouina i le iloa, e faatatau ia foliga i le na faia o ia.*”

O lenei matāupu ua tolaulauina ai e le Aposetolo o amioga tuai o le lalolagi, o mea ia e ao ona fasiotia ma tuueseina e le tagata ua fanaufouina ma oofu i le tagata fou ia Keriso. Ia faafouina le iloa o le mafaufau, ma ia tupu le olaga fou ia Keriso, e faatatau ia foliga i lē na faia o ia. O le fanaufouina o le tagata fou, “*E le o i ai se Eleni po o se lutaia ... o se pologa po o se sa’oloto; a ua ia Keriso mea uma, o i ai foi Keriso i mea uma lava*”.

Atonu o le feau lenei a Paulo mo Kolose. Ia avea aso uma o le olaga e taumafai e tuua mea tuai o le lalolagi, a e finau i aso uma e foliga i lē na faia i tatou. O le meaalofo lea o le Atua e ala ia Keriso; ina ia toe faafouina la tatou mafutaga ma le Atua, ma ia taula'i pea o tatou olaga ia te ia.

Tatalo: Iesu Keriso e, fesoasoani ia ou fasiotia lo'u olaga tuai, a ia tupu pea lou tagata fou i totonu ia te a'u. **Amene!**

Aso Lulu – Ianuari 22: “Ola ia Keriso: o ē ua filifilia e le Atua”

Tusi Faitau – Kolose 3:12-17 (*Living in Christ: God's chosen ones*)

Matua – f. 16: “*Ia nofo le afioga a Keriso i totonu ia te outou ia tele lava, a o outou d'oa'o ma apoapoi le tasi i le tasi i le poto uma lava, a o outou pepese foi i salāmo, ma pese, ma siva faaleagaga, ma le faafetai i le Atua i o outou loto.*”

I totonu o le vevesi ma le fevaevaea'i o le ekalesia i Kolose, ua valaaulia i latou ina ia maua le filemu o Keriso i o latou loto. Ua ofoina atu ia i latou le “salome” poo le “shalom” (upu Eperu) a le Atua: o le filemu manuia lea e toe faafo'isia ai le foafoaga i lona tulaga atoatoa e ala i le alofa lavea'i ma le ositaulaga o Iesu Keriso. O lenei filemu ua ofo fuaina mai, o se meaalofo e leai se totogi, e aunoa ma se afa e noanoatia ai.

Ua taia tagata Kolose i le tele o maa tui ma maa faalavea aoo o le olaga, ua faasesēina fo'i i latou mai le faatuatuaga sa latou taofi mau ai i le amataga. O lenei, ua toe apoapo i ai le Aposetolo, ma toe faamanatu ia le Kolose le filemu manuia o le Atua e ala ia Keriso.

Tatalo: Le Alii e, aumaia lou filemu manuia i totonu o matou vevesiga; ia tupu se faamoemoe fou matou te maua ai le loto pulea. **Amene!**

Aso Tofi – Ianuari 23: “Fulifaō le lalolagi”

Tusi Faitau – Kolose 3:18-25 (*Turning the world upside-down*)

Matua – ff. 23-24: *“O mea uma lava tou te faia, ia faia ma le loto, peiseai ua faia i le Alii, a e le o tagata; auā ua outou iloa, e maua e outou mai le Alii o le tau, o le tofi lea; auā ua auauna outou i le Alii o Keriso.”*

O le mataupu o lenei aso e faatatau tonu mo mafutaga ma sootaga masani, o loo pulea ai le vā fealoaloa'i o tagata ma nuu, aemaise o i totonu o faapotopotoga Kerisiano. O loo tauanau atu i sootaga masani faapei ona faia i le vā o tane ma avā, o matou ma fanau, o matai ma pologa; ia fulifaō le mea masani, ae toe fuata'i se sootaga fou e faavae i le alofa ma le faaaloalo, aemaise o sootaga e ogatotonugalemu ai Keriso. Ia faia fo'i e peiseai ua faia i le Alii, a e le o tagata; auā e maua le tau mai le Alii; auā ua tatou auauna i le Alii o Keriso.

Tatalo: Le Atua e, fesoasoani ona o tu ma aga masani na faavae ai o matou tagata; ia fulifaō nei mea, ma ia alofagia Iesu Keriso. **Amene!**

Aso Faraile – Ianuari 24: “Faamāi i le masima: agaga tatalo ma le agalelei”

Tusi Faitau – Kolose 4:1-6 (*Seasoned with salt: prayerfully and graciously*)

Matua – ff. 2, 6: *“Ia outou finafinau i le tatalo, ia mataala i lea mea ma le faafetai ... Ia le aunoa a outou upu ma le alofa, ia faamāi i le masima, ia iloa e outou ona fai faatatau se tali i tagata e taitoatasi uma.”*

O le “masima” sa e faaaoga i na ona po e faasaosao ai ni mea taumafa ia aua ne'i leaga ma ma'umau. Peita'i, ua faaaoga e Paulo lenei fuaitauga e faatatau i upu e tautala atu ai Kolose i a latou tatalo e faia. O lona uiga, “ia le aunoa a outou upu ma le alofa”. O le apoapoa'iga a Paulo mo Kolose, a outou tatalo, ia le aunoa ona outou tatalo mo nisi, a e lē na'o mo outou lava (ff. 3-4). Ia tatalo fo'i mo i latou o loo tau faasese ia te outou.

O le tatalo o le a'upega e mai luga, e maua ai le malosi i mea faigatā. Ua apoapoa'i le aposetolo, ia aua ne'i tatou faapito manu ia tasi, a ia le aunoa ona tatalo atu mo soo se tasi. Tatalo mo lou aiga, lou nuu, lou atunuu, ma le Ekalesia a le Atua. Ia tatalo fo'i mo ou fili ma lē ua ita mai.

Tatalo: Le Atua e, matou te tatalo mo lenei lalolagi ma ona leaga, ia aualiitia ma lavea'ina e lau afio mea uma o le foafoaga paia. **Amene!**

Aso Toona'i – Ianuari 25: “Se nuu fou o le faatuatua ma le alofa”

Tusi Faitau – Kolose 4:7-18 (*A new community of shared faith and love*)

Matua – ff. 15-16: *“Ua ou alofa atu i le au uso i Laotikaia, o Numega foi, atoa ma le ekalesia o i lona fale. Pe a uma ona faitau e outou o lenei tusi, ia faitauina foi e le ekalesia i Laotikaia, ia outou faitau foi le tusi mai Laotikaia.”*

O le agaga a Paulo mo Kolose, e pei ona i ai upu o le matua, ia fuata'i se fesoota'iga a le aulotu i Kolose ma nisi o le 'au Kerisiano i nuu tuao'i ma ē tuu lata ia i latou. Ia i ai se fefaasoa'iga a Kolose ma le ekalesia i Laotikaia, faapea fo'i le tinā ia Numega ma le ekalesia o i lona fale. Atonu, o loo manatu Paulo e ave nei fesoota'iga faaekalesia e fesoasoani ai le tasi i le tasi pe a oo i taimi

fitā. O le tasi fo'i lea mea tāua e mana'omia tele i nei ona aso. Ia faatumauiina pea le fesoota'iga o aulotu ma ekalesia, aemaise fo'i o aiga ekalesia ta'itasi. Auā o iina tatou te faasoa ai le faatuatua ia Keriso, aemaise o le alofa ma le alofa le faatua'oia. O gaioiga nei e fanau ai le loto maulalo ma le agamalu ma le onosa'i.

Tatalo: Le Atua e, ua e valaauina i matou ma nuu filifilia, ua tino e tasi ia Keriso; ia e faamallosia le felagolagoma'i ma le fefaasoa'i. **Amene!**

O MAMOE MA LEOLEO MAMOE – SHEEP AND SHEPHERDS

Aso Sā o Tupulaga

Aso Sā – Ianuari 26: “O le mana a le mamoe faapelepeleina”

Tusi Faitau – 2 Samuelu 12:1-6 *(The power of the loved sheep)*

Matua – f. 3: *“A e leai se mea a le mativa, ua na o le tamai mamoe fafine itiiti e tasi, na ia faatau, ma faasaoina, ua tupu faatasi ma i latou ma lana fanau; o si ana fāsi mea na ‘ai ai, o lana ipu na inu ai, sa taoto foi i lona fatafata, ua pei se afafina lava ia te ia.”*

O le tala o lenei aso o loo ta'ua ai se tama'i mamoe fafine na faapelepeleina ma alofaina e se tasi tagata mativa. Ua tausia lava lenei tama'i mamoe faatasi ma lana fanau, ua pei se afafina ia te ia. Peita'i, o le tagata mauoa, sa tele lava ana mamoe ma povi, ua le avane e ia se tasi o ana lava mamoe, e talimalo ai le tagata malaga na alu atu ia te ia, a e na ia ave faamallosia le mamoe e tasi a lenei tagata mativa. O loo faamanino mai e le tala, e le'o se taimi la'ititi na tausia ai e lenei tagata mativa lana mamoe e tasi, a ua faomea i ai le tagata mauoa.

E ui o loo faauiga lenei tala ia Tavita ma lona agasala na faia ia Uria, peita'i e i ai se lesona tāua e mafai ona a'oa'oina mai ai. O tatou o mamoe pele a le Atua. E lē lauitiiti pe faatauvaa le silasila mai o le Atua i ana mamoe pele. O loo aumai e lenei tala le faamasinoga tonu a le Atua mo e faamaualuluga ma lē matata'u i le Atua.

Tatalo: Le Tama e, fesoasoani ia ou faatāua i au mamoe uma faapei ona e faatāua mai ia te a'u nei. **Amene!**

Aso Gafua – Ianuari 27: “O le taulaga e avatu mo le Alii”

Tusi Faitau – Levitiko 8:18-29 *(The offering presented to the Lord)*

Matua – f. 21e: *“Ua susunuina foi e Mose o le mamoe poa uma lava i le fata faitaulaga, o le taulaga mu lea, o le mea manogi lelei, o le taulaga e fai i le afi i le Alii; e pei ona poloai mai ai o le Alii ia Mose.”*

O le faiga taulaga a le Feagaiga Tuai, o le taulaga mu na fai i le afi e susunuina ai mamoe i luga o le fata faitaulaga. Sa i ai tulafono ma poloa'iga e tatau ona uista'ia e tagata uma o le nuu, e pei ona faatonuina ai o Mose e le Atua. I la le Feagaiga Fou, o Iesu na ofoina atoatoa lona soifua e fai ma taulaga manogi lelei mo le Atua (Efeso 5:2); e ao ai fo'i ona tuuina atu o tatou

tino i le Atua, o le taulaga ola, ma le paia, ma le mālīe, e tusa ma le agaga tapua'i (Roma 12:1).

Atonu e le toe faia ni taulaga i mamoe ma povi, a ua finagalo le Atua mo a tatou tino e fai a'i le taulaga e avatu ia te ia. E faapefea la ona tatou faia lenei taulaga? O lau amio ia lelei! E le'o le taulaga tupe ma mea tatou faia mo 'aulotu ma ekalesia, a o le faatinoga o a tatou taulaga ma galuega, ia faia lea ma le amio mamā ma le loto e mamā

Tatalo: Le Alii e, aumaia lou alofa e mafai ona ou tuuina atu nei lo'u ola ma ia manogi lelei la'u amio ia te oe. I le suafa o Iesu. **Amene!**

Aso Lua – Ianuari 28: “Taimi e faainu ai mamoe”

Tusi Faitau – Kenese 29:1-8 (*Time to water the sheep*)

Matua – f. 7: *“Ona fai atu ai lea o ia, Faauta, e maualuga pea le la, e lei oo i le itu la e faapotopotoina ai manu, ia outou faainu mamoe, i le outou o e fafaga ai.”*

O le manuia o mamoe e tāua i soo se leoleo mamoe. E i ai le taimi e tatau ai ona faainu ma fafaga ai mamoe, ua iloa fo'i e leoleo mamoe uma lenei faatatau. Afai e maualuga tele le la, e lē saogalemu le faapotopotoina o le lafu. O le leoleo mamoe lelei e na te lē faia se tulaga leaga e fano ai le lafu mamoe. O le Atua, o la moni lo tatou leoleo mamoe lelei. E na te leoleoina i taotu ma tausia i tatou i mea uma tatou te mana'omia. O i tatou o ana mamoe, o le mea lea e fo'i ona tatou faamoemoe ma faalagolago ia te la i aso uma.

Tatalo: Le Alii e, faafetai mo lou leoleoga lelei ia i matou ma le tausia i matou i mea uma matou te mana'o mia. Faafetai ona o Iesu. **Amene!**

Aso Lulu – Ianuari 29: “O le tausia o mamoe” (*Caring for the sheep*)

Tusi Faitau – 1 Samuelu 25:2-8

Matua – ff. 7-8: *“O lenei, ua au faalogo atu o loo ia te oe e ua sele fulufulu; o lenei, o au leoleo mamoe sa matou nonofo ma i matou, sa le afaina i latou ... ia e foai ane se mea e soona maua e oe i au auauna ma lou atalii o Tavita.”*

O le seleina o fulufulu o mamoe, o se faiga masani lea mo le tausia lelei o le lafu mamoe. E ui o se fesoasoani sili mo le faamāmāina ma le ola lelei o le lafu mamoe, a e peita'i ane o le taimi sili lea ona faigata e le gata mo mamoe lava ia, a e faapea foi mo le leoleo mamoe.

O taulele'a a Tavita sa fesoasoani tele ia Napalu i le leoleoina o ana mamoe, aemaise i le vaitaimi tonu na seseleina ai o fulufulu o mamoe. Na silafia e Tavita le lē faigofie o lenei galuega, aemaise o le tele nauā o le lafu manu sa ia Napalu. Peita'i, sa le'i maua se tau'i lelei a Tavita ma ona taulele'a mai ia Napalu e tusa ma lana fesoasoani atu. Ua taupulepule Tavita e faaoo le taua ma Napalu, auā ua lē amana'iaina e Napalu o taulele'a sa fesoasoani tele ia te ia. Peita'i, na toe tauia lelei e Apikaila ia Tavita ma ona taulele'a e tusa ma lo latou fesoasoani.

Tatalo: Le Alii e, aumaia lou alofa e matou te tausia lelei ai lou lafu mamoe faapei ona o oe lava o le leoleo mamoe lelei e. **Amene!**

Aso Tofi – Ianuari 30: “Tomai fetuutuuna’i” (*Transferable skills*)

Tusi Faitau – Salamo 78:70-72

Matua – ff. 70, 72: *“Ua na filifilia foi Tavita lana auauna, ma na aumaia o ia nai lotoā mamoe ... Na fafaga foi e ia ia te i latou e tusa ma le faamaoni o lona loto; na ia ta’ita’i ia te i latou i le poto o ona lima.”*

O Tavita o se leoleo mamoe lauiloa na faaaogā e le Atua e ta’ita’ia ma tausia Isaraelu, ona o lona poto ma le tomai faaleoleo mamoe sa ia te ia. O ana galuega a o avea o ia ma leoleo mamoe, o mea ia sa filifilia ai Tavita e fai ma tupu, e ta’ita’iina le nuu le nuu o le Atua.

E leai se poto masani poo se tomai na tatou mauaina i le olaga tuputpu a’e, e aunoa ma se ma’umau. E faaaogā e le Atua mea uma ua a’oa’oina ai i tatou i vaega eseese o le olaga mo lona finagalo. A tatou galulue faatasi ma le Atua, o le a faaaogāina e le Atua o tatou tomai ma le poto masani mo lona lava mamalu.

Tatalo: Le Alii e, ua e tausi faamaoni i au mamoe; ia alofa ma faaaogaina lo matou faatauva ma lou finagalo ma lou mamalu. **Amene!**

Aso Faraile – Ianuari 31: “E avatu e le Atua le malologa ia te oe”

Tusi Faitau – Mika 2:6-13 (*God will give you rest*)

Matua – f. 12e: *“Ou te faatasia i latou pei o le lafu mamoe i Posara, pei o le lafu manu i totonu o le mea e fafaga ai, latou te soona ualolo ona o le vao tagata.”*

Ua tuuina e le Atua se perofetaga ia Mika e uiga i le auala e toe faapotopotoina ai e le Atua lona nuu o Isaraelu, ma toe aumaia ai i latou i le nuu o le folafolaga. Ua faatusaina e le Atua lenei mea i le auala e faapotopototo ai e se leoleo mamoe lana lafu, ma avatu ai i totonu o le lotoā. O le faailoga lea o le Tamā e tele lona alofa i lana fanau, e oo ai lava i le aumaia o lona filemu ma le malologa.

O le faafo’i o mamoe i totonu o lotoā, o le ata faatusa i le malologa. O le matafaioi a le leoleo mamoe i aso ta’itasi, o le faapotopotoina o mamoe ma faitaulia poo atoatoa uma, ma ave i totonu o le lotoā. E pei lava ona iloa e le leoleo mamoe ana mamoe ma faamautinoa lo latou saogalemu, ua faapea fo’i ona faia e le Atua o mea uma mo lana fanau. E na te silafia fo’i i tatou, e manatu mamafa mai iā i tatou ta’ito’atasi, ma e naunau e faamautinoa ua tatou taoto ma le saogalemu ma olioli i le malologa.

Tatalo: Le Tamā e, le Leoleo Mamoe leleli e, aumaia lou alofa tausi mai; ma ta’ita’i matou i totonu o lou lotoā e maua ai le malologa. **Amene!**

Aso Toona’i – Fepuari 1: “E iloa e le leoleo mamoe ana mamoe”

Tusi Faitau – Ioane 10:14-16 (*Shepherd knows their sheep*)

Matua – f. 16: *“Ua ia te au foi isi mamoe e le o i lenei lotoā; e tatau ona ou ta’ita’iina mai o i latou foi, e faalogo foi i latou i lo’u leo; ona tasi ai lea o le lafu mamoe, ma le leoleo mamoe e toatasi.”*

E tulaga ese le mafutaga a le leoleo mamoe ma ana mamoe. O le mamoe o se manu e faaeteete gatā, e faalagolago tele i lana leoleo e na te tausia ma puipui. Ua iloa fo’i e le mamoe le si’ufofoga a lana leoleo, pe a tauvala’au i ai le leoleo ia te ia. E tofu uma leoleo mamoe ma auala eseese e valaau ai a latou mamoe, ma e iloa fo’i e le mamoe le si’ufofoga o lana leoleo. E lē soona mulimuli foi mamoe i soo se leo, a e ua na’o le si’ufofoga a lana leoleo ua masani i ai. E pei ona iloa e le mamoe le si’ufofoga a lana leoleo, e faapea fo’i ona iloa e le leoleo mamoe ana mamoe uma ta’ito’atasi. Na te valaau ta’ito’atasi i ai, ma vaavaai poo atoa lana lafu. E valaau fo’i le leoleo mamoe ma faatalitali, pe faalogo mai mamoe i lona si’ufofoga. O mamoe tuai i lana lafu poo mamoe fou ua faaopopo i ai, e faatalitali le leoleo pe faalogo mai latou i lona si’ufofoga. Ia tatou fo’i, ia tatou taumafai ona faalogo atu i le si’ufofoga a le leoleo mamoe lelei, o loo valaau ma faatalitali, pe tatou te iloa atu o ia.

Tatalo: Le Atua e, faafetai i lou si’ufofoga malie o loo valaauina pea matou i totonu o lou lotoā. Ia fai matou ma mamoe usita’i ia te oe. **Amene!**

O LE EVAGELIA A LUKA (1) – THE GOSPEL OF LUKE (1)

1. Ua Amata le Galuega Tala’i (The Ministry Begins)

Aso Sā – Fepuari 2: *“Teuteuina o le ala” (Preparing the way)*

Tusi Faitau – Luka 3:1-22

Matua – ff. 15-16: *“A o faatalitali le nuu, ma manatunatu uma lava i o latou loto ia Ioane, po o ia o le Keriso; ua tali atu Ioane ia te i latou uma, ua faapea atu, O a’u nei lē papatiso atu ia te outou i le vai, a o lē maliu mai, e silisili o ia ia te au, e le aoga a’u ona tatala le nonoa o ona seevae; o ia lava na te papatiso ia te outou i le Agaga Paia ma le afi.”*

Mai lona laitiiti, sa faalogo Ioane i lona tamā, a o faamatala i ai le tala ofoofogia i lona fanau mai, aemaise o lona valaauina tulaga ese mai le Atua (Luka 1:11-17). O Ioane ma lona valaauina ua mauaa i le Isaia (40:3-5): *“O le leo o le ua alaga i le vao, Ina teuteu ia outou le ala o le Alii ...”* O lana leo lena, ma ua oo mai le taimi e tautala ai.

O Ioane Papatio o se failauga lelei ma le manaia e faatosina mai ai loto ma agaga o le nuu, a e sa sili fo’i ona lotomaulalo o ia. Ina ua fesiligia poo ia o le Mesia, na tali Ioane, Leai, e lē o a’u! *O a’u nei lē papatiso atu ia te outou i le vai, a o lē maliu mai, e silisili o ia ia te au, e le aoga a’u ona tatala le nonoa o ona seevae; o ia lava na te papatiso ia te outou i le Agaga Paia ma le afi.”* Ia tatou ne’i fāōa mamalu ia Iesu ma lana galuega, e tusa ai ma so tatou tofiga faapea le valaauina. Ua aumaia e Ioane le faata’ita’iga o se auauna e faamaoni ma lotomaulalo. E le o a’u, a o Iesu!

Tatalo: Le Alii e, ia ou maua le loto salamo i aso uma o lo’u olaga, ma ia faasino atu tagata uma i lau Afio, lo matou Alii Faaola. **Amene!**

Aso Gafua – Fepuari 3: “O le faaosoosoga o Iesu”

Tusi Faitau – Luka 4:1-13 (*The temptation of Jesus*)

Matua – f. 2: “*Ua faaosoosoina e le tiapolo i aso e fagafulu. O aso lava ia e lei taumafa ai e ia sina mea e tasi; ua mavae ia aso, mulimuli ane ona fia taumafa ia lea o ia.*”

O aso e fagafulu sa i ai Iesu i le mea tuufua, na faaosoosoina o ia e Satani ina ia: 1) **Faaliu areto le maa**—o lenei faaosoosoga o loo faatosina ai Iesu e tausia e ia o ona lava manaoga, nai lo le faamoemoe atu i le Atua, ina ia tausia mai o ia e le Atua; 2) **ifo atu ia satani**—o lenei faaosoosoga e mo Iesu, ina ia faafaigofie lana tiute ua valaauina ai o ia, o loo agatonu lenei mea poo ai e te “tapuai” i ai ina ia ausia lou faamoemoe; 3) **oso mai lalo i le tumutumu o le malumalu i Ierusalem**a—o le faaosoosoga lenei o loo taupulea ai e Satani o le Atua, aemaise o le mana ma le pule lavea’i faaleAtua.

O le tala ia Iesu ma lona faaosoosoga o loo aumaia ai se ata o le taua faaleagaga e fetaia’i pea ma le fanau a le Atua. E matuā naunau lava Satani ina ia toilalo i tatou, ma ia faatoilaloina fo’i ma le Atua, aemaise Iesu ma lana talalelei. O le mea tãua ia aua ne’o galo e tatou, e pei fo’i ona aumaia e le tusi faitau o lenei aso, o Iesu na faatumuina o ia e le “Agaga Paia.” Ae, aua nei galo ia i tatou upu e lima e sili ona taua iinei: ‘Tumu i le Agaga Paia’. Ua ia te i tatou mea uma e tatou te manaomia e te tutu mausali ai ma tete’e atu i faaosoosoga a le ti’apolo.

Tatalo: Le Atua e, foi le loto tele e matou te pulato’a ai i faaosoosoga, ma ia iloa atu ai le mea lilo taufaasese a le ti’apolo. Ona o Iesu. **Amene!**

Aso Lua – Fepuari 4: “Ua teena Iesu” (*Jesus is rejected*)

Tusi Faitau – Luka 4:14-30

Matua – ff. 22e, 29: “*E le o le atalii ea lenei o Iosefa? ... ua latou tutū mai, ma tuli ia te ia i tua o le aai, ua ta’ita’i foi ia te ia i le tofē o le mauga ua tu ai la latou aai, ina ia latou faatito ifo ia te ia.*”

Ina ua mavae aso e fagafulu na faaosoosoina ai Iesu, na toe foi atu lava Iesu i lona aiga i Nasareta—o se “nofoaga saogalemu” o loo i ai ona tagata ma lona nuu sa malamalama i lona olaga tuputupu a’e. Peita’i, ua amata atu i totonu o lenei nofoaga le te’ena o Iesu. O i totonu o se nofoaga sa faapea e mapu ai ma maua ai sona toomaga, a ua sili ona i ai le feteena’iga ma le tutuli ia te ia i fafo. O le nuu atoa ua fememea’i ina ua fetalai atu Iesu, “*O le aso nei ua taunuu ai lenei Tusi, o outou o faalogologo ai*” (f. 21).

O nai fesili faatupu manatu: Afai e fesaga’i i tatou ma a’oa’oga a Iesu e le fialia i ai la tatou faalogo, e faapefea ona tatou tali atu i ai? E tatou te tete’e atu i ai? Pe tatou te talia ma mulimulita’i atu i ai?

Tatalo: Le Alii e, e faapefea ea ona ou tali atu ia te oe? Matou te tatalo ina ia e fesoasoani mai ina ne'i matou te'ena lau Afio. **Amene!**

Aso Lulu – Fepuari 5: “O le Paia To’atasi o le Atua” (Holy One of God)

Tusi Faitau – Luka 4:31-44

Matua – ff. 32, 36, 40: *“Ua matuā ofo i latou i lana a’oa’oga; auā o lana fetalai ua i ai le pule ... Ona ofo lea o i latou uma, ua fetautalatala’i foi, ua faapea ane, O le a ea lenei upu? Auā o le pule ma le mana ua fetalai atu ai o ia i agaga leaga, ona latou o ese lea i fafo ... O i latou uma sa i ai tagata e mama’i i ma’i eseese, ua latou aumaia i latou ia te ia i le goto o le la; ua pa’ipa’i tasi atu ona aao ia te i latou, ma faamalolo ia te i latou.”*

O le tagata sa i ai le agaga o le temoni leaga, ua alaga mai ia Iesu, “Ua ou iloa oe, o le Paia oe o le Atua”. Peita’i sa le’i finagalo Iesu, o temoni ma agaga leaga e latou te alagaina le molimau ia Iesu ma lona mamalu; na finagalo Iesu ia alaga mai e tagata o loo feola ma ē o loo vaavaai ma matamata mai ia te ia. Na finagalo Iesu ia iloa mai e tagata lona matagofie ma lona mamalu. Peita’i, e le’i faapea. Na muamua i loa e temoni ma agaga leaga le matagofie ma le mamalu o Iesu. Ua na’o Iesu e na te mafaia ona faasa’olotoina i tatou mai i tigā ma mafatiaga o loo tatou tauivi ai i lenei olaga. O le Paia To’atasi o le Atua, ua tuuina mai e tatou te mapu ma malolo ai i ma’i eseese uma o lenei olaga. Ua na’o ia lava.

Tatalo: Le Alii e, faafetai ona o lou alofa ia te i matou. Faafetai i lou mana lavea’i i totonu o matou ola. **Amene!**

Aso Tofi – Fepuari 6: “Valaauina o ulua’i soo”

Tusi Faitau – Luka 5:1-26 (Calling of the first disciples)

Matua – ff. 10e-11: *“Ona fetalai atu lea o Iesu ia Simona, Aua e te fefe, e amata i nei ona po ona e maua tagata. Ua tūta o latou vaa, ona latou tuu ai lea o mea uma, a e mulimuli atu ia te ia.”*

O le valaauina o ulua’i soo a Iesu, o le tofiga na faaee i tai o gataifale—o se nofoaga ua loa ma masani ai Simona ma Iakopo ma Ioane, auā o tagata faifaiva i latou. Ona fetalai atu lea o Iesu ia Simona, “Aua e te fefe, e amata i nei ona po ona e maua tagata.”

Atonu sa tele le fefe ma le mata’u ia Simona Peteru, peita’i o Iesu na oo lava ia te ia, atoa ma Iakopo ma Ioane, ina ia valaauina ma ia faia i latou ma tagata faifaiva i tagata o le Atua. O le valaau a Iesu o loo tatala pea i tagata uma. E ui na valaau patino e Iesu o ona ulua’i soo o le galuega, a e sa leai se agavaa tele i nei tagata faifaiva, ua na’o le tomai faifaiva ua ia te i latou. Peita’i, sa latou faalogo ia te ia, sa latou faatuatua ina fo’i o ia, ma sa latou tuua fo’i lo latou nofoaga masani a e savavali atu i le lē mailoa.

Tatalo: Le Alii e, aumaia le malosia ma le loto tele e matou te mulimuli ai ia te oe i soo se mea e te ta’ita’iina ai i matou. **Amene!**

Aso Faraile – Fepuari 7: “Alii o le Sapati” *(Lord of the Sabbath)*

Tusi Faitau – Luka 5:27—6:11

Matua – 6:1-2, 5 *“O le tasi sapati ua ui atu ai o ia i tosaito, ona ooti ai lea e ona soo o ‘au saito, ua mili ai i o latou lima, ma aai ai. Ona fai mai lea ia te i latou o isi o le au faresaio, Se a le mea tou te fai ai le mea e sa ona fai i le sapati ... Ua fetalai atu foi o ia ia te i latou, O le Atalii o le tagata, o le alii lea o le sapati.”*

O le tausia o le Sapati na afua mai i tulafono o le Tusi Paia, “Ia e manatua le aso sapati e te faapaiaina” – e pei lava ona malolo ai le Atua i le aso fitu i lana galuega uma na faia e ia (Esoto 20:8–11; Kenese 2:2–3). Ua silafia e le Atua le tãua o le malologa. E le’i faaleaogaina e Iesu o tusitusiga paia a le Feagaiga Tuai, a e sa ia faaaloalogia ma faaaogaina i le tele o ana fetalai. O le tali atu o Iesu i tuua’iga a le ‘au Faresaio, o loo faapea mai ai Iesu, ua latou faaopoopo ma faafanoina mea tuai, ma ua toetoe lava a lē iloa. O Ia, o Iesu, o le Alii o le Sapati, na afio mai i le tino, e toe faafo’i tagata uma i le ala sa’o. O le mataupu faavae o le Sapati a le Atua, e mo i tatou ina ia vaetofia se vaega o o tatou taimi e saoloto mai ai i mana’oga o galuega, ma tuu atu lena taimi e taula’i ma tapua’i atu ai i le Atua. O se taimi e olioli ai i ana faamanuiaga eseese.

Tatalo: Le Atua e, e naunauta’i lo’u loto ia te oe, ia le aunoa ona tapua’ia ma viia lau Afioa ona o au faamanuiaga. **Amene!**

Aso Toona’i – Fepuari 8: “Amata le malaga a le ‘au soo”

Tusi Faitau – Luka 6:12-36 *(The disciples’ journey begins)*

Matua – ff. 13, 17: *“Ua ao foi, ona valaau atu lea o ia i ona soo, ua filifilia e ia ni o latou e toasefulu ma le toalua, ua faaigoa foi i latou e ia o aposetolo ... Ua maliu ifo o ia faatasi ma i latou, ona tu lea o ia i le mea laugatasi, ma ona soo e toatele, ma le motu o tagata e toatele mai lutaia uma, ma Ierusalema, ma le itu i tai o Turo ma Saitonu, ua latou o mai e faalogologo ia te ia, ma ia faamaloloina o latou ma’i.”*

O le ā se manatu tãua na finagalo ai Iesu e a’oa’oina ai ona soo? Ua silasila atu o ia i le ‘au soo uma ma le motu o tagata toatele, ma faapea atu: Amuia outou! Auā e o outou le malo o le Atua! O le a faamalieleina outou! O le a e ata! O le a teena outou; o le a tauia fo’i outou! Alofa ia i latou ua fai outou ma o latou fili; ia alofa mutimutivale auā e alofa mutimutivale le Atua.

O le avea ma soo e amata atu i aao o Iesu – o lou filifili e faaavanoa lou taimi i aso taitasi e faatasi ai ma Iesu, e a’oa’oina mai ai ia te Ia, ma mulimuli i ana a’oa’oga ma le faamoemoe e avea atili faapei o Ia. Na fetalai Iesu, Afai tou te taofimau i la’u aoaoga, o o’u soo moni outou (Ioane 8:31).

Tatalo: Faafetai Iesu, auā ua mafai ona avea a’u ma ou soo. Faafetai ona o oe o le upu moni, ua ou sa’oloto ai e faapei o oe lava. **Amene!**

O LE EVAGELIA A LUKA (1) – THE GOSPEL OF LUKE (1)

2. Taliaina o le Upu (*Receiving the Word*)

Aso Sā – Fepuari 9: “Ia faia e pei ona ou faia, a e le pei ona ou fai atu ai!”

Tusi Faitau – Luka 6:37-49 (*Do as I do, not as I say!*)

Matua – f. 46: “*Se a ea le mea e ta’ua ai a’u e outou, Le Alii, le Alii, a e tou te le faia mea ou te fai atu ai?*”

I le olaga tuputupu a’e, talitonu ua masani ona faalogo i nisi e matutua ona faapea mai, **“Fai le mea ou te fai atu ai, a e aua le faia le mea lea ou te faia!”** O le tasi nei o fuaitauga e sili ona pepelo ma le faafiaamiotonu. O le fuaitauga filifilia o lenei Aso Sā, o le fesili tuusa’o a Iesu, o loo faapea ona tuuina mai, e tatou te mafaufau loloto ma manatunatu atili i ai, e tusa ma lo tatou soifua faaKerisiano. Aiseā tou te ta’ua ai a’u, “Le Alii, le Alii”, a e tou te lē faia mea ou te fai atu ai?

Soo se Kerisiano moni, e avea pea lona olaga taumafai, e fai ma sui va’aia o le Atua ma lona malo o le lagi. E na te taumafai i mea uma na te faia, e faaali le alofa tunoa, faamagalo atu i tagata, ma agalelei atu i o latou tuaoi, ina ia fai ma faata’ita’iga lelei mo nisi. O se tasi o faia’oga sa sili ona uigā ma aanoa lana savali ma lana tautala, o lo tatou Alii o Iesu. Na mulimuli tagata ia te Iesu auā sa ia olaina le mea na ia tala’i ma tautala atu i ai, sa iloa foi e tagata lona lelei.

Tatalo: Le Alii e, fesoasoani ia ou faaalua lou agalelei atoatoa e aunoa ma se faafiaamiotonu i luma o tagata. **Amene!**

Aso Gafua – Fepuari 10: “Fetalai mai le upu” (*Say the word*)

Tusi Faitau – Luka 7:1-17

Matua – f. 7: “*O lea foi na ou manatu ai ou te le aoga ona ou alu atu ia te oe. A ia oo mai sau fetalai, e faamaloloina ai la’u auauna.*”

Na faalogo le ta’ita’i o le to’aselau ia Iesu ma lana mana e faamalolo ma’i. Peita’i, ua faatoga atu le ta’ita’i o le to’aselau ia Iesu, e lē aoga a’u ona e ulu mai ai i lo’u fale, o lea tau ina ia oo mai sau fetalai, e faamaloloina ai la’u auauna. Ona tali fetalai atu lea o Iesu, “Ou te le’i iloa ia Isaraelu lava se faatuatua e faapena ona tele.” O le faatuatua a le ta’ita’i o le to’aselau ua malolo ai lana auauna. Sa le’i masalosalo i le mana faamalolo a Iesu, ae sa ia talitonu ma le faamaoni, ua na’o le fetalai a Iesu e malolo ai lana auauna. O le faamanatu mo i tatou, o le faatuatua e siitia ai mauga tetele.

Tatalo: Le Alii, faafetai ona o lou mana lavea’i i o matou ola, o loo matou maua ai le malologa filemu ona o mea fitā o le olaga. **Amene!**

Aso Lua – Fepuari 11: “O le faatuatua ma le masalosalo a laone le Papatiso”

Tusi Faitau – Luka 7:18-35 (*John the Baptist’s faith and doubt*)

Matua – f. 20: “*Ua o mai ia taga ia te ia, ua faapea mai, Ua aauina mai i maua e loane le papatiso ia te oe, ua fai mai, Po o oe ea lē maliu mai, pe matou te faatali atu i se tasi?*”

O lo ua feagai nei Ioane le Papatisa ma se tulaga faigatā, ina ua ia fesiligia poo Iesu moni o le Mesia. O Ioane na faafalepuipuiina ona o lana tautala atu ma le le fefe i le mea moni sa ia iloa. Peita'i, ua tautala atu nei o ia ma le lē mautonu ma le loto masalosalo.

Nai lo le faitioina o ia, ua viia nei e Iesu le tautinoga lē maluelue a Ioane i luma o le Atua, e tusa lava pe feagai ma masalosologa. O Ioane o se molimau faamaoni o loo finagalo i ai le Atua e savavali ai lana fanau faatuatua. Faapei o Ioane, ua faatonuina i tatou ina ia faatuatua i le Atua, ma ia onosa'ia le faatuatua e tusa ma le taimi o le Atua! O iina, e mafai ai ona tatou ola faamaoni i lo tatou faamoemoega, ma teuteuina le ala mo Keriso e tusa ma lana upu ma a'oa'oga uma ua tuuina mai mo i tatou.

Tatalo: Le Alii e, ia faatumuina i matou i lou agalelei ma le faamoemoe e faataunuina e le Atua ana fuafuaga uma. **Amene!**

Aso Lulu – Fepuari 12 : “Faauuina e se fafine agasala”

Tusi Faitau – Luka 7:36-50 (*Anointed by a sinful woman*)

Matua – f. 38: *“Ua tu foi o ia i tua i ona vae, ua tagi, ua faasisina ifo e ia loimata i ona vae, ua sōloi ai i lona lava lauulu, ua sogi foi i ona vae, ma faauuina i le suāuu manogi.”*

O le tala a Luka i le faauuina o Iesu e se fafine agasala, o se tala e tulaga ese mai i le tala a Mareko (14:3-9), Mataio (26:6-13), ma Ioane (12:1-8). O le tala a Luka o loo faatusatusa ai e ia le fafine agasala ma le tagata e igoa ia Simona, le Faresaio. O loo ta'ua ai fo'i e Iesu se faata'oto i ni tagata se to'alua na nonō tupe i le tagata e toatasi. O se ata manino o loo faatusatusa ai e Iesu le tagata ua tele i ai le alofa o le Atua. E lauiluga le tusitusiga a Luka i le faatāuaina o tagata mama'i ma tagata agasala. E faapito lava le silasila a Luka i le Alofa tunoa o le Atua mo lana fanau faatautavaa ma le taualoaina. Faapei ona manino mai i le tala i lenei fafine agasala, e le faatua'ogia le alofa o le Atua; ua tele lava mo ē ua salamo moni ma fo'i atu i le Atua.

Tatalo: Le Alii e, faafetai mo lou alofa faaalua ma le faamagaloina o agasala, e ala i le maliu o Iesu. Ia le aunoa ona matou viia lau Afio. **Amene!**

Aso Tofi – Fepuari 13: “Faataoto i lē lulu saito” (Sower’s parable)

Tusi Faitau – Luka 8:1-21

Matua – f. 18: *“O lenei, ia outou, pe faapefea lo outou faalogo; auā o se ua i ai mea, e fofaiina mai ia te ia; a o se ua le i ai mea, e aveeseina ia te ia o mea ua peiseai ua ia te ia.”*

O le mea e mata'ina ai lenei tala, o le fesili atu o le 'au soo ia Iesu, poo le a tonu le uiga o lana faataoto. E le gata ina ua latou faamauualaloina o i latou lava i luma o le motu o tagata, ia latou seleseleina ai le aoga o le lesona o le faataoto, a e o le lesona lava ia e faatatau mo ē taliaina ma ia suia ai. Na faamatala e Iesu, e na te le'i faataatia manino atu le faata'oto ina ia malamalama ai tagata uma. O le lapata'iga a Iesu ina ia mafau fau lelei pe

faapefea ona e faalogo; ua faaaautū ai le tāua o le faalogo ma le loto matala e lagona ai le afioga a le Atua.

Tatalo: Le Alii e, fesoasoani ia ou maua le lotomaulalo, e fesili ai mo se fesoasoani i mea e le malamalama ai i lau afioga. **Amene!**

Aso Faraile – Fepuari 14: “O le tau o le liua faaleagaga”

Tusi Faitau – Luka 8:22-39 *(The cost of spiritual transformation)*

Matua – f. 35: *“Ona latou o mai lea e matamata i le mea ua faia; ua o mai ia Iesu, ua latou iloa atu le tagata ua o i fafo ia te ia temoni, o loo nofo o ia i vae o Iesu; ua ofu ia, ma ua atamai; ona latou matatau ai lea.”*

O le tau o le mana liua a Iesu o loo faaali manino i le taimi na faamalolo ai le tagata ua uluitino e temoni. Na faamuamua lava e Iesu le ola o le tagata nai lo le tau o puaa na tulia ai temoni e latou te ulufia. O se ata manino fo’i lea i le finagalo o le Atua e tusa ma oloa a lenei lalolagi. E faasilisili lava e le Atua le agaga o se to’atasi nai lo le lafu manu o loo tausia ai le ola a le tagata. Ia faapea fo’i ona tatou faia i lenei olaga ua tatou i ai nei. Ia faamuamua lava ona tatou maua le liua faaleagaga, e ala i le mana liua a Iesu, ona lona lua ai lea o oloa ma mea faamalie loto o lenei lalolagi.

Tatalo: Le Alii e, ua matou sauni e totogi le tau e mulimuli atu ai ia te oe, faapei o le togiola silisili na faia e Iesu i luga o le satauro. **Amene!**

Aso Toona’i – Fepuari 15: “O le mana fesoota’i o tagata”

Tusi Faitau – Luka 8:40-56 *(The power of human connection)*

Matua – ff. 44-45: *“Ua alu ane ia i ona tua, ma pa’i ane i le tuupao o lona ofu; ona utu loa lea o lona puna toto. Ona fetalai lea o Iesu, O ai ea na na pa’i mai ia te au? Ua faafiti mai tagata uma, ona fai mai lea o Peteru ma i latou sa faatasi ma ia, Le Alii e, ua fetaomi ma fetuleni mai le motu o tagata ia te oe!”*

O le ogatotonugalemu o tagata, o fesoota’iga lea ma isi tagata. O lenei fuaitauga e mafai ona ta’ita’ia tatou i se fa’amatalaga faigofie, e mana’omia e tagata ona papa’i atu i le isi tagata e fa’amalolo ai, ma e le mafai ona faia to’atasi se faamalologa. Na iloa lelei e le fafine puna toto, o le a malolo lona ma’i pe a papa’i atu ia Iesu. O lenei fuaiupu o loo aumaia ai se faataitaiga loloto o le upu moni a Iesu ma lona natura faaletagata.

Tatalo: Le Atua e, faafetai mo lou auina mai o Iesu mo i matou ina ia matou fesoota’i atu ai faaletagata. **Amene!**

OLA FAATASI MA TAGATA ROMA – LIVING WITH THE ROMANS

1. I le Vaitaimi o Iesu (At the Time of Jesus)

Aso Sā – Fepuari 16: “Le malosi o loo i ai” (The powers that be)

Tusi Faitau – Luka 2:1-7

Matua – f. 1: *“O aso lava ia na oo mai ai le poloaiga a Kaisara Aokuso ia tusia uma ai le lalolagi.”*

I le vaitaimi na soifua mai ai le Keriso i le lalolagi, o Roma sa pulea atoa le nuu o tagata lutaia. I soo se malo tele ma ona faiga, e mana'omia le tausia lelei o a latou fa'amaumauga ma le tusiga igoa, aemaise lava pe a aoina ma faamaumau lafoga a tagata. O le tusi faitau o lenei aso, o loo amata i se ata malosi ma le mamalu: Kaisara Aokuso ma le malo tele o Roma. Peita'i, na faafuase'i lava ona taula'i atu le tala i se ulugalii faatauva: o Maria ma Iosefa. ua ma'itaga Maria ma ua fanau mai i se tulaga e sili ona le taualoa ma le le amana'iaina.

O matai emeperoa o ni tagata nuuese, e lei fo'i so latou amana'iaina o tusitusiga paia a lutaia; peita'i o le taupulega a Roma ma le malosi o loo i ai i na ona po, ua faataunuaina ai e le Atua le valoaga e uiga i le Mesia: o le tamameamea e fanau mai o ia i Peteleema. E pulea e Roma le malosi faalelalolagi anamua, a e o loo sili atu le mana o le Atua i mea tetele ma mea faatauva. E peisea'i ua faaogā e le Atua le mea malosi ua manatu Roma o lo latou lava malosi faaalua, a ua saunia ai le faailoga o Iesu le Mesia ua leva ona faatalitali ai tagata lutaia.

Tatalo: Le Atua mamana e, matou te viia lau afio auā o oe o le ta'ita'i 'au o mea uma lava. **Amene!**

Aso Gafua – Fepuari 17: “O le maila faasili” (*The extra mile*)

Tusi Faitau – Mataio 5:38-42

Matua – f. 41: *“Ai se na te tauanau mai lua te o ma ia i le maila e tasi, ina o ia oulua ma ia i maila e lua.”*

O le maila faasili, o le filosofia faalesu e talifaitau ai faiga le talafeagai o loo aafia ai le nuu o tagata lutaia, o loo taotaomia ona o pulega a Roma. A tauanau mai lua te o ma ia i le maila e tasi, ina o ia oulua ma ia i maila e lua. O le maila faasili, o lou naunau atu lea ina ia 'aue ne'i gata ai i le mea ua faatulagaina mai, a ia e faia i ai se faasiliga. O le a'oa'oga faalesu, e lei se tua'oi o mea lelei e te faia mo lou uso a tua'oi.

Tatalo: Le Alii e, foa'i mai lou alofa tunoa ma le malosi e matou te naunau atu ai i le maila faasili i lenei olaga. **Amene!**

Aso Lua – Fepuari 18: “Ua malamalama le tagata mai fafo”

Tusi Faitau – Mataio 8:5-13 (*The outsider understands*)

Matua – f. 11: *“Ou te fai atu foi ia te outou, e toatele e o mai mai sasae ma sisifo, e taoto e aai faatasi ma Aperaamo, ma Isaako, ma Iakopo i le malo o le lagi.”*

O le tusi faitau o lenei aso, ua aumaia ai se tagata e lē gata o ia o se ta'ita'i o le to'aselau, a o se tagatanuu o Roma; o loo i ai se pule ia te ia ma e i ai fo'i ma se tiute tauave mo le faamalosi o tulafono a Roma. Peita'i ane, o loo i ai fo'i ma le alofa mutimutivale ia te ia, ina ua mana'o e faamālōlōina lana auauna ua tigaina i le ma'i supa. O loo ia te ia fo'i le tofā mamao, ua ia faaalua ai le faaloalo ia Iesu. Ona o aga na faaalua e lenei ta'ita'i o le to'aselau ia Iesu, o lea na faapea ai loa upu a le Alii, “e to'atele e o mai mai sasa'e ma sisifo, e

taoto e aai faatasi ma Aperamo, ma Isaako, ma Iakopo i le malo o le lagi.”
Ua ta’u mai e Iesu i nei upu, o loo i ai le malamalama i le tagata mai fafo, e tusa ma le manuia o le Atua.

Tatalo: Le Alii e, faafetai ua e valaaulia i matou i lou tausamiga i le malo o i le lagi. **Amene!**

Aso Lulu – Fepuari 19: “Lafoga pe lē lafoga” (Tax or no tax)

Tusi Faitau – Mareko 12:13-17

Matua – f. 17: *“Ona tali atu lea o Iesu ia te i latou, Ina avatu ia o mea a Kaisara ia Kaisara; ia avatu foi mea a le Atua i le Atua. Ona latou ofo ai lea ia te ia.”*

O le fesili taufaasufi a nisi o le au faresaio ma le au Herotiano, na latou fesiligia ai Iesu i tulaga o lafoga ia Kaisara, pe ua tataua ea ona avatu pe leai? Peita’i, o lenei fesili sa leai sona tāua i le feau a Keriso, aemaise o le finagalo o le Atua. O le faatusa a le emeperoa o Roma sa i luga o le tupe na uuina e Iesu, o loo ta’ua ai le pule faalelalolagi o Kaisara ma mea na ia mana’omia mai i ona tagatānuu. A o le galuega tala’i a Keriso ma le finagalo moni o le Atua o loo taoto i tua atu, a e le o oloa ma tupe a lenei lalolagi. O le a le faatusa a le Atua na tuuina i le lalolagi? O le tali, o le **“tagata”** – auā na faia i tatou i lona lava faatusa. O le faamuamua lea a le Alii. E le o tupe, a o le ola a le tagata ia taula’i ma faamoemoe atu i le Atua.

Tatalo: Le Atua e, ia taula’i o matou loto i mea tāua ia te oe. **Amene!**

Aso Tofi – Fepuari 20: “Ua talitonu le tagata mai fafo”

Tusi Faitau – Mareko 15:37-39 (The outsider believes)

Matua – f. 39e: *“E moni, o se alo o le Atua lenei tagata.”*

O le ta’ita’i o le to’aselau, atonu na ia molimauina le toatele o tagata na maliliu i lalo o le pule a Roma. Na tu o ia i luma o Iesu, a o lona maliu na matuā aafia ai o ia; na ia faapea atu ai, *“E moni, o se alo o le Atua lenei tagata.”* Sa to’atele tagata lutaia na fai ma soo o Iesu; peita’i o le tagata Roma na mua’i faaalila le faatuatua, ina ua molimauina o ia le maliu o Iesu i luga o le satauro. Atonu ua fai le molimau a lenei ta’ita’i Roma ma faata’ita’iga lelei, o se tagata mai fafo ua talitonuina, o Iesu o le alo o le Atua. Manatu o se faamantu fo’i lea mo i tatou, ina ia tatou toe mafaufau pe faapefea le itu aso na e talitonuina ai, o Iesu o le alo moni o le Atua.

Tatalo: Iesu e, ou te fia iloa atu lou mana faaleAtua, ia ou mataala fo’i i lou mana lavea’i mai. **Amene!**

Aso Faraile – Fepuari 21: “O le taofiofia o tagata Roma”

Tusi Faitau – Ioane 11:45-53 (Keeping the Romans at bay)

Matua – f. 50: *“Tou te le mafaufau foi, e aoga ia te i tatou ona oti o le tagata e toatasi mo le nuu, ia le fano foi le nuu uma lava.”*

Ina ua tupu tele le mana o Iesu i totonu o lutaia, ua fefefe ai le au ositaulaga ma le au faresaio, ina ne’i aveesea o lo latou ‘mamalu’ ma o latou

tofiga, aemaise o le faamalumalu mai o le taupulega a Roma. Ona faailoa mai lea e Kaiafa se faiga faapolokiki leaga, e aveesea ai Iesu ma ia taofitaofi ai le faaumatia o i latou e ta'ita'i a Roma. O lea na faapea ai Kaiafa le ositaulaga sili, *“e aoga ia te i tatou ona oti o le tagata e to'atasi mo le nuu, ia le fano fo'i le nuu uma lava.”*

O manatunatuga ia faaletagata o loo filogia ai pea lagona ma manatu o nisi o faapotopotoga, aemaise o faiga malo; ia fano le to'atasi, a e faasaoina le to'atele. O se fesili e lu'i tau ai lo tatou matāupu o lenei aso, o le a se mea o loo tatou manana'o ai mo Iesu, faapei ona faia e le au ositaulaga ma faresaio i aso anamua? Ua tatou manana'o ea e maliu fua o ia? Pe ua tatou manatu loloto ia i lona faalavaau mai i luga o le satauro?

Tatalo: Le Alii e, fesoasoani mai i o'u vaivaiga ma manatu faatauva'a e le tusa ai ma lou finagalo. **Amene!**

Aso Toona'i – Fepuari 22: “Ua tetemū Ierusalemā”

Tusi Faitau – Luka 21:20-24 (*Jerusalem trampled*)

Matua – f. 20: *“A iloa e outou ua siosiomia Ierusalemā i 'au o le taua, ia outou iloa i lea aso ua latalata lona faatafunaina.”*

O le tusi faitau o lenei aso, o loo faamatala ai e Luka le vavaloina e Iesu le faatafunaina o le malumalu i Ierusalemā. Fai mai Luka, e si'osi'omia Ierusalemā e fitafita a Roma, ma ua iloa ai le aso e pa'u ai Ierusalemā. O le tala a Luka e tulaga ese mai i isi tusitusiga e uiga i le faatafunaina o le malumalu i Ierusalemā. O Luka ua na iloa atu le mea sa le'i iloa atu e nisi o le 'au FaiEvagelia, e le o se i'uga o le lalolagi le faatafunaina o Ierusalemā. A ua tatala atu e Luka i tua le faaumiumi o le valo'aga a Iesu e uiga i aso e gata ai. Ua manatu Luka, o le finagalo ma le fe'au o le Atua, e ao ona soo ai tulu'iga uma o le lalolagi. E ui la ona tutupu pea taua ma le feitaga'i i nei ona po, a o loo maua luga pea le alofa o le Atua i lana foafoaga.

Tatalo: Le Atua, ia e alofa ma foa'i maia lou afioga ma le poto matou te filifili tonu ai i lenei olaga, a o matou maua pea lou alofa tunoa. **Amene!**

OLA FAATASI MA TAGATA ROMA – LIVING WITH THE ROMANS

2. O le Ulua'i Ekalesia (*In the Early Church*)

Aso Sā – Fepuari 23: “Konelio ... se tagata amioatua ma le mata'u i le Atua”

Tusi Faitau – Galuega 10:1-24 (*Cornelius... a devout man who feared God*)

Matua – ff. 1-2: *“Sa i Kaisareia le tasi tagata o Konelio le igoa, o le ta'ita'i o le toaselau i le 'au e igoa o le 'au a Italia; o le tagata amio Atua, ma le mata'u i le Atua, atoa ma lona aiga uma, o lē avatu mea alofa e tele i le nuu, ma ua tatalo i le Atua e le aunoa.”*

O le amataga lea o se suiga tele i le tala faa-Kerisiano, ina ua amata ona folafolaina atu le talalelei ia i latou o loo i fafo atu o le nuu o Iutaia, ma ua

taliaina ai nuu ese i totonu o le Ekalesia tauafuafua a Keriso. O tusitusiga a Luka (e aofia ai ma le tusi o Galuega), o loo faaautū tonu i le malo tele o Roma, mai Ierusalem se'ia pa'ia Roma. Na te faamatalaina le tala ia Iesu ma le faaeteete, aemaise ia auiliili lona faamatalaga.

O Konelio o se tagata tāua tele ia Luka ma lona faamatalaga, auā ua ta'ua ai le tusi faitau lana vaega'au ma le nofoaga i Kaisareia o loo galue ai mo le tautuaina o le faiga malo a Roma. O le ta'ita'i'au o le to'aselau, na pule ai fo'i o ia i le to'atele o tagata. E ui o se tagata o nuu ese o loo tautua mo le malo o Roma, peita'i o Konelia na tapua'i atu i le Atua o tagata lutaia, ma sa ia matuā faamaoni ai lava. O lana faamoni, ua manatu alofa i ai le Atua e papatiso o ia, atoa ma lona aiga. Ua avefa nei Konelio ma faailoga, o le ulua'i tagata o nuu ese ua faaekalesiaina i le Ekalesia a Keriso.

Tatalo: Le Alii e, faafetai ona o lou tofā mamao ua matou maua ai nei le talalelei; lenei ua matou 'ae'ae ai i au faamanuiaga e tele. **Amene!**

Aso Gafua – Fepuari 24: “E lē faailoga tagata le Atua”

Tusi Faitau – Galuega 10:25-48 *(God has no favorites)*

Matua – ff. 34e-35: *“E moni, ua ou iloa e le faailogaina tagata e le Atua; a e peitai o le mata'u ia te ia i nuu uma lava, ma fai le amiotonu, ua talia i latou e ia.”*

O le tusi faitau o lenei aso, ua iloa manino ai e Peteru le telē o le alofa o le Atua mo le lalolagi—“E lē faailoga tagata le Atua.” A o le mea e sili, o le ola matata'u o tagata ia te ia, ma fai le amiotonu, ona talia ai lea o i latou e le Atua. E matuā telē se a'oa'oga o lenei tala mo i tatou i nei ona po; auā ua tele lava le faailogalanu o tagata, poo ai latou te fiefia i ai, a o ai fo'i e le fiefia i ai. E avefa pea mea tutupu o le olaga tatou te faitau sesēina ai nisi o tatou tua'oi. Peita'i, o se faafitāuli fo'i lea na oo ia Peteru ma nisi o le 'au soo. Ua faailoa e le Atua le mea moni ia Peteru, lenei ua finau Peteru ina ia papatisoina tagata o nuuese ua talitonu ma matata'u i le Atua soifua.

Tatalo: Le Alii e, faailoa mai o matou ala pe afai ua faailogalau i matou i o matou lava manatu faasausili. **Amene!**

Aso Lua – Fepuari 25: “Tuu lemu atu nei ea i ma'ua i tua? Aua lava!”

Tusi Faitau – Galuega 16:19-39 *(Sneak us out by the back door? Oh no!)*

Matua – ff. 37, 39a: *“A ua fai atu Paulo ia te i latou, Ua sasa mai i latou ia te i ma'u nei i luma o le nuu a o lei faasalaina, o i ma'ua o tagata Roma, ona latou tuu mai lea ia i ma'ua i le fale puipui; latou te tuu lemu atu nei ea ia te i ma'ua? Aua lava; a o i latou, se'i o mai lava i latou e avatu ia te i ma'ua i fafo ... Ona o mai lea o i latou, ma ole mai ia te i laua.”*

Ina ua finagalo aauina mai e faamasino o leoleo ina ia tuu atu lemu i tua o Paulo ma Sila mai le fale puipui sa noanoatia ai i la'ua, ua manatu Paulo, ua lē amiotonu lenei faiga; auā sa latou sasa ma faalumaina o i la'ua i luma o le nu'u, a o lenei ua faalilolilo ma tau faate'a lemu atu i la'u i tua fale. O le taofi

a le tusitala o Luka e tusa ma lenei tala, o le faaKerisiano o loo ta'ita'ia e tagata amiotonu faapei o Paulo. O le fe'au lea o loo tau faama'ite mai e lenei tala, e tusa ma le faafalepuipuiina o Paulo ma Sila, e aunoa ma se sala.

Tatalo: Le Alii e, matou te tatalo mo fale faamasinoga ina ia tonu ma sa'o a latou fuafuaga faatatau, a e le'o le faafiaamiotonu. **Amene!**

Aso Lulu – Fepuari 26: “O loo tu nei a’u i luma o le faamasnioga o Kaisara”

Tusi Faitau – Galuega 25:1-12 *(I am appealing to the emperor’s tribunal)*

Matua – ff. 9-10: *“A o Feso, ua loto o ia e faafiafia atu i tagata lutaia, ua fai mai ai o ia ia Paulo, Ua e loto ea ina e alu ae i Ierusalema, ia faamasinoina ai oe i nei mea i o’u luma? Ona fai atu lea o Paulo, O loo tu nei a’u i luma o le nofoa faamasino o Kaisara, e tataua ona faamasinoina ai o a’u; ua ou le faia lava se mea le tonu ia lutaia, ua e matua silafia lava.”*

O le faamoemoe atoa a Luka mo le tusi o Galuega a le Au Aposetolo, o le faailoa atu le tuua'ia e lutaia le au Kerisiano i le solia o latou tulafono; a e peita'i e amiotonu lava le Kerisiano i a latou faamasinoga uma. Ua tetele le au lutaia i le faatuatuaga ia Iesu. Ua faamanino mai e Luka, o le au lutaia, latou taumafai e faatalitonuina le taupulega a Roma, ina ia faalilolilo a latou mea faaletonu; aemaise o le tufamaiga e tineia le faatuatua ia Iesu. O lenei, ua iloa e Paulo e le mafai ona tonu lona faamasinoga i totonu o Ierusalema, ua ala ai ona ia talosaga e ave o ia i Roma; o lana aiā tataua fo'i lea auā o se tagatānuu o Roma le aposetolo.

Atonu, o loo faamanatu mai e lenei tala le tau afuafuaga o le amataga o le faaKerisiano. Sa fetaia'i pea ma faiga faapolokiki leaga a ta'ita'i ma alii ma faipule, o nuu ma itumalo, a e le gata ai lea o faiga malo tetele. Ua toe fafanu mai e lenei tala le tūa o lo ta tiute, e fai ai tatou ma tagata amiotonu e tusa lava pe faaletonu le faiga o taupulega a nuu ma faiga malo. Auā o lo tatou malo sili, o le malo tumau o le Atua o i le lagi.

Tatalo: Le Atua e, tatalo mo faiga malo uma o le lalolagi; ia oo mai lou malo filemu e sa'oloto ou tagata uma e viia ma ta'uta'u lau Afio. **Amene!**

Aso Tofi – Fep. 27: “Le isi kovana ua manatu i mea e le au i ai lona malosi”

Tusi Faitau – Galuega 25:13—26:1 *(Another governor out of his depth)*

Matua – f. 27: *“Auā o lo'u manatu e le tusa ona momoli atu o se tagata o fusifusia, a e le faailoa atu o mea ua molia ai o ia.”*

O loo faaauau pea le faamasinoina o Paulo, e tusa ma finauga o loo tuua'ia ai e ta'ita'i o le lotu lutaia, e pei ona faasolo ai lo tatou faitauga o lenei vaiaso. Ua tatou faitau i lenei aso i upu a le kovana o Feso, lea ua fai upu o le matua. Ua fetosoa'ina lagona a Feso, auā e fā'i o le tau faafiafiaina o tagata lutaia na tofia ai o ia e na te pulea, a e faigatā fo'i lona tiute tauave i le aiā tataua o tagatanuu o Roma, faapei ona puipuia ai le aposetolo o Paulo. Ua manino i lenei tala le lagona o Feso, o le mataupu ia Paulo e loloto ma e le au tele i ai sona iloa; ma valaau atu ai i le tupu lutaia o Akeripa II, ma lona tuafafine o

Perenike, mo se fautuaga ona o i la'ua o ni leo tāua i Iutaia. Na latou malilie faatasi ma Feso e uiga i le amiotonu o Paulo (26:32). Ua faamaonia e lenei tala le faatuatuga o Paulo ia Roma nai lo Ieruselema. O lenei lalolagi, e iai lava mea pi'opi'o ma mea faaletonu i le olaga. Peita'i o loo faaalua e Luka i lenei tala le ta'ita'iga mana a le Atua i ana 'au'auna e faailoa ai mea sese ma mea faaletonu. Ma, e lē tuulafoa'ina lava e le Atua o ana 'au'auna o le talalelei.

Tatalo: Le Atua e, tatalo mo lou faamasinoga tonu i luga o le lalolagi atoa; ia manuia au auauna uma o le talalelei e tusa ma lou alofa. **Amene!**

Aso Faraile – Fepuari 28: “Mata’u i le Atua. Ava i le tupu.”

Tusi Faitau – 1 Peteru 2:13-17 (*Fear God. Honor the emperor.*)

Matua – ff. 13, 17: *“Ia outou ava i tagata uma; ia alolofa atu i le au uso; ia matatau i le Atua; ia ava i le tupu.”*

O le tusi lenei a Peteru o loo tusia mo Kerisiano o nuuese, peita'i o loo ta'ua i latou e le tusitala i tuutuuga tāua o le Feagaiga Tuai, o le mamalu na tuuina atu i le fanauga a Isaraelu i le Esoto 19:6, “A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai e le Atua” (1 Peteru 2:9). Na ia ta'ua fo'i, ua nonofo faatasi i latou ma tagata o nuuese (2:12), e foliga mai ua lē toe nuuese i latou, a ua i ai faatasi o le li'o o le nuu pa'ia a le Atua ma tupulaga ua filifilia. Ua valaauina i latou mai le pouliuli i lona malamalama ofoofogia. O le mea lea, ia outou matata'u i le Atua; ia ava i le tupu.

Tatalo: Le Atua e, faafetai i lou filifilia o i matou e fai ma ou nuu pa'ia. Matou tatalo mo lou alofa ma le filemu i totonu o faiga malo. **Amene!**

Aso Toona'i – Mati 1: “O ē faatautee i le pule, ua faatautee i le mea ua faatuina e le Atua” (*Whoever resists authority resists what God has appointed*)

Tusi Faitau – Roma 13:1-7

Matua – ff. 1e, 7: *“Auā e leai se pule pe a le mai le Atua; o pule uma lava o loo fai nei, ua faatuina e le Atua ... O lenei, ia avatu i tagata uma lava a latou mea; o le lafoga i e ua tatau i ai le lagofa; o le tiute i e ua tatai ai le tiute; o le mata'u i e ua tatau i ai le mata'u; o le faaaloalo i e ua tatau i ai le faaaloalo.”*

E pei o malo lelei uma, o le malo o Roma e latalata ona mata ma taliga i mea o loo tutupu i totonu o lana faiga malo, aemaise o i totonu lava o lana taulaga. O Paulo, e pei o Iesu (Ioane 19:11), sa lagolagoina le manatu faa-lutaia e faapea, o e leai se pule pe a le mai le Atua, o pule uma lava o loo fai nei, ua faatuina e le Atua. Peita'i, e le'i apoapoa'i atu le Aposetolo, e tatau ona usita'ia tagta ofisa i lalo o tulaga uma. E tutusa le faitioga o le pule ma le tetee o le pule. Auā, o le faitioga o loo naunau i le faaleleia, a o le tetee o le lē taliaina lea o le pule. Ioe, o le faatautee i le pule, ua e faatautee fo'i i le mea ua faatuina e le Atua.

Tatalo: Le Atua e, tatalo mo faiga malo o loo pulea e le amioletonu ma le faatogafalea, ia faatuina e lau afio lou malo tumau. **Amene!**

OLA FAATASI MA TAGATA ROMA – LIVING WITH THE ROMANS

3. Pilato ma ana fitafita (*Pilate and his soldiers*)

Aso Sā – Mati 2: “O Iesu le Ala, Upu moni ma le Ola!”

Tusi Faitau – Ioane 18: 28-40 (*Jesus, the way, the truth and the life!*)

Matua – f. 38: “*Ua fai mai Pilato ia te ia, “Po o le a le upu moni? Ua fai mai lea upu, ona toe alu lea o ia i fafo ia lutaia, ua fai atu fo’i ia te i latou, “Ou te le iloa se mea e sala ai o ia.”*”

O le molimau a Ioane i le galuega a Iesu, o loo manino ai le tulaga Atua o Iesu ma lona tulaga tagata. O le fesili a Pilato na fesiligia ai Iesu, i taimi o le luluti o ona tiga. Ua atagia mai i upu o le matua, le tagata lē malamalama iā Iesu, ona o lona fia iloa o le mea moni. O le naunauta’iga o Pilato, ina ia faigofie ai ona faia lana faai’uga i le molia ai o Iesu e tagata lutaia. Lea na faapea ai lana fesili ia Iesu, “**Po o le a le upu moni?**” Iesu na ia maua le loto tele ma le loto maulalo, na ia tali sa’o ai ina ua fesiligia e Pilato. O lona loto ua mausali i lona Tamā e na te faia le mea sili mo ia pe a mavae ona tigā.

Iesu o le Ala, Upu moni ma le Ola. O le autu o lenei aso ma le faitauga Tusi a le ekalesia aoao. O upu o loo tuvaio ai faamaumauga a le fai Evagelia i le galuega a Iesu. O le faamoemoe lea o lona afio mai i le lalolagi, ia momolina le finagalo alofa o lona Tamā, e ala i le faaolataga.

Tatalo: Le Alii e, foa’i mai le lototele ina ia mafai ai ona matou tautatala i le mea moni ua e finagalo ai. **Amene!**

Aso Gafua – Mati 3: “O le Upu moni e faavavau” (*Truth is eternal*)

Tusi Faitau – Ioane 19: 1-16a

Matua – f. 11: “*E leai sau pule ia te a’u, ana le tuuina mai ia te oe mai lugā; o le mea lea e tele ai le leaga o lē na tuuina mai a’u ia te oe.”*”

O le tali a Iesu ia Pilato, na ia faailoa ai o le Atua e pule aoao i mea uma. Ina ua tulai Iesu i luma o Pilato, na fesiligia ai le tulaga tupu o Iesu Keriso. O le fesili e tofotofo ai e le tagata le pule silisiliese a le Atua i le lalolagi. O le auina mai o Iesu e le Atua, na i ai fo’i le pule ia te ia le pule e faia ai soo se mea. Peita’i, e le’o manino ma malamalama i ai le tupu o Pilato. Ua ia manatu i ona tulaga tupu faaletagata, a e ua galo le Atua o le ona tofiga ma le pule aoao i le lalolagi.

Ioe, e malosi le mea moni, a e le moni le mea malosi. Ua tele nauā tofiga eseese ua tatou maua. Ua televave foi le atamai, ma ua avea ai ma ala ua sese ai faatinoga o tatou tofiga. A e faimai le autu, “**O le Upu moni e fa’avavau.**” Na avea lava Iesu Keriso ma pagota ona o tuua’iga sese. E ui ina ta’u leagaina ma tauemua, a e na ia tautala ma fa’ailoa le mea moni.

Tatalo: Fa’afetai tele le Atua i lou agalelei, na e onosa’i i puapuaga o le oti ina ia o matou maua le ola e fa’avavau. **Amene!**

Aso Lua – Mati 4: “O tagata e lavelave” (*People are complex*)

Tusi Faitau – Ioane 19: 16e-25

Matua – f. 22: *“Ua tali atu Pilato, “O le mea ua ou tusia, ua ou tusia lava.”*

O le faamasinoina o Iesu, na feteena'i ai lagona o Pilato ona o manatu a le motu o tagata e uiga ia Iesu; le tupu o tagata lutaia. O tagata lava ia na alalaga i lona afio mai, lea fo'i ua toe alalaga ina ia faasatauro ia te ia. Na faailoa foi e le au ositaulaga o lutaia ia Pilato, upu e manana'o e tusia i luga a'e o le ao o Iesu. Peita'i, na tali e Pilato i lona tulaga faatupu, e pei ona i ai upu o le tatou matua. E ui i le faia e Pilato o mana'oga a tagata e faasatauro ia Iesu, a e na ia lagona lava, **o Iesu o le Tupu o tagata lutaia.**

Na ia lagona foi o se amataga fou lea ua saunia e Iesu e le gata mo tagata lutaia, a e faapea fo'i le lalolagi atoa. O valo'aga ia na valoia mai ai e Perofeta, le Mesia o le a afio mai le lagi. Na te aumaia le ola fou ma le faamoemoe ola, atoa ai ma le faaolataga ua saunia mo le lalolagi uma.

Tatalo: Iesu e, fa'amagalalo i lo matou ola femoumoua'i ma lē talitonu i mea uma ua e faia mo i matou o tagata agasala. **Amene!**

SAVAVALI MA IESU: OLAGA KERISIANO – WALKING WITH JESUS: CHRISTIAN LIFE

1. O ā Tatou Faata'ita'iga (Our Example)

Aso Lulu Lefulefu

Aso Lulu – Mati 5: “O tusitusiga paia o loo molimau ia Iesu Keriso”

Tusi Faitau – Ioane 5: 35-39 *(Scriptures bear witness to Jesus Christ)*

Matua – f. 37: *“O le Tamā fo'i na auina mai a'u, o ia lava ua molimau iā te a'u. E le'i fa'alogo lava outou i lona si'ufofoga, e le'i va'ava'ai atu fo'i i lona tino mai.”*

Ua soo le lalolagi uma i le Talalelei e ala ia Iesu Keriso. O molimau eseese a le au Perofeta ma le au Aposetolo, e uiga i le galuega tala'i a Iesu Keriso i le lalolagi. O loo talanoa Iesu i le tāua o le faasinomaga o le tagata. Na ia taumafai e faailoa i le au Faresaio, ia faia ma le alofa faai'uga o a latou faamasinoga. O le faia o galuega lelei e faavae i le alofa, o le ta'uleleia foi lea o le faasinomaga o le tagata.

Na ofoina e le Atua le ola mo le lalolagi uma ma le meaalofo o le faasinomaga. O le alofa o le Atua, na faailoa mai e Iesu Keriso e ala i lana galuega tala'i na afio mai ai i le lalolagi. Ia faaaauau pea la tatou molimau i tala o Atua, e pei ona a'oa'o mai e Iesu ia i tatou. O le moni o lo tatou molimau i le Atua ma lona finagalo, ona tatou iloa lea o le tāua o lona fesoota'i mai i o tatou tagata.

Tatalo: Fa'afetai tele lo matou Tamā, i au meaalofo ese'ese o le ola ua matou maua; e faia ai lou finagalo pei ona e vala'auina ai matou. **Amene!**

Aso Tofi – Mati 6: “Faamalolo e Peteru le pipili i le suafa o Iesu Keriso”
(Peter heals crippled beggar in name of Jesus Christ of Nazareth)

Tusi Faitau – Galuega 3: 1-10

Matua – ff. 4,5: *“Ona pulato’a lea o loane ma Peteru ia te ia, ua fa’apea atu, “Va’ai mai ia iā te i maua.” Ona naunau mai lea o ia iā te i laua, fā’i e maua se mea mai ia te i laua.”*

E le’i fefe Peteru e ta’u atu i le tauaso, le mea na te lē mafaia ona fai. E le gata i lea, e le’i manatu foi Peteru o loo ia te ia le mea o mana’o i ai le tagata ma’i. A’o le faalagolago o Peteru i le tatalo ma manatua a’oa’oga a Iesu, na telē ai le avanoa e faia ai le galuega faamalolo mo le tagata ma’i. E faapena le gasologa o le soifuaga o loo tatou ola ai. E i ai taimi tatou te fefefe ai e ofo le fesoasoani mo nisi, ina ne’i lē talafeagai ma o latou mana’oga. E i ai fo’i nisi o taimi ua tatou iloa le mea e tatau ona fai mo isi, a e ua tatou faatalitali se’i o tatou lagona le loto atu e fesoasoani, ona faia lea. E ui ina lē mautonu Peteru e ofoina le fesoasoani mo le tagata ma’i, a e na ia lototele pea e faia le galuega atoa ma le faalagolago ia Iesu Keriso.

Tatalo: Le Atua pule aoao, ia e fa’atupuina le loto fesoasoani ia i matou, ina ia o matou fesoasoani i nisi o mafatia. **Amene!**

Aso Tatalo Tinā o le Lalolagi

Aso Faraile – Mati 7: “Faaosoosoga o Iesu i le toafa”

Tusi Faitau – Mataio 4: 1-11 *(Temptation of Jesus in the desert)*

Matua – f. 1: *“Ona aveina a’e lea o Iesu i le vao e le Agaga, ina ia fa’aosoosoina e le tiapolo.”*

O le amataga o le galuega faaola a Iesu i le lalolagi, e tele ni faafitauli na feagai ma ia. Tasi nei o tala na tumati’e ai i le Talalelei le matagofie ma le mamalu o le Atua. O le saunia e le Atua o lona Alo o Iesu Keriso, na tapena mai i totonu o le toafa. O le faailoga o le parataiso, a e ua aveia ma toafa ina ua agasala tagata. O le nofoaga tuufua ma e faigata fo’i ona ola ai se tagata. A ua filifilia e le Atua le toafa, ina ia faailoa ai ana galuega mamana ma le silisiliese. O le afio mai o Iesu, na ia aumaia ai le ola fou mai totonu o le toafa; ina ua ia manumālō mai le tiapolo.

Ioe, e feagai pea i tatou ma faaosoosoga o lenei olaga. Tatou te savalia pea ala faigata i le toafa, ona o mea e tutupu. A’o ala ia e lu’itauina ai pea lo tatou ola talitonu ma faalagolago i le Atua soifua.

Tatalo: Le Atua e le Alii alofa, foa’i mai le loto onosa’i ia i matou e tali atu ai i fa’aosoosoga o le ola pe a o’o mai. **Amene!**

Aso Toona’i – Mati 8: “E lē tatagaina e le Atua ni tofotofōga ia te oe nai loo mea e te mafaia” *(God will not let you be tempted more than you can bear)*

Tusi Faitau – 1 Korinito 10:12-13

Matua – f. 12: *“O lenei, o lē manatu o loo o tu ia, ina fa’aeteete ia ne’i paū.”*

O le Ekalesia i Korinito sa i ai le faaaliga o meaalofa faaleagaga eseese. Sa tele nauā lo latou fialia i le ‘oa o le lalolagi, a e le’i mafai ona latou galulue faatasi e fausia se nuu lotogatasi, ma ia atagia le alofa o le Atua mo i latou. O

le a'oa'oga e uiga i le Atua ma lana Talalelei na tala'iina atu e Paulo; na to'atele nisi na mausalī ai lo latou ola talitonu. E ui a i lea, na faigofie lava ona o ese mai ai ona o le tele o tala'iga sese ua ofi atu i totonu o Korinito. O le toe faamanatu a le Aposetolo, ina ne'i manatu i latou e lē mafai ona oo ni faaosoosoga ia i latou. O le pule aoao a le Atua, e faia pea lona finagalo i le taimi ua tatatu mo le tagata. E faapea fo'i nisi o faafitauli o tutupu pea i lenei fo'i vaitau. Ua tatou manatu lava i tatou ua na'o i tatou lava, a e galo ai lo tatou vā fetausia'i lelei ma nisi. E ao ina o tatou manatua pea le alofa tausi mai o le Atua i lo tatou ola i aso uma.

Tatalo: Fa'afetai mo au fa'amanuiaga ese'ese ua matou maua, ia fesoasoani mai ina ia o matou tausi ma fa'apelepele i ai. **Amene!**

SAVAVALI MA IESU: OLAGA KERISIANO – WALKING WITH JESUS: **CHRISTIAN LIFE**

2. Mulimuli i le ala (*Following the way*)

Aso Sā – Mati 9: “Faailoa atu le mālō fulifaō”

Tusi Faitau – Mataio 5: 1-12 (*Introducing the upside-down kingdom*)

Matua – ff. 1e, 5 : “Ona o mai ai lea o ona so'o ia te ia; ua ia fetalai atu, ma a'oa'o ia te i latou, “Amuia ē matitiva i le agaga; auā e o latou le malo o le lagi. Amuia ē fa'anoanoa; auā e fa'amafanafanaina i latou. Amuia ē agamalu; auā e fai mo latou le tofi le nu'u.”

Na tuvao le lauga a Iesu i le mauga, i le si'itiaina o le tulaga o ē matitiva ma agamalū. O upu ua fai ma matua, o loo atagia ai le feteena'iga i manatu o ta'ita'i o le lotu ma le au mau'oa. Ua tuu faafeagai e Iesu le lalolagi ma le malo o le Atua. O lona uiga, e lē tāua le tele o le tamaoaiga e maua ma tofiga mauualuluga, a o le olaina le finagalo o le Atua. O le mulimuli i a'oa'oga a Iesu, e lē na o le faaleo, a e ia faia le galuega e iloa ai uiga o a'oa'oga a le Ali'i. O manuia o le Atua ua faasalafa mo i tatou uma, ina ia tali ai o tatou mana'o. Peita'i, ua avea le tele o le 'oa tatou te maua e pogai ai nisi o faafitauli. Ua le iloa ai e le au maumea le vā ma nisi o loo lima vaivai. Ua avea foi tofiga ma ala ua soona fai ai a tatou faai'uga fai, ma ua lē maua ai se nonofo lelei. A'o upu a Iesu, e fai mo i latou le malo o le lagi.

Tatalo: Lo matou Tamā e o i le lagi, ia fa'amanatu mai pea e lau afio le tāua o le ola fa'asoa; ina ia atagia ai le alofa i mea matou te faia. **Amene!**

Aso Gafua – Mati 10: “Faia le mālō fulifaō ma faata'ita'iga”

Tusi Faitau – Mat. 25: 31-46 (*Putting the upside-down kingdom into practice*)

Matua – ff. 37, 40 : “Le Alii e, o anafea na matou iloa ai oe ua fia 'ai, ma matou fagaina oe? Po o fia inu, ma matou avane e te inu ai? Ona tali atu ai lea o le Tupu, e fa'apea atu ia te i latou, E moni, ou te fai atu ia te outou, auā na faia e outou i le tasi o e aupito itiiti o o'u uso nei, o a'u lea na outou faia i ai.”

O upu ua fai ma tatou matua, o loo faamatala ai foliga o le mālō o le Atua i le ola e faavavau. Ua faamatala e Iesu i le gagana faa-faata’oto, ina ia malamalama ai tagata o loo faalogologo i ana a’oa’oga. Silafia e Iesu, ua lata mai le itu aso e faalataina ai le atali’i o le tagata ma fasiotia. O le faaolataga na saunia e Iesu Keriso, o le faitotoa ua tatala e le Atua mo tagata uma. O le mālō o le Atua o loo tausiniō ai le au faatuatua uma. A o le fesili, E faapefea ona tatou maua le mālō o le Atua? Ia tatou faia le finagalo o le Atua, ma ia olaina a’oa’oga na faailoa mai e Iesu Keriso. Ia faia ma le onosa’i ma le loto atu i le Atua.

Tatalo: Fa’afetai tele le Atua, i lou alofa tunoa lea ua toe maua ai le so’otaga i la tatou mafutaga e ala i lou pele Iesu Keriso. **Amene!**

Aso Lua – Mati 11: “Su’esu’e i uiga o Iesu”

Tusi Faitau – Ioane 14: 1-7 (*Studying Jesus’ character*)

Matua – ff. 6,7 *“Ua fetalai atu Iesu ia te ia, “O a’u nei le ala, ma le upu moni, ma le ola; e le alu atu lava se tasi i le Tamā, pe a le ui mai ia te a’u. Ana iloa e outou o a’u, po ua iloa fo’i e outou lo’u Tamā; e amata nei fo’i ona iloa o ia e outou; tou te va’ai fo’i ia te ia.”*

Ua a’oa’o mai Iesu ia i tatou i lenei fuaitau, pe afai tatou te fia a’oa’o ma iloa uiga o le Atua. O le soifuaga o Iesu i le lalolagi, e le’i faigofie lana galuega na afio mai ai. A e ua fai lea ma faleaoga atamai i le au Kerisiano, ma i latou e talitonu ia te ia; le tāua o le iloaina o uiga o Iesu. O iina e manino ai la tatou va’ai, ma o tatou iloa ai le Atua. O le fesili faatupu manatu, e faapefea ona tatou ola i lea auala?

Tatalo: Agalelei mai lau afio i a matou galuega fa’atino, ina ia matou sa’ili ma ia mulimuli pea i ou ala i lenei soifuaga. **Amene!**

Aso Lulu – Mati 12: “Faatinoga o le mālō fulifaō”

Tusi Faitau – Galuega 9: 1-9 (*Upside-down kingdom in action*)

Matua – ff. 4, 7: *“Saulo, Saulo e, se a lea mea ua e sauā mai ai ia te au? Ona fai atu lea o ia, “Le Alii e, o ai ea oe? Ona fetalai mai lea o le Alii, “O a’u o Iesu ua e sauā mai i ai; o le mea faigata ia te oe ona aa i tui. Tu ia oe i luga, ina alu ia i le ‘a’ai, ona ta’uina atu lea ia te oe o le mea e tusa ona e faia. A ua tutū tagata na o malaga ma ia, ua le mafeganavai; ua lagona lava e i latou le si’ufofoga, a e le iloa atu se tasi.”*

O manatu o le tagata, e le’o le finagalo lea o le Atua. O le Atua e silasila i le loto o le tagata, ona valaauina lea e faatino lona finagalo. O le avea o Paulo e fai ma Aposetolo, na feliu’ina e Iesu lona tagata tuai e avea ma tagata fou. E ui i le tele o faaletonu na faia e Paulo, a e ua finagalo le Atua e faaaoga e fai ma Aposetolo. O lona valaauina, na iloga ai le pule aoao a le Atua ma ana tofiga e lē faailoga tagata. Ua manino i le Atua le soifuaga tuai o Paulo, a e na ia silafia e mafai ona līua e avea ma ave fe’au i le Talalelei. O se auauna e manatu nisi e lē agavaa i le galuega a le Atua, peita’i ua alofaina e le Atua e ala i lona vala’auina.

Ua matua le soifua galue o le Aposetolo i le galuega a le Atua. Na avea ma fili i nisi o tagata i lona vaitau, a e na feliiua'ina e le Atua ia avea ma tagata tãua. O le upu moni, e leai se tagata na faia e le Atua e lē aoga.

Tatalo: Le Atua fa'avavau e, foa'i mai le loto tele matou te faia ai au galuega ua e vala'auina ai matou e galulue ai. **Amene!**

Aso Tofi – Mati 13: “Faaali tino se isi auala”

Tusi Faitau – Ioane 9: 1-12 (*Demonstrating another way*)

Matua – ff. 1, 4: *“Ua malii ane o ia, ua silafia le tagata ua tauaso talu ina fanau mai. Ona fesili mai lea o ona so'o ia te ia, “Rapi e, po o ai ea na agasala, po o ia nei, po o ona mātua, ina ua fanau mai o ia o tauaso?” Ua tali atu Iesu, “E le'i agasala lenei tagata, po o ona mātua; a e peita'i ina ia fa'aalia ai o galuega a le Atua ia te ia. E tatau ona ou faia galuega a le ua auina mai a'u, manū o ao; e o'o i le po, e le mafaia e se tasi ona galue ai.”*

A o faaauau pea le galuega a Iesu, na tupu pea lagona masalosalo o ona soo ma tuufesili pea ona o le fia malamalama. O upu o le tatou matua, ua fesiligia e soo o Iesu, le mafuaaga ua tauaso ai lenei tagata. O le talitonuga faa luitaia, o i latou ia o tagata agasala. Peita'i e le'o le manatu lea na tali ai Iesu, ina ua tali i le fesili a ona soo. Ua faailoa ai e Iesu ia i latou, ina ia faaalia ai o galuega mamana a le Atua. O le Atua e ou le foafoaga atoa, o lona mata'isau fo'i na faia ai le lagi ma le lalolagi.

Tatalo: Le Atua o le pule aoao, fesoasoani mai ina ia o matou iloa au galuega i mea uma i lenei lalolagi. **Amene!**

Aso Faraile – Mati 14: “Avea ma malamalama i le lalolagi”

Tusi Faitau – Mataio 5: 14-16 (*Becoming a light in the world*)

Matua – ff. 14,15: *“O outou, o le malamalama o le lalolagi outou. E le mafai ona lilo le ‘a'ai ua tu i luga o le mauga. Latou te le tutuina fo'i le moli i le tu'u ai i lalo o le mea e fua a'i saito, a e tu'u i luga lava o le tu'ugamoli ia pupula atu ai i e o i le fale uma.”*

O le malamalama e na te aumaia le manino i sulu o le tino po o mata. O le avea ma malamalama i le lalolagi, o le galeuga e lē faigofie lona faatinoina. O upu o le tatou matua, o se faamanatu tãua mo le 'au Kerisiano uma, o e talitonu ma faatuatua i le Atua soifua. Ua faatusaina i tatou i le malamalama, ina ia tatou faasusulu atu lona matagofie i le lalolagi, e tusa ma lo tatou lava olaga. E ala lea i le faia o le finagalo o le Atua, e pei ona afio mai ai Iesu i le lalolagi. Ia avea lou “sulu” e faamalamalama ai nisi o sulu ua amata ona tineia ma pepē ona o tu'inauga o le olaga.

Tatalo: Le Atua alofa e, fesoasoani mai ina ia mafai ona matou fa'ailoa le malamalama o lau afio i le lalolagi o faigata ma fa'afitauli. **Amene!**

Aso Toona'i – Mati 15: “Lē faasalaina” (No condemnation)

Tusi Faitau – Ioane 3: 17-21

Matua – ff. 17,18: *“Auā e le’i auina mai e le Atua lona Atalii i le lalolagi ina ia fa’amasino i le lalolagi, a ia fa’aolaina le lalolagi ia te ia. O le fa’atuatua ia te ia, e le fa’asalaina o ia; a o le lē fa’atuatua, ua uma ona fa’amasinoina nei lava o ia, auā e le’i fa’atuatua lava ia i le igoa o le Atalii e to’atasi o le Atua.”*

O le afio mai o Iesu i le lalolagi, na ia momoli mai le finagalo alofa o lona Tamā ina ia faaolaina i tatou uma. Le Atua ma lana faatōfālā’iga e ala ia Iesu Keriso, na afio mai e toe sosoo le mafutaga a le tagata ma le Atua ona ua agasala. E ui o Iesu o le Alo o le Atua, peita’i na agaleagaina ma ta’usalaina e tagata. E le’i afio mai le Ali’i e faamasino pe faasalaina le lalolagi, a e ia faaolaina i tatou uma. O le galuega faaola na tapena e Iesu mo le lalolagi, na ia tuua ai lona mamalu a e afio mai i se ala faatauva; ina ia faaolaina i tatou. O le totonugalēmū lena o lo tatou ola faatuatua i le Atua. Ia talia Iesu e fai ma o tatou faaolataga, o lē ua ta’usalaina ona o le tagata agasala ma faatauva.

Tatalo: Iesu e lo matou fa’aola, fa’afetai i lou soifua na ofoina mai mo le lalolagi; ua maua ai lo matou avanoa i le ola e fa’avavau. **Amene!**

SAVAVALI MA IESU: OLAGA KERISIANO – WALKING WITH JESUS: CHRISTIAN LIFE

3. Savalivali i le lalolagi ma Iesu (Walking through the world with Jesus)

Aso Sā – Mati 16: “Olioli i le avea ma soo” (Joy in discipleship)

Tusi Faitau – Ioane 15: 8-11

Matua – f. 11: *“Ua ou faiatu nei mea ia te outou, ina ia tumau ai lo’u olioli ia te outou, ia atoatoa fo’i lo outou olioli.”*

O le avea ma soo i le galuega a le Atua, e luitauina i faafitauli eseese. A o lu’itau e faamalositia ai le ola auauna i le Atua, ma faia lona finagalo ua ia tofia ai i tatou e galulue ai. O nisi ia o upu a Iesu i ona soo, ina ia faamalositia ai pea i latou e auauna i le Atua ma le olioli. O a lava faigata ma lu’itau o le galuega faasoo, e tali mai le Atua ma faailoa ia i latou lona finagalo i so o se ala. Ua aveia i tatou ma soo o Iesu e tala’i le Talalelei i le lalolagi. **“Ia tumau le olioli, ia atoatoa fo’i le olioli.”**

Tatalo: Fesoasoani ia i matou ina ia o matou fa’ailoa lau upu i le lalolagi, ma ia matou malamalama i lo matou vala’auina. **Amene!**

Aso Gafua – Mati 17: “Poloaiga autu” (Main command)

Tusi Faitau – Ioane 15: 12-18

Matua – f. 17: *“O la’u poloaiga lena ia te outou, ia outou fealofani.”*

O le poloa’iga lena i Iesu na ia tuuina mai, ia ola ma soifua ai tagata uma. O se fua faatatau ia atagia ai mafutaga ia maua le maopopo. O ana toe upu ia a’o le’i toe afio o ia i le lagi, **“Ia outou fealofani.”** O se faamanatu tāua lea mo tagata uma, e taula i ai le faamoemoe autu o le vā fetausia’i. A lelei ona fausia lo tatou vā nonofo ai i le fealofani, ona atagia lea o le alofa faasoa o le Atua i

totonu o mafutaga eseese ua tatou faia. Ia fealolofaa'i, e pei ona mua'i alofa mai le Atua.

Tatalo: Le Atua e ou mea lava, aumaia manatu lelei e fausia ai a matou mafutaga ina ia mau le maopopoga ma le fealofani. **Amene!**

Aso Lua – Mati 18: “Tagata-lotu po o Kerisiano?”

Tusi Faitau – Kalatia 5: 16-26 (*Churchgoers or Christians?*)

Matua – f. 24: “A o e o ia Keriso, ua fa’asatauroina e i latou le tino, ma ona mana’o, ma ona tu’inanau.”

Ina ua amata le galuega Misiona a Iesu i le lalolagi, na ia faailoa manino ona mana’oga e pei ona afio mai ai. O le Talalelei na ia momoli mai i le lalolagi, ina ia malamalama le tagata i mea ua saunia e le Atua i le lumana’i. O se amataga fou lea mo i tatou uma, e ala i le faaolataga ua saunia e le Atua mo le tagata agasala. Ua lu’itauina ai foi i tatou, ina ia sa’ili le ‘oa, e ala i lo tatou mulimuli ia Iesu, ma a’oa’oga uma ua ia faailoa mai. O lona afio mai i le lalolagi ma militino faatasi ma tagata, o le toe faafouina lena o lo tatou olaga tuai ina ia avea ma tagata fou.

Tatalo: Iesu e, fesoasoani mai ia matou taumamāo ma fiafiaga o lenei lalolagi, a e ia talia le Talalelei e pei ona e fa’ailoa mai. **Amene!**

Aso Lulu – Mati 19: “Fausiaina i le faatuatua” (*Building up in faith*)

Tusi Faitau – Efeso 4: 1-16

Matua – ff. 11, 12: “O ana mea alofa fo’i, ia fai nisi ma aposetolo, o isi fo’i e fai ma perofeta, o isi fo’i e folafola le tala lelei, o isi fo’i e fai ma leoleo atoa ma a’oa’o; ina ia fa’aatoatoaina ai le au paia, latou te fai ai le galuega a auauna, ia atiina a’e ai le tino o Keriso.”

O le faatuatua, o lo tatou talitonu lea i mea e le’o vaaia e o tatou mata. O le meaalofo sili na foa’iina mai e le Atua mo le tagata, ina ia fausia ai lo tatou ola talitonu ia te ia. E lē mafai fo’i ona atagia le faatuatua, pe a fai e le’o i ai sona faatinoga. Auā e tupu le faatuatua i a tatou galuega faatino. O upu a le Aposetolo i le Ekalesia i Efeso, na ia faailoa ai tofiga eseese a le Atua mo le tagata. O galuega e fausia i lo tatou faatuatua i le Atua ma faia lona finagalo.

Tatalo: Le Atua e, fesoasoani ina ia o matou malamalama i lo matou valaauina, e faasoa lau Talalelei i soo se ala ua e finagalo ai. **Amene!**

Aso Tofi – Mati 20: “Iloiloina i tatou lava” (*Examining ourselves*)

Tusi Faitau – Efeso 4: 17-32

Matua – ff. 22, 23: “Ina ia outou to ese le tagata tuai o loo ua leaga, e tusa ma le amioga fa’aanamua, e tusa ma tu’inanau e fa’asese ai. A e peita’i, ia toe fuataiina mana’o o o outou loto.”

Sa faigata ia Paulo ona tala’i atu i le ‘au Kerisiano fou i Efeso, e lafoa’i o latou ala tuai a e talia le ola fou ia Keriso. Silafia e le Aposetolo, le tele o a’oa’oga sesē ua ofi mai totonu o le Ekalesia i Efeso, lea na ia taumafai ai e

polili le ola faatuatua ma le talitonuga o le au Kerisiano i le Atua. O le faamanatu a Paulo ia Efeso, e ao lava ona iloiloina o i tatou ia i tatou lava, e tusa ma le amioga faanamua, e tusa ma tu'inanau e faasese ai; auā ua outou iloa, ua na'o le oti o loo i le ola tuai. A o Keriso, ua maliu o ia ina ia tatou maua le ola, ma maua atili ai pea.

Tatalo: Ia e faatupu ia i matou se loto fou, ina ia faasoa atu ai lou finagalo; ma ia faaalai ai le alofa i lau afio i a matou faatinoga. **Amene!**

Aso Faraile – Mati 21: “Talosaga faigata” (*Difficult prayers*)

Tusi Faitau – Filipi 1: 3-20

Matua – ff. 4, 5: *“E le aunoa la’u fa’atoga ma le fiafia, i a’u tatalo uma mo outou uma lava, ona o lo outou mafuta fa’atasi i la le tala lelei, talu mai le ulua’i aso, ua o’o mai i le aso nei.”*

Sa falepuipui Paulo ma saisaitia i filifili, ona o le galuega a le Atua. E ui i le ta’uleagaina o ia, a e na tatalo i le Atua ma le olioli; ua mausalī le Talalelei a le Atua na ia tala’iina atu. O faigata o le galuega na feagai ma le Aposetolo, e le’i maluelue lona ola talitonu i le Atua. Na sa’ili e Paulo le Atua e ala i le tatalo, a o feagai o ia ma faigata o le galuega. O lona soifua ofoina i le Atua ma faia lona finagalo, na suia ai lona tagata tuai e avea ma tagata fou. O le upu moni, e tutupu pea matagi i liu o le vaa. E afea pea i tatou e lu’itau ma faigata o lenei soifuaga. O galuega a le Atua, e lē fesiligia faafitauli e tutupu. A e ua a’oa’o mai le Aposetolo mo i tatou le ‘au Kerisiano, le tāua o lo tatou sa’ili i le Atua e ala i le tatalo. E le o na’o taimi e solo lelei ai le soifuaga e tatalo ai, a e ia fa’apea fo’i i taimi o mafatiaga.

Tatalo: A’oa’o mai ia matou maua le mafutaga ma lau afio e ala i le tatalo, e faigofie ai ona matou tali atu i faafitauli o lenei soifuaga. **Amene!**

Aso Toona’i – Mati 22: “Alofa ma meatotino” (*Love and belonging*)

Tusi Faitau – Ioane 21: 15-19

Matua – f. 16: *“Ua toe fetalai atu fa’alua o ia ia te ia, “Simona e, le atalii o Ioane, pe e te alofa mai ia te a’u? Ua fai mai o ia ia te ia, “Ioe, le Alii e, ua e silafia, ou te alofa ia te oe.” Ona fetalai atu lea o ia ia te ia, “Ia e leoleo i a’u mamoe.”*

O fetalaiaga a Iesu i ona soo, na manino ai lona naunau ina ia faaaauu pea e ona soo ana a’oa’oga. O le faamanatu a le matua moepō, ina ia manatua pea mea lelei e tatau ona faia pea. O le finagalo o Iesu, ia sa’ili ma ia iloa uiga moni o ana a’oa’oga; e fai ma molimau o lana Misiona i le lalolagi. O lana faatonuga ia Peteru, ia e fafaga i a’u mamoe; ia faaaeteete ma ia faia ma le alofa. E tatau fo’i ona tatou faia lana faatonuga e pei ona tuuina ia Peteru. Auā, soo se nofoaga e i ai le alofa, e i ai foi le lumana’i. Ua valaau mai Iesu ina ia tatou alolofa atu ia te ia ma o tatou tua’oi, ma auauna atu i soo se ala e gata ai lo tatou malosi.

Tatalo: Fa'amatala loto e lau afio ia i matou, le tãua o le faia o galuega uma i le alofa ina ia atagia ai le finagalo o lau afio. **Amene!**

SAVAVALI MA IESU: OLAGA KERISIANO – WALKING WITH JESUS: CHRISTIAN LIFE

4. Faafeagai (Opposition)

Aso Sã – Mati 23: “Se mafutaga alofa-inoino”

Tusi Faitau – Ioane 15: 18-25 *(A love-hate relationship)*

Matua – f. 19: *“Afai a ni tagata o le lalolagi outou, po ua alofa mai le lalolagi i ona tagata; a e lē ni o le lalolagi outou, a ua ou filifilia outou nai le lalolagi, o le mea lea e ‘ino’ino ai le lalolagi ia te outou.”*

I le amataga o le mataupu e 15 o le tatou faitauga, ua fetalai Iesu o ia o le vine moni. Aisea ua faapea ai lagona o le Alii? O taimi ia o lana galuega, ua sauni e tali i ona tīgā. O lona alofa naunau ma tulituli pea ina ia manino i tagata, le taunuuga ma le faamoemoe na afio mai ai. O le savavali faatasi ma Iesu, e tele lu'itau e fesiligia ai le ola ofoina. O lo tatou i ai i lenei lalolagi, e tele nauā fiafiaga eseese ua tōsina ai mana'oga o le tagata.

Ua ave le faamuamua ina ia malie le mana'o, a e galo ai le olaina o a'oa'oga a Iesu. Ua avea foi lagona o nisi ma ala ua sese ai faai'uga fai ma filifilia. A o le tuualalo a le Talalelei, e le'o fiafiaga o le lalolagi e manuia ai. O lona afio mai ma ofoina lona soifua atoatoa mo le lalolagi, o le manuia lea e fa'avavau. Ia tatou filifili e savalia ala o Iesu, ona lē fesiligia lea o lo tatou taunu'uga. O Iesu o ia o le vine moni, a'o le Atua o lē galue vine ia.

Tatalo: Le Atua agalelei e, fesoasoani mai i la matou savaliga, ina ia o matou savavali i ou ala ma fa'aailoa atu lou alofa i le lalolagi. **Amene!**

Aso Gafua- Mati 24: “Lē talitonuina i o tatou lava”

Tusi Faitau – Mataio 13: 54-58 *(Disbelieving your own)*

Matua – f. 57: *“Ona latou tausuai ai lea ia te ia. A ua fetalai atu Iesu ia te i latou, “E lei se perofeta e le mamalu, ua na o lona lava nuu ma lona aiga e le mamalu ai.”*

Na a'oa'o atu Iesu i le motu o tagata e uiga i le malo o le Atua, e ala i faata'oto ma ana lauga. O nei a'oa'oga, ua lē talitonu ai tagata faalogologo o lona lava nu'u moni. Ua feteena'i ai lagona talitonu o tagata o lona nu'u, i a'oa'oga a le 'au perofeta ma Iesu. Lea na ia faapea ai, e lē mamalu lava se perofeta i sona nu'u moni. Ua faamasino e tagata o lona nu'u moni, lona faasinomaga o ia o le atalii o le kamuta. A'o le finagalo, e faaalia i auala e faatauva ma lē amana'ia e tagata. O lagona pūmoomoo ia o le tagata, na suia e Iesu ina ia tatala ai le mafaufau ma ia manino le vaai.

E suia e le Ali'i lo tatou iloa masani o lenei soifuaga, i se vaaiga fou ma le gasologa i le lumana'i. O loo faapea foi ona aafia ai i tatou i le soifuaga o loo

tatou ola ai. Fai mai upu a le ‘au matutua, a malu i fale e malu foi i fafo. O faiga ia e atagia ai le alofa o le Atua, ina ia tutusa tagata uma.

Tatalo: Le Alii e, fa’amagalo i lo matou lē talitonuina o matou lava tagata, i galuega ma faiva ese’ese ua matou galulue ai. **Amene!**

Aso Lua – Mati 25: “Faamoemoe e inosia” (*Expect to be hated*)

Tusi Faitau – Mataio 10: 5-23

Matua – f. 22: *“E inosia fo’i outou e tagata uma ona o lo’u igoa; a o lē tumau seia o’o atu i le gata’aga, e fa’aolaina o ia.”*

A o latou folafola atu i le nuu le suafa o Keriso, sa latou fetaia’i ma loto tetee o tagata. O le faamoemoe na savalia ai e soo o Iesu le nuu e ala i le galuega tala’i, e fa’aolaina i latou e tumau ia te ia e oo i le i’uga. Peita’i, na teena e nisi o tagata lenei sāvali. O le savalia o ala o Iesu ma le soifuaga faa Kerisiano, e le o se malaga e faigofie. O le a suia le olaga tuai i se olaga fou, ma ia taumafai e olaina a’oa’oga a Iesu na ia tuuina mai. A o le faamoemoe atoa o le fe’au a le Atua e ala ia Iesu Keriso, ia faaolaina i tatou uma ma ia maua le ola e faavavau.

Ua tele suiga fou o le ola ua tatou molimauina. O ava oona ma fualaa faasaina ua tele ina a’afia ai le soifua i nisi. Ua tatou filifili ai e savalia ala o le lalolagi, a e ua faatuana’i ala o le Atua e pei ona aumaia e Iesu. O le upu moni, e inosia lava i tatou ona o le tele o mea lelei tatou te faia i le galuega a le Atua. O a lava faafitauli e o’o mai i lo tatou ola, ia mau pea le toovae i le Atua soifua. O lo tatou ala lena i malo tumau ua uma ona saunia.

Tatalo: Le Atua agalelei e, fesoasoani mai ina ia avea i matou ma so’o e tala’i lou finagalo ma fa’ailoa lau Talalelei i nisi o loo i le pogisa. **Amene!**

Aso Lulu – Mati 26: “O se apu leaga e maumau ai le fuifui”

Tusi Faitau – 2 Timoteo 3: 10-17 (*A bad apple spoil the bunch*)

Matua – f. 17: *“Ina ia atoatoa ona lelei ai o le tagata o le Atua, ia saunia lava ia i galuega lelei uma lava.”*

Ua latalata i le faai’uga o le galuega a le Aposetolo o Paulo, na ia toe polili ai Timoteo e pei o le faitauga o lenei aso. Ua silafia e Paulo faafitauli ma lu’itau o le galuega, lea na ia faamanatu ai ia Timoteo. O fautuaga a le matua nau alofa ina ia tau i manū lona faamoemoe, i le faalauteleina o le finagalo o le Atua. Sa ia toe faamanatu ia Timoteo, o loo filogia le galuega ma tagata e tetee i a’oa’oga a le Atua. Ia faaeteete ma ia mataala i le faatinoina o lana galuega. O a foi lavelve o manatu o tagata ma fesiligia ai lana tala’iga, ia mausalī pea i le Atua le faatuatua e faigofie ai mea uma.

O loo atagia foi nei faafitauli i o tatou foi aso ma vaitau o le soifuaga ua tatou i ai. Ua lē masino faafitauli o le ola e feagi pea ma i tatou. Ua avea manatu o nisi tagata, ma ala ua tuu ai lo tatou faia o le mea sa’o. Fai mai le faamanatu a le Aposetolo ia Timoteo, ia mausalī le faatuatua ma ia tausisi i

a’oa’oga a le Atua na ia tala’ina mai. Ia aua ne’i avea le apu leaga e tasi ma mea e ma’umau ai le tau fuifui atoa.

Tatalo: Lo matou Tamā e o i le lagi, fa’atuputeleina pea lo matou fa’atuatua i lau afio, i taimi e o’o mai ai lu’itau o le ola Kerisiano. **Amene!**

Aso Tofi – Mati 27: “Talitonuga feteena’i” (*Conflicting belief systems*)

Tusi Faitau – Galuega 19: 23-41

Matua – f. 34: *“Ua iloa e i latou o le Iutaia o ia, ona tasi ai lea o latou leo uma lava, pe lua itula ua alalaga ai i latou, “Ua silisili Tiana o Efeso.”*

O se tasi o lu’itau e feagai ma i tatou i la tatou savaliga ma Keriso, e aofia ai feutaga’iga ma talitonuga. O ia lu’itau na feagai fo’i ma le Aposetolo o Paulo, i lana malaga lona tolu i le Ekalesia i Efeso. Ua amata ona toe foi tagata i le olaga tuai sa i ai muamua. Na molimauina e Paulo le feteena’i o talitonuga o tagata i le Atua, ma tupua na fausia i lima o tagata. O se faafitauli ogaoga ma ua foliga mai ua leai se vai fofō. Peita’i, e le’i faavaivai ai le Aposetolo i le taumafai e foia le faafitauli ua tula’i mai i Efeso. E ui ina tele talitonuga eseese, a e na ia naunau lava ia manatua ma iloa e Efeso, le tāua o a’oa’oga a le Atua e pei ona ia tala’iina atu.

O le lalolagi ua tatou i ai nei, ua tele talitonuga eseese ma tapua’iga ua molimauina. Ua avea ia ma mafuaaga ua tupu ai nisi o vevesiga i vā o nisi o ekalesia. A o le feau tauologologo a Paulo, e tautala galuega faatino nai loo upu. O a lava tapua’iga ma talitonuga, ia atagia i lo tatou ola le alofa o Iesu Keriso; o le na liu tino tagata ma faia le faaolataga mo i tatou uma.

Tatalo: Le Atua e, ia famalosi i matou ma lo matou faatuatuaga, ina ia o matou lototetele e feagai ma talitonuga eseese i lenei lalolagi. **Amene!**

Aso Faraile – Mati 28: “Molimau pepelo” (*False witnesses*)

Tusi Faitau – Galuega 6: 1-15

Matua – ff. 13,14: *“Ua tu’u atu fo’i e i latou molimau pepelo, latou te fa’apea atu, “E le mapu lava lena tagata i le fai upu leaga i lenei mea paia ma le tulafono. Auā ua matou fa’alogo ia te ia, ua fa’apea mai, E fa’aumatia e lena Iesu o le Nasareta lenei mea, ma fa’aliliu e ia tu sa tu’uina mai e Mose ia te i tatou.”*

O le molimau a Setefano e le na o upu, a e na ia faia galuega ma auauna faamaoni i lona valaauina e tautala i le talalelei ia Iesu. O Setefano o se tasi foi lea o failauga agavaa i le galuega a le Atua, na finau malos i le puipuia o le faatuatuaga ia Keriso. E ui i lona faamaoni i le galuega a le Atua, na faapea foi ona i ai ma le au taufaaleaga e taumafai e faaseseina tagata ua talitonu i le Atua. Na lamatia le ola faatuatua o Setefano ona o le Talalelei a le Atua, a e le’i faavaivai ai lona ola talitonu i le Atua ma lona valaauina. O le faamanatu tāua foi lea mo i tatou o le ‘au Kerisiano.

Tatalo: Le Alii e, ia e fa’atupu le malamalama ia i matou ina ia mafai ai ona matou iloa mea moni; ma tagata taufa’asesē. **Amene!**

Aso Toona'i – Mati 29: "Lu'itau e puapuaga" (Challenged by suffering)

Tusi Faitau – 1 Peteru 4: 12-19

Matua – ff. 16,17: *"A e afai e fa'atigaina se tasi auā o ia o le Kerisiano, aua le masiasi ai o ia, a ia vivi'i atu i le Atua ona o lea lava mea. Auā o ona po nei e amata ai le fa'amasinoga i le aiga o le Atua; afai fo'i e muamua ia i tatou, pe se a le gata'aga o e fa'alologata i le tala lelei a le Atua?"*

Pe a tatou mafaufau loloto i puapuaga na onosa'ia e Keriso ona o i tatou, e lē faatusaina i mafatiaga e feagai pea ma i tatou i lenei soifuaga. Na sauāina, na malii i luga o le satauro matagā e ui ina leai o sana agasala. O tuua'iga sesē na tuua'ia ai e ona lava tagata, ma faasatauroina ai e fai ma sui o tagata agasala uma. O le faatōfala'iga a le Atua na ia foai fuaina mai ai lona atalii e to'atasi, e fai ma o tatou sui e totogi le sala a le tagata. O le uiga moni lena o le alofa o le Atua e lē liliu mo i tatou uma.

E feagai pea i tatou ma lu'itau o le ola i lenei lalolagi o loo tatou iai. A o lu'itau ia e faamalosia ai pea lo tatou ola taumafai i mea lelei o tatou tausiniō ai. O a lava faigata e feagai ma i tatou, ia manatua le faigata o lu'itau na feagai ma Keriso.

Tatalo: Iesu Keriso e, faafetai le taulaga na e faia i luga o le satauro, ua fa'aouina ai o matou tagata tuai e avea ma tagata fou. **Amene!**

SAVAVALI MA IESU: OLAGA KERISIANO – WALKING WITH JESUS: CHRISTIAN LIFE

5. O Lē e o fa'atasi ma i tatou (The One who goes with us)

Aso Sā – Mati 30: "Sa'ili le poto" (Seeking wisdom)

Tusi Faitau – Efeso 1: 15-23

Matua – f. 17: *"Ina ia foa'i atu ia te outou e le Atua o lo tatou Alii o Iesu Keriso, o le Tamā e ona le mamalu, le Agaga e ona le poto ma le fa'aaliga e ala ai ona outou iloa lelei o ia."*

O le poto, o le meaalofa sili ona tāua mai le Atua. O upu a Paulo ia Efeso, e faailoa ai lona agaga faafetai i le Atua; ona ua olaina e le ekalesia a'oa'oga na ia tala'iina atu. Ua ia faailoa ia i le manuia o ē faia le finagalo o le Atua. E le'o le Paulo na mafua ai ona faia e Efeso, a o le Atua na ia galueaina i loto ma finagalo o tagata. Lea na ia faafetai ai i le Atua ona o Efeso, i lo latou taliaina o le Talalelei a le Atua i o latou loto.

Fia mai le autu, **"Sa'ili le poto."** A tatou sa'ili i le poto, ua tatou sa'ili fo'i ma olaina le finagalo o le Atua. Tatou te maua le poto, pe a tatou faia galuega e maua ai. A e a tatou naunau i le poto e auno ma ni galuega, ona fesiligia lea o lona tau. E tāua lo tatou faia o galuega, pe a o tatou sa'ili ia maua le poto. O a fo'i galuega ua tatou faia i le poto ua tatou maua, ia fo'i i le Atua i le fa'afetai o lē na mafua ai ona tatou maua le poto. Aua ne'i galo le Atua, le matua o faiva o le galuega ma mea uma ua tatou maua. Ua tele le tomai ma

iloa i nei aso, ma ua manatu ai le tagata ia te ia lava. E le’o le finagalo lena o le Atua, ia tatou maua le potu ma sa’ili ai o tatou lava vi’iga. Ia manatu le agaga fa’afetai i lē ona mea uma lava, ua mafai ai ona tatou faia so’o se mea.

Tatalo: Le Alii e le Atua, foa’i mai le potu ma le atamai e fai ai galuega ua e vala’auina ai matou, ia iloa ai fa’aaliga fou o lou alofa. **Amene!**

Aso Gafua – Mati 31: “Fausia se faavae e mautū ma malosī”

Tusi Faitau- Efeso 2: 14-22 (*Building a solid and strong foundation*)

Matua – f. 21: “*Ua fa’atatauina ia te ia le fale atoa, o loo alu a’e, ina ia fai ma malumalu paia i le Alii.*”

So’o se galuega fou lava o se fale, e tatau ona malosī lona fa’avae. A lelei le fa’avae, ona mautinoa lea o le malosiaga o le fale atoa. O le tusi atu o Paulo i le Ekalesia i Efeso, e le’o talanoa i le fausia o fa’avae i le fa’aletino. A’o le fa’amanatu mo tagata ia mautu i le Atua le fa’avae o le ola fa’aleagaga. Ua tatou talitonu ma le fa’atuatua i le Atua soifua e ala i le fa’aolataga ia Iesu Keriso.

O le Ekalesia, e le’o fa’asino i falesa ma malumalu ua faia e le tagata. O tatou tagata talitonu ma le fa’atuatua i le Atua, o le tino lea o le Ekalesia. E le’o le toe fausia la o fa’avae o falesa ma malumalu tapua’i, a e ia toe silasila i fa’avae o lo tatou ola fa’atuatua i le Atua. O le toe fa’amanatu lea a le Aposetolo i le Ekalesia i Efeso, ina ia mautinoa o loo fausia le fa’avae o le ola Kerisiano i le Atua. Ia tatou lotogatasi ia Keriso, ma tatou faia fa’atasi se malumalu i totonu o tatou e afio ai le Agaga o le Atua ia i tatou.

Tatalo: Fesoasoani ia matou ola ma auauna pea, ma faatupuina lau galuega; ia matou iloa ai lou finaglo i aso uma. **Amene!**

Aso Lua – Aperila 1: “Le alofa o le Atua” (God’s love)

Tusi Faitau – Ioane 4: 7-21

Matua – f. 21: “*Ua fetalai atu Iesu ia te ia, “Funa e, talitonu mai ia ia te a’u, e oo mai ona aso, tou te tapua’i i le Tamā e le gata i lenei mauga, po o Ierusalem.*”

Faimai le pese a le Aoga Sā, “*Le alofa o le Atua e ofofogia, le alofa silisili lea mo a’u.*” O le fa’aaogaina o le gagana pese, e fa’ailoa ai lagona o le tagata i le Atua ona o lona alofa e silisili’ese. O tu ma aga i Asia itiiti, e lē mafai ona feavea’ia mea a Samaria ma Kalilaia. Peita’i, na feliuaina e Iesu Keriso lea talitonuga i le vaieli lea na fetau ai ma le fafine Samaria. O loo mamanu ai e Iesu le so’otaga o tagata uma e ala i le alofa lē fa’atuaoia o le Atua. E ui ina ese’ese o tupu’aga, a e ua tasi i tatou uma i le Atua ma lona alofa tunoa.

Tasi nei o fa’afitauli o loo feagai pea ma o tatou tagata i nei aso. Ua faigata ona maua le lotu o le omai fa’atasi, e galulue e tapena se fa’amoemoe. Ua lē atagia ai le alofa o le Atua i mea tatou te faia. O le upu moni, e ese’ese tagata ma o latou manatu. E ese’ese fo’i o tatou tupu’aga ma o tatou fa’asinomaga. A’o le afio mai o Iesu ma ia tatala lagona pumo’omo’o o le tagata, na ia tatala

ai uiga o tulafono na auina mai e le Atua. E ui lava ina ese'ese o tatou manatu ma o tatou fa'asinomaga, a e ua tatou so'otulutulu fa'atasi ma le Atua i lona alofa tunoa e ala ia Iesu Keriso.

Tatalo: Le Atua o le lofa mutimutivale, ia atagia le alofa o lau afio i mea matou te faia i nisi o lau fanau. **Amene!**

Aso Lulu – Aperila 2: “O Iesu o lo tatou Faaola” (*Jesus is our Savior*)

Tusi Faitau – Ioane 1: 10-18

Matua – f. 14: *“Ua liu tino tagata le Upu, sa mau fo’i o ia ma i tatou, na matou matamata i lona mamalu; o le mamalu lava lea o le Alo e to’atasi o le Tamā, ua tumu o ia i le alofa tunoa ma le fa’amaoni.”*

Faimai se tasi o fesili ua a’oa’oina ai le fanau i totonu o Aoga Aso Sā, **“O ai lou Fa’aola?”** O upu o le tatou matua, o loo fa’amatala mai ai le afio mai o Iesu i le lalolagi ma lona mafua’aga. Ua avea Iesu ma Fa’aola i tagata ona o le finagalo lea o lona Tamā, ina ia le fano se tasi a ia maua le ola e fa’avavau. O le liu tino tagata o le Atua e ala ia Iesu Keriso, na ia momoli mai ai le fa’amoemoe ola mo le tagata ina ua agasala. A’o le fa’atōfāla’iga a le Atua, ina ia toe soso’o le mafutaga a le tagata ma le Atua e ala ia Iesu Keriso ua liu tino tagata. O le auina mai o Iesu Keriso, ua fai lea ma faleaoga atamai i le tagata e ala i a’oa’oga a le Atua. O le siufofoga mai le lagi na faapea mai, o lo’u atalii pele lena, ua ou fiafia lava ia te ia. O le alofa tulituliloa lena o le Atua i le lalolagi, e ala ia Iesu Keriso ua avea ma fa’aola i le lalolagi uma. E ui ina o tatou ō’ese ma le Atua i le tele o taimi, e le’i tuulafoaina lava i tatou e le Atua. Na ia tumau lava ia i tatou ma ia foa’i ai lona atalii o Iesu, ina ia o tatou maua le ola ma maua atili ai lava.

Tatalo: Faafetai le Atua i le faaolataga e ala ia Iesu Keriso, ua matou mau tofi ai lou malo e faavavau, pe a salamō ma faatuatua ia te ia. **Amene!**

Aso Tofi – Aperila 3: “O le ofutau a le Atua” (*The armour of God*)

Tusi Faitau – Efeso 6: 10-17

Matua – f. 17: *“Ia outou ave fo’i le puloutau o le fa’aolataga, ma le pelu a le Agaga, o le afioga lea a le Atua.”*

Ua tatou molimauina le fetaua’i o le lalolagi, ona o le faamaualuga a le tagata. Ua ma’umau ai le soifua o le to’atele, ma ua foliga ua leai se alofaga i nei faiga lē alofa. Fai mai le autu o lenei aso, **“O le ofutau a le Atua.”** O toe upu ia a le Aposetolo o Paulo i le ekalesia i Efeso, ina ia tau’ave ma manatua i o latou loto le Atua. Ua talanoa Paulo i le pelu o le Agaga, e puipuia, ma e mafai ai ona tatou tau le taua lelei ma manumālō ai.

E feagai pea le au Kerisiano ma faafitauli o le ola ofoina mo le Atua. A o lana toe fafagu mai mo i tatou, o ofutau a le Atua e maua ai mālō i le taua faaleagaga. Po o le a lava le malosi ua tatou maua, e i ai taimi e vaivai ai le tagata. A o le ola faalagolago i le Atua mo ana ofutau atoatoa, tatou te maua

ai mālō i le tausinioga. O le Atua e tau mo i tatou, pe a lutia la tatou savaliga i peau lagavale o le soifuaga.

Tatalo: Le Atua o au e, ia avea lau afio ma papa matou te malu ai i taimi e o'o mai ai le fili i o matou tagata. **Amene!**

Aso Faraile – Aperila 4: “E oo mai mea lelei uma i ē faatalitali”

Tusi Faitau – Roma 8: 18-27 *(All good things come to those who wait)*

Matua – f. 25: “A e peita'i a tatou fa'amoemoe i le mea ua le va'aia, tatou te fa'atalitali atu i ai ma le onosa'i.”

A oo ina tatou faatatlitali mo le faamoemoe, e eseese lagona e oo mai i le tagata. O lagona o le fiafia ma le naunau taunuu, faapea foi lagona o le lē fia auai, ona ua umi se taimi o faatalitali. Peita'i o upu ia ua fai ma tatou matua, o loo faailoa ai le taunuuga o le tagata e faatali mo le Alii. O le faatalitali i mea e le o vaaia, e tupu ai le faatuatua. E tataua ona faatalitali ma le onosa'i, ona maua lea o mea lelei ua faatali mai i le lumana'i. O upu toe faamanatu ia a Paulo mo le au faatuatua i Roma. O le ola faatalitali i le Alii, e ta'u amiotonuina ai i le faatuatua ua mausalī.

Tatalo: Le Alii e, fesoasoani ia matou maua pea le loto onosa'i ma ia faatalitali pea i lau afio mo mea lelei ua e saunia i le lumana'i. **Amene!**

Aso Toona'i – Aperila 5: “I mea uma” (In all things)

Tusi Faitau – Roma 8: 28-39

Matua – f. 28: “Ua tatou iloa fo'i e galue le Atua i mea uma lava mo le lelei fa'atasi ma i latou o e ua alolofa atu ia te ia, o e ua vala'auina i lona finagalo.”

Ua vala'auina i tatou e le Atua e faia lon finagalo i galuega ese'ese. O lona finagalo alofa mo le tagata, ina ia aoga o tatou aso i lenei lalolagi. E ui lava ina o tatou o ese mai le Atua, ma te'ena lona musumusumu mai e ala i le Agaga Paia. Peita'i, e lē avea lea ma ala e tu'ulafoa'i mai ai o ia i le tagata. O lona finagalo, ia tatou faia lea mo le lelei o i tatou lava atoa ma lo tatou alolofa atu ia te ia.

A tatou faia fo'i tau ina fa'atau'u, ona fesiligia lea o le taunu'uga ilelumana'i. O a lava faiva ma tiute ua tatou galulue ai, ia faia ma le alofa ma le loto atu i le Atua' ona manuia lea o lona taunu'uga i le lumana'i. O tofiga i totonu o aiga, nu'u, fa'apea fo'i lana Ekalesia, o lo tatou vala'auina lena mai le Atua. O a fo'i galuega lelei ua tatou faia, e le'o so tatou lava vi'iga. O lo tatou fa'atauva'a e tumau pea, a'o le vi'iga e silisili lea i le Atua ona o mea uma ua tatou faia.

Tatalo: Le Atua fa'avavau e, fesoasoani maiina ia o matou lagonaina le tãua o lou vala'auina o i matou i tofiga ese'ese ua matou maua. **Amene!**

O LE EVAGELIA A LUKA (2) – THE GOSPEL OF LUKE (2)

1. O Mea na Tutupu i le Vaiaso Paia (The Events of Holy Week)

Aso Sā – Aperila 6: “Faalataina” (Betrayal)

Tusi Faitau – Luka 22:1-6

Matua – f. 6: *“Ua lelei ia te ia, ona lamalama lea o ia se itu aso e faigofie ai, na te faalataina ai o ia ia te i latou, a o le i ai le motu o tagata.”*

O le faitauga o le nei aso ua tatou iloa ai le militino faatasi o Iesu i se figauō vāvālalata ma se vaega o tagata o le a faalataina o ia. Na silafia lava e le Alii mai i le amataga e iai le tagata na te faalataina o ia. Fetalai le Alii, “E iai so outou na te faalataina a’u.” Sa faapea lava o Peteru, ina ua faapea ana upu “satani e, aluia i o’u tua.” Mulimuli ane o Iuta le Sekara. O le tulaga e ofo ai le loto, e ui lava i nei mea tigā ae na faasoa atu pea le Alii ia Iuta le faalata. O se tulaga faapea e le mafaia e se tagata se i vaganā se isis ua ia te ia se mautinoa o ia se faamoemoe ola o i talaatu o le ola.

E fetaia’i pea ma faafita uli o le ola. Peita’i o le talitonu moni i le Atua soifua e tuumāmāina ai mea faigata e tutupu mai i le ola nei. Ia manatua o le tele o mea sesē tatou te faia o lo tatou faalataina lava lea o le Alii. E faasoa mai pea Iesu ia i tatou i auala lelei ina ia o tataou mafaufau atu pea ia te ia o lo tataou manuia lea.

Tatalo: Iesu e, faafetai mo le tiga faalelagona na e filifili e onosaia, ia matou mafaia ona maua le mafanafana o se mafutaga ma le Atua. **Amene!**

Aso Gafua – Aperila 7: “Areto ma le Uaina” (Bread and Wine)

Tusi Faitau – Luka 22:7-23

Matua – f. 19: *“Ona tago ai lea o ia i le areto, ua faafetai, ua tofitofi, ma avatu ia te i latou, ua faapea atu, O lo’u tino lenei, ua foaiina atu mo outou; tou te faia le mea nei e fai ma faamanatuga ia te a’u.”*

O le vaega lea o le tusi a Luka o loo faamatalaina ai le faamanatuga na faalataina ai lo tatou Alii o Iesu Keriso. E ui e le o se tulaga lelei pe a mafaufau i ai, a e ua tatou manino, e le i tuua e le Alii lona au soo e taape faalafumamoe e leai so latou ta’ita’i. O le areto ma le uaina na totō ai le fatu o le fealofani, ma aumai faatasi ai lona au soo, e ui lava ina faalataina ai o ia e Iuta le Sekara.

Ua fetaui lelei le faalataina o le Alii ma le feau taumolimoli o le na afiafi. O le mafuta ma tutu faatasi ma le faatuatua moni i le Atua, e mafai ai ona laasia mea leaga e tutupu mai. O le isi feau autū o lea afiafi, o le maua lea o le loto faamagalo. Ia avea taimi o le taliaina o le areto ma le uaina e maua ai se fesoota’iga i le va ma ē e le masani. O le Atua tatou te mafuta ai ma le tuaoi i le alofa ma le fesoasoani atu.

Tatalo: Iesu e, matou te le mananao e avea ma maa tu’ia e taofia ai isi mai le faailoa atu o le faafetai ia te oe. **Amene!**

Aso Lua – Aperila 8: “O uō e ala i tofotofoga” (Friends through trails)

Tusi Faitau – Luka 22:24-30

Matua – f. 28: *“O outou foi, ua outou tumau ia te au i o’u tofotofoga.”*

E le i pogisā i le Alii le mea o le a aga’i i ai le faamoemoe o ē na latou mafuta. O le a ta’itasi ma toe foi lava le tagata i le mea sa masani ai. O uiga

masani ia o le ola i nisi taimi, ma e le mafai foi ona vaoia e se tasi. O nisi soo o le a toe foi e fagogota, a o nisi e toe fo'i i mea masani ma mea le talafeagai sa ola ai. E ui lava i lea, sa fetalai lava le Alii, *“O outou fo'i, ua outou tumau ia te a'u i tofotofoga.”* E le i avea faaletonu o le tuana'i e fai ma ala e galo ai i le Alii le tāua o le taimi sa tutu faatasi ai. O le mamafatū o avega i taimi ua sola, sa avea fo'i le tutu faatasi sa maua ai se fesoasoani i le va o le au soo. E ui lava ina ui mai i ala o tofotofoga, a e sa tele se a'oa'oga sa fafagaina ai le ola faatuatua.

Tatalo: Ia pupula o tatou mata e vaai atu i tagata i o tatou olaga, o e na o le fia iloa mai o i tatou mo a latou lava mana'oga. **Amene!**

Aso Lulu – Aperila 9: “E lē faia’ina le Atua” (*God never fails*)

Tusi Faitau – Luka 22:31-38

Matua – f. 34: *“Ona fetalai atu lea o ia, Peteru e, ou te fai atu ia te oe, e le vivini moa i le po nei, seia e faafiti faatolu mai e te le iloa a'u”*

O le fetalaiaga a le Alii ia Peteru, e le o se faa'ata a o le faamanatu. Ua silafia lelei e le Alii le vaivaiga o loo maua ai Peteru; e ui lava i le tele o taimi o latou mafuta ma a'oa'o atu pea. I le fetalaiaga a le Alii, ua ia faamanatu atu ai ia Peteru, o le tagata e i ai taimi e vaivai ai, a o le Atua e tumau pea lona malosi e oo i le faavavau. Ua leva ona silafia e le Alii mea uma o le a tutupu, o le ala lea o lona faailoa atu ia Peteru le silasila a le Atua e na te silafia ai mea e lē iitea e le tagata. O mea e le au i ai le iloa o le tagata e faaalai ai le Atua e le faia'ina lava e oo i le gataaga.

Tatalo: Iesu e, ia e faamagalo mai ia te au i taimi na ou ma ai e ta'ua oe o la'u uo, ma faamagalo mai ia te a'u i taimi e faafiti ai ia te oe. **Amene!**

Aso Tofi – Aperila 10: “Tulaga Liliu” (*Turning points*)

Tusi Faitau – Luka 22:39-46

Matua – f. 42: *“Lo'u Tamā e, a e finagalo i ai, ia e ave ese leni ipu ia te au; a e aua le faia lo'u loto, a o lou finagalo.”*

E le faigofie suiga o mea e tutupu i le olaga. O le aga atu o le Alii i ona puapuaga, e le o se mea faigofie. Ua tatou iloa i ana upu lona faamoemoe tuuina atu i lona Tamā o i le lagi. E ui lava o ia o le Alo o le Atua soifua, a ua ia silafia lava o lona Tama le pule ma le taunuuga o le ola. O le faai'uga lea o le galuega a le Alii. Sa ia galue ma le mautinoa o le faai'uga o le a tuuina atu i aao o lona Tama o i le lagi.

O le tagata e galue ma faalagolago i le faasinomaga a le Alii i le ola. O le Atua o le autu ma le pogai o mea uma, o lana faasinomaga o se mafuaaga tatau e suia ai mea e aga'i i ai lo tatou ola taumafai.

Tatalo: Foai maia le malosi e fai ai faai'uga e fetaui lelei ma lau fuafuaga mo o matou olaga. **Amene!**

Aso Faraile – Aperila 11: “O Ia o le ala” (*He is the way*)

Tusi Faitau – Luka 22:47-53

Matua – f. 51: “*Ona fetalai atu lea o Iesu, ua faapea atu, Soia, ua lava lea. Ona tago ai lea o ia i lona taliga, ua faamalolo ia te ia.*”

O le feteena'iga o manatu ma lagona i taimi o le vevesi, e ta'oto mai ai se faai'uga o se mea ma manino ai le tulaga o loo aga'i i ai mafaufauga. O le naunau atu o le au soo e puipui lo latou Alii o Iesu Keriso, na i'u ai i se faalavelave e le'i mafaufauina. Ae ui lava i lea, o le vavao atu o le Alii ma ia toe faamalolo le taliga o lea tagata, na manino ai o ia lava o le ala moni i le faaolataga. I taimi o le vevesi ma faigata, na aumai ai e le Alii le tali o le filemu ma le faamagalo. O mea tiga e tutupu i le ola e faaalai ai le silisiliese o le Alii. O mea e faia e le Atua i le tatou ola, tatou te ofo ai, a e faaalai ai o ia o le ala tatou te mapu ai.

Tatalo: Le Alii e, faamolemole fesoasoani mai ia ou maua se vaaiga manino ia te oe ma le ala vaapiapi e tau atu i le ola. **Amene!**

Aso Toona'i – Aperila 12: “Loto tele” (Take heart)

Tusi Faitau – Luka 22:54-62

Matua – f. 62: “*Ona alu ai lea o ia i fafo, ua tagi lotulotu ia.*”

O le fa'afiti o Peteru ia Iesu o se tulaga faigata ona o lea taimi ma mea na tutupu ai. O le manatu ta'atele i le au faitau, o le fefe lava o Peteru i le oti, na mafua ai ona ia fa'apea. E ui lava i le mafanafana o le mafutaga sa iai, ae ua leai lava se mea e mafai ina ua fa'atumulia i le fefe ma le le mautonu. Mulimuli ane sa alu i fafo Peteru ma tagi lotulotu ai. O lea tagi lotulotu sa iloa ai mafatiaga o le loto ona ua leai se loto tele e tautala ai i le mea moni. O le tagi lotulotu e fa'aalia ai mafatiaga o le loto ona ua iloa le tele o a'afiaga o le lumana'i ina ua leai se loto tele e fai le fa'aiuga sa'o.

Ia maua pea le loto tele e fai le mea sa'o. E le afaina le tagi, a ia iloa manino i le loto le loto tele e fai le fa'aiuga e lavea'iina ai nisi tagata, aemaise o oe lava. Ia mafaufau pea i le Atua i aso uma, e na te aumaia le loto tele e filifili ai i le mea sa'o ma le mea e tatau ona fai.

Tatalo: Ia e alofa mai ia i matou pe a matou to'ilalo ia te oe. Faalautele mai le alofa tunoa ia i matou pe a matou le fautua mo oe. **Amene!**

O LE EVAGELIA A LUKA (2) – THE GOSPEL OF LUKE (2)

2. Faaauau le Vaiaso Paia (Holy Week continues)

Aso Sā Laupama

Aso Sā – Aperila 13: “Maufetuuna'i i taimi o fouvalega”

Tusi Faitau – Luka 22:63-65 (Revolutionary resilience)

Matua – f. 63: “*O tagata ua taofi ia Iesu, ua latou tauemu ma sasa ia te ia.*”

I le Vaiaso o puapuaga o le Alii, tatou te ulu atu ai i se taimi o manatunatuga, salamo, ma le faamoemoe i le olioli o le Eseta. Peita'i, e tatau

ona tatou savavali muamua faatasi ma Keriso e ala i le manatua o ona puapuaga.

E pa'i i le fatu tala o le toe fouvalega o le Alii o Iesu Keriso. O le vaitau ma le mea na tupu ai e le faagaloina i le loto. O le mamafatu o puapuaga ma mea leaga sa oo ia te ia, ae na onosa'i ma talia ina ia lavea'iina le lalolagi agasala. Ma'eu le alofa e fatu mai i mea tiga o le ola. O le manuia ma le faaolataga ua maua i le lalolagi, e le ona o se tele o se tamaoaiga poo se poto, a e o le tele o le alofa e ui mai i le amusia ma le tauemua.

Tatalo: Le Alii e le Atua, fa'amumūina i totonu ia i matou le malosi fa'afouina o Keriso. foa'i mai le lototele e feagai ai ma tofotofoga. **Amene!**

Aso Gafua – Aperila 14: “Ua faaletonu le maota fonu”

Tusi Faitau – Luka 22:66-71 (*Council in crisis*)

Matua – f. 67: *“Afai o oe o le Keriso, fai mai ia ia te i matou. Ona fetalai atu lea o ia ia te ia latou, Pe afai ou te fai atu ia te outou, tou te le talitonu mai lava.”*

O se tala faatauana a e le o se fia malamalama o le au ositaulaga ma le motu o tagata ia Iesu. O faiga faapolokiki o loo afifi mai ai i totonu ma lagona tumau i mea ua masani ai. O le fesili faatauana i se tali se'i fai ai se moliaga ina ia soloia le manatu o le Ali'i, a ia faatumauina le pule ua ia te i latou. O le fesili ia Iesu, ia ta'utino mai se'i molia ma faafalepuipui, a e faasaoloto mea tuai o le olaga ua masani ai. O le tali a le Alii, e lē ina ia faatupu se vevesi, a ia faamanino le mea sa'o e tatau ona faalogo iai tagata. Ua silafia e le Alii poo le a lava lona tali, e le suia ai le mafaufauga taulamalama na omai ma tagata faatupu vevesi ina ia malō o latou manatu ma lagona i mea ua latou loto i ai.

Tatalo: Le Atua Silisiliese, foai mai le loto tetele e faamamalu ai lo matou tofi faaleagaga; ia matou viia oe e le aunoa. **Amene!**

Aso Lua – Aperila 15: “Ua fememea'i Pilato” (*Pilate perplexed*)

Tusi Faitau – Luka 23:1-7

Matua – f. 4: *“Ona fai ane lea o Pilato i le au ositaulaga sili ma le motu o tagata, Ou te le iloa se mea e sala ai lenei tagata”*

Faateia Pilato le kovana o Roma ma ta'ita'i o Iutaia, o ē e feita ia Iesu ma tuua'ia Iesu i fouvalega ma le alo ese mai i lafoga; ina ua tali mai Iesu i ala o le filemu. O lea tali a Iesu na tupu ai le fememea'i i le mafaufau o Pilato auā ua le o fa'atasi uiga ma le mafaufau o le Ali'i ma tu'uaiga ua feagai ma ia. O le le mautonu o Pilato na ia ta'utino ai e le sala le Ali'i, ae tu'uina atu pea ia Herota. O se fa'aiuga ua fa'alua fesasi ona ua o fa'atasi le talitonu i le mea sa'o ma le fefe i tagata.

O le faia o fa'aiuga sa'o ma tumau i le mea amiotonu e sa'oloto ai le mafaufau ma lagona ma maua ai fo'i le tino maloloina. Aua le saisaitia fa'aiuga lelei ona o le vaai atu ma le vaai mai o tagata. Ia lafoa'i i le Ali'i e fesoasoani mai i fa'aiuga fai e manuia ai.

Tatalo: Le Atua e, foa'i mai le malosi e faaaliala ai le paia o Iesu. Ia ta'ita'ia i matou e lou Agaga, ma faapa'iaina i matou e pei o oe. **Amene!**

Aso Lulu – Aperila 16: “Filemu faapei o lē faatupu vevesi”

Tusi Faitau – Luka 23:8-12 (*Silence as sedition*)

Matua – f. 9: “*Ua fesili mai o ia ia te ia i upu e tele; a e lei tali atu e ia se upu ia te ia*”

E tele ni uiga e faamatala ai se tagata e fai atu lava ni fesili a e le tali mai. O se tasi o uiga matautia e mafua ai ona le tali se tagata i ni fesili, o le mafaufau loloto lea i se faalavelave e fia faataunuuina. O le le tali atu o le Alii i fesili a Herota, e le taumate na lagalagā ai lagona o le ita ma le fia fasioti ia Iesu. O Iesu ua le tali atu ona o le alofa e moni i le lalolagi. E na te le faafetauia uiga o le lalolagi, auā ua manino i le Atua mea uma. O le lē tali o Iesu, ua faailoa ai le silisili o le silafaga a le Atua e auaoa ai. O paganoa filemu tatou te maua, e tatou te nonofo ai ma le filemu i o tatou loto ma vaavaai atu i le Atua ma lana faasinomaga i lo tatou ola.

Tatalo: Le Atua Silisili ese e, a'oa'o mai ia i matou le malosi faafouina o le filemu i luma o ē faafefe. **Amene!**

Aso Fu'a Amerika Samoa

Aso Tofi – Aperila 17: “O le faaletonu o le faitauina le to'atele”

Tusi Faitau – Luka 23:13-25 (*Perils of populism*)

Matua – f. 21: “*A ua latou alalaga mai, Ina faasatauro ia, ina faasatauro ia ia te ia!*”

O le matautia o le malosi o le faitau aofa'i o se vaega tele o tagata e ono suia ai se faaiuga ma aveesea ai le mea e tatau ona i ai. E le'i mafai e le malosi o Pilato ma lona talitonu ia Iesu, ona suia ai le valaau mai o tagata “*ina fa'asatauro ia, ina fa'asatauro ia ia te ia!*” E le o se tulaga lelei le alalaga mai o se fuainumera tele o tagata, ina ia faataunuuina se mea sesē ma le lē talafeagai. Ia tatou tatalo i le Alii e foa'i mai le malosi i o tatou loto e tetee atu ai i faiga le talafeagai faapea. O le leo o se to'aititi e alalaga i se mea amiotonu, e sili atu nai lo le mata'utia o se faitauaofa'i a e alalaga i se mea sesē ma mafuli ai lagona o tagata.

Tatalo: Le Atua e, ta'ita'i lo matou faatauvaai e le faamasinoga, ma saili le mea moni ma tu faasaga i faatosina a le faitauina a le to'atele. **Amene!**

Aso Faraile Lelei

Aso Faraile – Aperila 18: “O le faasatauroina o Keriso”

Tusi Faitau – Luka 23:26-49 (*Christ's crucifixion*)

Matua – f. 46: “*Ona valaau ai lea o Iesu, ua leo tele, ua faapea atu, Lo'u Tamā e, ou te tuuina atu lo'u nei agaga i ou aao! Ua na fetalai ia upu, ona to ai lea o lana mānava.*”

O le faai'uga lea o mea uma o le pologa o le lalolagi i faiga a le agasala. O le sa'olotoga ua i fanua. Ua vaeluaina le ie puipui o le malumalu, o le faailoga

o le avanoa sa'oloto e fesoota'i ai le tagata i le Atua soifua. **Ona to ai lea o lana manava**, ua i'u galuega ua teu le pale o le manumalo, ma ua to'ilalopopo le lalolagi. O se fe'au taualuga manumalo, a o se faamanatu mo le tagata ola e manatua pea. Ua to lana manava ma ua tatou maua ai lana faaolataga e faavavau.

Tatalo: Le Alii e Iesu, a o matou iloa le faaletonu o le lalolagi, matou te manatunatu i lau Afio. E ala i lou faasatauro, na e faaosofia ai se suiga tele. Talosia ia matou auai i lau suiga e tetee atu i faiga pi'opi'o i le alofa faalelagi. **Amene!**

Aso Toona'i – Aperila 19: “Iosefa ma Iesu” (Joseph and Jesus)

Tusi Faitau – Luka 23:50-56

Matua – f. 52: *“O ia lea ua alu atu ia Pilato, ma faanoi atu i le tino o Iesu.”*

O se moemitiga ua leva ona faananau i ai le loto o Iosefa. O le tala a Luka fai mai, o ia o le tagata sa fatalitali atu i le malo o le Atua. O le oo atu o Iosefa e faanoi le tino o Iesu e ave i le tuugamau, o le isi lea pine faamau i lona faatalitali i le malo o le Atua. O le tagata ua leva ona faatalitali i se avanoa e fai ai sona sao mo le finagalo o le Atua.

Saili avanoa lelei e fai ai se mea lelei mo le Atua. Ia maua pea le agaga o le faatalitali i le faasinomaga a le Atua, a e le o le malosi ma le oa ua maua. Ia tatou tatolo pea i le Alii ia oo mai lona malo, ma ia faia pea lona finagalo a e le o tatou loto.

Tatalo: Le Alii e, a o matou savalia ou ala i puapuaga ma le fanoanoa, foi le malosi ma le alofa e matou te tutū ai i taimi o luitau. **Amene!**

O LE EVAGELIA A LUKA (2) – THE GOSPEL OF LUKE (2)

3. Toe Tū (Resurrection)

Aso Sā Eseta

Aso Sā – Aperila 20: “Ua toe tū o Ia!” (He is risen!)

Tusi Faitau – Luka 24:1-8

Matua – f. 6: *“E le o iinei o ia, a ua tu; ia outou manatu i lona fetalai atu ia te outou, ina o i Kalilaia o ia”*

I le Luka matāupu e 24, o le vaveao o le Aso Sā o le Eseta, ua suia ai le pogisa o le Aso Toona'i. Ua ō mai fafine e uu le tino o Iesu. A e na latou maua le maa ua fuliese, o agelu i ofu pupula, ma ua folafolaina upu ua faamaufaailogaina ai le taeao o le Eseta: *“E le o iinei o Ia; a ua toetu o Ia!”*.

O le pogisa le tumau o le Aso Toona'i o le Eseta, e maua ai tala fou o le Aso Sā. Ua uma le faatalitali: o mea uma na folafola mai e Iesu e moni! E faapena foi le pogisa o loo feagai ma tatou i o tatou lava olaga, o le malamalama o le mana toetu o Iesu e mafai ona faamomomoina ma aumaia le ola ma le faamoemoe i tulimanu pogisa uma.

Tatalo: Le Alii e, aumaia le malamalama o lou toetu e faamalama-lamaina ai o maotu pogisa uma; ia matou tumau ai e faavavau. **Amene!**

Aso Gafua – Aperila 21: “Mafaufau loloto ma Manatunatu loloto”

Tusi Faitau – Luka 24:9-16 (*Pondering and wondering*)

Matua – ff. 15e-16: “... ona faalatalata mai ai lea o Iesu, ua o faatasi ma i laua. A ua punitia o laua mata, o lea ua le iloa ai o ia e i laua.”

O soo e toalua na o malaga mai Ierusalem ma aga'i atu i lo la aiga i Emau. O loo la'ua talatalanoa ma taumafai e mafaufau loloto i mea mata'utia na tutupu i le faai'uga o le vaiaso; ona faalatalata mai ai lea o Iesu, ma savavali faatasi ma i la'ua, a ua punitia o la'ua mata ua le iloa ai atu ai Iesu. E oo lava ia i latou na iloa tino Iesu i la le tino, sa tauivi e vaai i le upu moni, o Iesu ua toetu ma savavali faatasi ma i la'ua. E lē o se mea fou le avea o a tatou masalosologa ma popolega ma ala ua punitia ai le iloa atu o Iesu. Peita'i, e tataua ona tatou pipii mau i le upu moni, e le'i alu ese lava Iesu ma o tatou autafa; o loo ia savali faatasi ma tatou, i mea uma fo'i o loo feagai feagai ma tatou.

Tatalo: Le Alii e, faafetai i lou savali faatasi ma a'u i aso uma o lenei olaga. Fesoasoani ia ou iloa atu oe i aso uma. **Amene!**

Aso Lua – Aperila 22: “Ina ta'u maia ia te a'u” (*Tell me all about it*)

Tusi Faitau – Luka 24:17-24

Matua – ff. 18-19: “O le tasi o i laua e igoa ia Kaleopa, ua tali mai ia te ia, Pe na o oe ea lē aumau i Ierusalem ma le le iloa o mea ua tutupu ai i ona po nei? Ona fetalai atu lea o ia ia te i laua, O a mea? Ona la fai mai ai lea ia te ia, O mea ia Iesu le Nasareta, o le perofeta lea sa malosi i mea na na faia, atoa ma ana upu i luma o le Atua ma le nuu uma.”

O le tusi faitau o le asō, na fesili atu ai Iesu poo le ā le mea o loo la'ua talanoa i ai. Ua tali Kaleopa, ua e nofo ea i lalo o se maa ua e lē iloa ai mea ua tutupu i Ierusalem? Ona fetalai mai lea o Iesu, O a mea? Ina ta'u maia ia te a'u. Aiseā ua fesili atu ai Iesu i nei fesili? E faamautinoa ai le 'au soo i lo latou talitonuga ia te ia. Aimaie, ia faasoa atu o latou tigā ma faanoanoaga ia Iesu, a ua saunia lelei i latou mo le faaauauina o le galuega tala'i a le Alii, auā ua toetu manumalo o ia mai le tuugamau.

Tatalo: Le Alii e, faafetau i lou alofa tausii mai ma lou alofa saili mai e ala i mea tigā ma faanoanoaga o a matou loto. **Amene!**

Aso Lulu – Aperila 23: “Se taimi na faapupulaina ai”

Tusi Faitau – Luka 24:25-35 (*A lightbulb moment*)

Matua – ff. 31-32: “Ona pupula ai lea o laua mata, ua la iloa o ia; a ua mou o ia nai ia i laua. Ona la fetautalatala'i lea, E lei mu ea o ta loto i totonu ia i taua, ina ua fetalai o ia ia te i taua i le ala, ina ua faamatala mai foi e ia o Tusi ia te i taua?”

O le tusi faitau o lenei aso, o loo ta’ua ai le taimi na faapupulaina ai ni soo e to’alua na savavali ma le Alii i le ala i Emau, a e sa le iloa o ia e la’ua. Peita’i, ua faailoa e le Alii o ia ia te i la’ua, ma ua mu ai o la’ua loto ina ua manino ma faapupulaina mea uma. O lea na la’ua toe fo’i atu ai i Ierusalem, ma toe savalia maila e fitu i le vā o Ierusalem ma Emau mo le taimi lona lua i lenā lava aso e tasi. O lo la’ua naunauta’iga, ia tala’i atu i nisi o le au soo le tala fialia, ua la’ua vaai i le Alii toetu.

O le naunauta’iga lea a le Alii mo le au faatuatua uma, ina ia faapupula o latou mata, ma tala’i le talalelei o le Alii toetu manumalo.

Tatalo: Le Alii e, faafetai mo le taimi na faapupulaina ai o matou tagata pogisa. Faafetai mo le faaalua o lou Afio i taimi fitā. **Amene!**

Aso Tofi – Aperila 24: “O lē aumaia le filemu” (*The bringer of peace*)

Tusi Faitau – Luka 24:36-43

Matua – f. 36: “*O tautalatala i latou i nei mea, a ua tu mai Iesu lava i o latou luma.*”

O le tusi faitau o le asō o loo faamatala ai le atuatuvaale o le au soo ina ua latou vaai tino ia Iesu toetu. O le atuatuvaale ma le fefefe o le au soo ua iloa ai lo latou lē talitonu, ua toe soifua mai Iesu mai le tuugamau. Ua latou manatu o le agaga o loo vaavaai atu i ai, a e le o le tagata moni ua toetu mai. Ona fesili atu lea o Iesu mo se mea taumafa, ina ia aai faatasi o ia ma le au soo, ma faamautinoa ai i latou ua toe soifua mai o ia.

O Lona faatasi mai ma lona filemu ua lava lea e suia ai o tatou popolega ma masalosologa i se faamoemoe fou ma le faatuatua mo o tatou tulaga uma i lenei soifuaga.

Tatalo: Le Alii e, faafetai ona o lou faatasi mai ma lou filemu e suia ai mea uma. Faamolemole, ia faafilemuina o matou agaga. **Amene!**

Aso Faraile – Aperila 25: “O se meaalofo na folafolaina”

Tusi Faitau – Luka 24:44-49 (*A promised gift*)

Matua – f. 49: “*Faauta foi, ou te auina mai ia te outou le na folafolaina e lo’u Tamā; a ia outou nonofo i le aai, seia faaofuina outou i le mana mai lugā.*”

E lē taitai lava ona sesē le taimi a le Atua mo le faaooina mai o ana meaalofo ma folafolaga, ma e lē taitai foi ona ia afiina se mea sese. I le mau o lenei aso, ua tuuina atu ai e Iesu i le au soo le meaalofo o le malamalama; le auala ua faataunuaina ai mea uma na ia faamatala ia te i latou e uiga ia te ia. Ua ia tofia i latou e fai ma molimau e faamatala atu i isi mea ua latou malamalama i ai.

Ae o le meaalofo sili mo le au soo o le a mulimuli oo mai, ma e tataua ona latou nonofo i le aai e faatalitali ai. Ua faamatala mai e Iesu o le a auina mai e le Tamā le mana mai lugā—O le Agaga Paia—e faamalosia ma mafai ai e le au soo ona fesaga’i ma aso faigatā o i luma; ma tala’i atu le tala lelei o le toetū i le lalolagi atoa. E pei ona ia auina mai lona Agaga Paia i le au soo, e faapena

foi ona ia auina mai ia i tatou, mo lo tatou faamalosia ma le gafatia. O se meaalofo e na te lē mafai ona lē tuuina mai.

Tatalo: Le Alii e, faafetai ona o meaalofo lelei uma ma le atoatoa e sau mai ia te oe; auina mai le meaalofo a lou Agaga Paia mo aso uma. **Amene!**

Aso Toona'i – Aperila 26: “Alafa'i i lona mamalu”

Tusi Faitau – Luka 9:28-36 (*Awakened to his glory*)

Matua – f. 32: “*A ua moe gagase Peteru ma e ua faatasi ma ia; ua latou ala, ona latou iloa lea o lona pupula, ma tagata e toalua o e ua tutu faatasi ma ia.*”

Tatou te faai'uina lenei vaiaso e ala i le toe fo'i i tua i se mea tãua na tupu a o le'i oo Iesu i taimi o ona puapuaga. E manatu le to'atele o tagata su'esu'e o le Tusi Paia, o le vaaiga lea i le mamalu o le toetū o Iesu. E oo mai i le taimi lea, sa vaai le au soo ia Iesu a o savali, tautala, 'ai, ma momoe faapei o le tagata. O le mea moni, na latou vaai i vavega ma faalogo i ana faamatalaga uma, a o i luga o le mauga na latou maua ai se vaaiga i lona itu mamalu faalelagi.

Tatalo: Le Alii e, fesoasoani mai ia ou manatua taimi o feiloaiga faalelagi, vavega ma mea taua e lagolagoina ai au i aso masani. **Amene!**

O LAUU – TREES

1. O Laau mo le Ola (*Trees for Life*)

Aso Sā – Aperila 27: “O Laau” (*Trees*)

Tusi Faitau – Kenese 2:8-10

Matua – f. 9: “*Ua fetalai mai foi le Atua, la potopoto i le mea e tasi o vai i lalo o le lagi, ia iloa foi le eleele matutu; i le ua faapea lava.*”

O le asō o le a tatou tala faasoa ai e uiga i laau e tusa ma lo tatou tusi faitau. O suiga o le tau ma lagona popole i mea tutupu i lo tatou siosiomaga ua mafua ai ona faataua laau i lo tatou faasoa mo le soifua manuia. O laau, e i ai ona aa e ola lea i le eleele, e faatusa o le sootaga i le va o le lalolagi ma le lagi. O laau e ola i le nofoaga e i ai eleele matūtū. E maua ai okesene ma e faaititia ai le vevela o le la. O le totō'ina o laau e maua ai fo'i mea e ai.

O le tatou fuaitauga la o lenei aso, o le laau na faia e le Atua i le aso tolu, e maua ai meaai, o le laau foi o i ai ona fatu e pa'u i le eleele ma toe fua mai. I le ogatotonu o le fanua o Etena, na tuu i ai e le Atua le laau e fua mai ma lelei, ma le laau e iloa ai le lelei ma le leaga. E tofu nei laau ma sao i le faigamalaga faaleau faatuatua. E ui e i ai taimi e taumamao ai tatou ma le Atua, ma toe manatunatu ifo e faalatalata atu i le mafutaga alofa ma le Atua. Peita'i, o lenei lua vaiaso o le a tatou iloa ai a'oaoga i le taua o laau, i lo tatou ola fai soo, e ala mai i le Tusi Paia.

Tatalo: Le Alii e, faamalosia mai le alolofa ma amanaia laau. **Amene!**

Aso Gafua – Aperila 28: “Mauaa i le vai ola” (*Rooted in living water*)

Tusi Faitau – Salamo 1:1-6

Matua – f. 3: *“O ia foi e faapei o le laau ua totō i tafatafa ane o vaitafe, e fua mai ona fua i ona lava tau; e le toululu foi ona lau; e manuia foi mea uma na te faia.”*

O lenei Salamo o loo tatala mai lava i le upu “fiafia”. O lea fiafia e auala mai i se tulaga faamalieina e faaauau pea, ae na afua mai i le fesoota’iga loloto o le tulafono. O le tulafono sa mafai ona maua ai ulua’i tusi e lima o le Feagaiga Tuai. Mo Kerisiano, o lea tulafono sa faali tino mai ia Iesu: Ua ia te i tatou le Atua.

O lea fesoota’iga loloto ma le Atua na folafola mai i lea vaitau ma lea augatupulaga. O le fiafia ia Iesu e faapei o le ata na faailoa mai e le fai Salamo; O ia foi e faapei o le laau ua totō i tafatafa ane o vaitafe, e fua mai ona fua i ona lava tau; e le toululu foi ona lau; e manuia foi mea uma na te faia. Ua e maua ea le malamalama ia Iesu? Ua e maua ea le fiafia i le vai ola o loo faamatala e le fai Salamo?

Tatalo: Le Alii e, ia mauaa o matou loto i le loloto o lea vai ola ia mafai ona matou molimau ma le fiafia. **Amene!**

Aso Lua – Aperila 29: “Se anoanoa’i o laau” (An abundance of trees)

Tusi Faitau – Esekielu 47:6e-12

Matua – f. 12: *“O le auvai o le vaitafe i leaitu ma lea itu, e tutupu ai laau, e le uma lava o latou fua; taitasi le masina ma lona fuata, auā e tafe atu o latou vai ai le malumalu; efai foi o latou fua ma mea e ai, ma o latou lau e fai ma vailaau.”*

I le faaaliga na iloa e Esekielu, o le vai o loo opeapeai le malumalu i Ierusalema o le vaiola ualofia ai. Amata mai i lenofoaga maulalo, se ia oo ina lofia lona ala ma mea uma o i ai i le loloto o le vai. O le vai ua loloto e foliga maiua tumu i le ola e aveama fesoasoani i soo se galuega tele. E lē na o se vaega o auvai e tafe atu i ai lenei vai, o nofoaga maulalo e tau atu i le sami, e oo foi i mea e aupito i sili ona maulalo i le lalolagi e leai se mea e ola ai o le a mafai ona faaolaina i lea vai ola. O auvai ma alavai ola uma o le a i ai laau, e tutupu ma ola lausiusi e maua ai laulaau mo faamalologa ma meaai mo le tausiga o le tino. O lea faaaliga o loo aumaia ai se feau i le toe faafouina e le Atua o laueleele ma laau ua mamago, lea na iloa e Esekielu i le faaaliga e ala ifogāleele ma ivi ua matuāmamago (37:1-10).

O le faafouina lea manino i ia Iesu i le toe faatuina o Lasalo mai le oti (Ioane 11). O le ata i se foafoaga fou, o le vai palapalā o le a avea ma vai mamā. O fogāleelele ua matutu ma laau mamago, ua i ai le vai ola. Ma, o le a mafai ona fesoota’i ai le foafoaga ma tagata i lea vai ola.

Tatalo: Le Atua e, fesoasoani ia te i matou ia maua lea vai ola ma le fiafia e faavavau. **Amene!**

Aso Lulu – Aperila 30: “Fufui-Vaomatua” (Forest-bathing)

Tusi Faitau – Isaia 41:17-20

Matua – ff. 19-20: *“Ou te avatu i le laueleele lafulafua le arasi, ma le setima, ma le atasi, ma le laau e maua ai le suauu; ou te tuuina atu foi i le toafa o le perosi, o le titara, faatasi ma le tasura;...ina ia latou vaai, ma latou iloa, ma mafaufau, ma faautauta faatasi, o le aao lava o le Alii na faia ai lea mea, o le Paia o Isaraelu ua na faia lava.”*

Fufui-Vaomatua, o le toe taumafai lea e faafesoota'i le lagi ma le lalolagi o foafoaga o le Atua. O va o laau eseese, laau ma manu, e oo foi i le tagata. E mafai ona tatou toe fesootai ma lo tatou faasinomaga po tulaga masani i le lalolagi i le ofoofogia o vavega o le Atua e ala i le toafa. I le ogatotonu o se vaomatua, o loo maua ai le fiafia i aso taitasi i totonu o laau, ma ua mafai ai foi ona faaleleia atili ai lo tatou aafiaga i nisi mea tutupu, e pei o faama'i. A o le faatasi mai o le alofa o le Atua, e tatou te maua ai le filemu ma le saogalemu.

O lenei faasoa ua ala mai i tusitusiga a Isaia, e faamautinoa mo Isaraelu a o i ai i le tafeaga i Papelonía, e lē tuulafoaina e le Atua lo latou feagai ai ma le vaomatua. E tali lava le Atua i o latou tigā ma aumaia le ola i o latou aafiaga i le vao. O se folafolaga faamalosi 'au ma e manaomia tele inaia tuuina atu i se nuu, aiga, ma nisi o vaivai ma le lē tagolima. Ia tumau pea i le Atua ma le faatuatua e na te le tuulafoaina ona tagata.

Tatalo: Le Atua e, matou te faatuatua i lau feagaiga e ta'ita'ina pea ai matou i ou aao alofa. **Amene!**

Aso Tofi – Me 1: “Ta'ita'iina: O le arasi ma le satauro”

Tusi Faitau – Esekielu 31:3-9 *(Leadership: the cedar and the cross)*

Matua – ff. 3a, 6: *“Faauta, o Asuria o le arasi ia i Lepanona, ua matagofie ona la, ua malu foi lona paolo,...Na ofaga manu felelei uma i ona lālā, na fanafanau foi manu tataa uma i lalo ifo o ona la; sa nonofo foi nuu tetele uma i lalo ifo o lona paolo.”*

O le laau arasi ua fa'amatala ai se ta'ita'i taua, a o se tupu po o se malo malosi. O le laau e umi lona ola ma e au tausagā. Ua faatusa ai e Esekielu le malosi o le malo o Asuria e pei o le arasi i Lepanona, o le la'au e sili ona malosi. O le laau arasi e malosi ma e mafai ona ofaga i ai manulele ma faamautu ai i taimi o afā ma faapaologia i le vevela o le la. O Iesu, na ia fa'atulagaina lelei le olaga ma fa'amatala uiga faata'ita'i i lona naunau atu i tagata uma ia mulimuli atu ia te ia. E le o le malosi o le arasi ae o le satauro le laau to'ilalo na fai ma ata o le faaolaina.

Tatalo: Iesu le Alii faaola, a'oa'o mai pea i ala o le manuia ma le filemu. **Amene!**

Aso Faraile – Me 2: “O le nanamu o le vai” *(The scent of water)*

Tusi Faitau – Iopu 14:7-9

Matua – ff. 8-9: *“E ui lava ina ua leva ona aa i le eleele, ma ua mate lona tafue i le eleele, a e toe tupu ae i le susū o le vai, ma tutupu ona la, e pei o le laau tupu.”*

E eseese ituaiga laau ma e le tutusa o latou tupu. O isi o laau e tutupu a’e i lugā, o isi e lapotopoto, a o isi foi e tupu maulalo. E i ai foi laau eeseese taimi ma vaitau e ola ai, a e ui i le eseese o le taimi ma le vaitau e tutupu ai. A o loo i ai se mea lilo ma le paia i le tuputupu a’e ma le ola o le laau. E foliga faapea le soifuaga o le tagata. E lē tumau, e iai taimi e lagona ai le vaivai, ma fetaiai ai i faafitauli. E faapei o le tauiviga a lōpu i ona tiga ma ona mafatiaga. E ao ona manatunatu mamafa le tagata i le Atua e auala mai ai le ola. O le nanamu lena ma le taua o vai i lo tatou ola i aso uma.

Tatalo: Le Alii e, faafetai i le vai ua e aumai e matou te mautinoa ai lo matou ola i aso uma. **Amene!**

Aso Toona’i – Me 3: “O le Laau o le ola” *(The tree of life)*

Tusi Faitau – Faaaliga 22:1-5

Matua – f. 2: *“O i le moa o lona ala tele ma itu taitasi o le vaitafe le laau o le ola, o loo fua mai i fuata e sefulu ma le lua, e taitasi le masina ma fua mai ai lona fuata; o lau foi o le laau e faamalolo ai nuu.”*

Faaiuina lenei vaiaso i lo tatou toe to manatu i le ulutala o le Aso Sa ua te’a atu nei, laau o le ola (tree of life). O lea ulutala na mafua mai i le faaaliga na iloa e Esekielu o le laau o le ola. Na amata i le vai o le ola ua lofia ai le Malumalu ma fua mai ai le tele o laau. O lea la ua tatou taualuga mai i le tusi o Faaaliga, o le tusi mulimuli o le Tusi Paia. Ua faaalila le laau o le ola e foliga mai ua toe fuataiina ma faateleina. Mo Kerisiano, o le laau ua talafaatusa o le ola e maua o Iesu Keriso. E le gata ua faatusaina i le satauro le laau o le ola, ae ua faatusaina foi Keriso o ia lava o le ola. O lē na te fafaga, fa’amalolo, toe fa’afo’isia, puipui ma fa’aola.

Tatalo: Le Alii Iesu e, ia aveia pea lea laau ola e faamanatu ai le auai mai o lau Afio. **Amene!**

O LAU – TREES

2. O laau o le malae *(The trees of the field)*

Aso Sā – Me 4: “Lalo o le vine ma le mati” *(Under the vines and fig trees)*

Tusi Faitau – Mika 4:1-4

Matua – ff. 3e-4: *“...ona latou tu’i ai lea i a latou pelu e fai ma uamea o suotosina, o latou tao foi e fai ma polo teu vine; e le sii atu foi le pelu e le tasi nuu i le tasi nuu, latou te le toe a’oa’o foi i taua. A e taitasi ma nofo i lalo o lona vine, ma lalo o lona mati; e leai foi se na te faamatau mau; auā ua faapea ona tūlei mai ai le siufofoga o le Alii o ‘au.”*

O le vine ma le mati e tele i Sasa’e Tutotonu, ma e faatusalia lea i le ola manuia o tagata; e suamalie ma e mafai ona ofaga i ai manu, ua faatumulia ai

tagata uma i le fiafia tele ua olioli. O lea foi la ua faatusa le vine ma le mati i le soifua maloloina o Isaraelu. O le a fai Isaraelu ma malo e toomaga ai e puapuagatia, e fai foi ma mauga maua luga. Sa faa'oga foi e Iesu o laau e faamatala ai se talafaatusa e ala i ana a'oa'oga, e fai lea ma faa'oa'oga i lona nuu, ia tuputupu a'e pea ma fua mai.

O lona uiga, ua tatou vaavaai i le faaaliga na iloa e Mika i se taimi o le a tali atu ai tagata uma i le pulega a le Atua ma ola ai i le filemu ma le fealofani faatasi ai ma o latou tua'oi. O auupega o taua ua sulu i lona faamoega, ua fai foi ma suotosina e toe fa'aleleia ma gaosi ai tamao'iga eseese e mana'omia ona ola ai. E taitasi ma nofo i lalo o le vine ma le mati, o le faailoga o le sa'olotoga, ma le saogalemu ua tapena e le Atua. O i fea e te lagona ai le to'afilemu, saogalemu ma le sa'olotoga?

Tatalo: Faafetai le Atua, e ala i lea faailoga o le toe sosoo faatasi e maua ai le fiafia i aso uma. **Amene!**

Aso Gafua – Me 5: “Vine, laau tuitui, mati ma le laau talatala”

Tusi Faitau – Mataio 7:16-20 (*Grapes, thorns, figs and thistles*)

Matua – ff. 16-18: *“Tou te iloa i latou i o latou fua. Pe tau mai ea e tagata se fuifui vine mai le laau tuitui, po o mati mai le laau talatala? E faapea foi laau lelei taitasi ma fua mai i fua lelei; a o le laau leaga e fua mai i fua leaga. E le mafai i le laau lelei ona fua mai i fua leaga, ele mafai foi i le laau leaga ona fua mai i fua lelei.”*

O loo faaauau pea le faamatalaina o le vine ma le mati i le fuaitauga o lenei aso, ua faaiuina lea i le lauga a Iesu i luga o le mauga, ia faamalositia ai le 'Au Soo ia matala i perofeta pepelo. I le avea ai ma Soo po o le Kerisiano, pe ua ōgatasi ea o tatou upu ma o tatou gaioiga i le ola fou ua ia aumaia? Po ua tatou fuaina ea ni fua maloloina ma lelei e iloa ai o loo tausia lelei afioga a le Atua? Po o a tatou upu ea ma amioga ua taitai ai tagata i ala o le Atua ia Iesu Keriso, pe liliu ese i aoga a Iesu ma taitai i ala sesē?

Tatalo: Iesu e, faailoa mai ou ala tonu e matou te savavali ai. **Amene!**

Aso Lua – Me 6: “Avanoa o ofaga” (*Nesting space*)

Tusi Faitau – Mataio 13:31-32

Matua – ff. 31e-32: *“...E tusa le malo o le lagi ma le fua o le sinapi, na ave e le tasi tagata, ma totō i lona fanua; e itiiti lava ia i fua o laau uma; pe a uma ona tupu, e sili ia i laau afu, e iu ina fai ma laau tele, e o mai ai manu felelei, ma latou momoe i ona la.”*

O nisi taimi pe a tatou vaavaai i le tulaga o le lalolagi, o faafitauli uma o loo si'omia ai i tatou i totonu o tatou lotoifale, atonu e mafai ona tatou lagona faaleiloaga ma le lē aoga pe faatauva'a foi. O lea vaaiga e iu ina tatou fesili ifo ia i tatou lava; 'O a ni auala e mafai ona avea ai lo tatou si'osi'omaga ma laau e sili ona aoga ma amana'ia e saogalemu ai lo tatou ola? Ua silia ma le afe tausaga talu ai, ua salalau atu le Ekalesia Kerisiano i le lalolagi atoa ma o loo

faaauau pea ona tupu e o’o mai i le aso nei. Mai i se vaega toaititi lava, a o lea ua soo ai le lalolagi atoa.

Mo le ‘au faatuatua uma i le Atua soifua, aua le fiu! E tatou te le iloa pe faapefea ona galue le Atua i le ola e faatupu le Ekalesia. E pei ona fetalai Iesu, i le itiiti o le fua o le sinapi, na avea ma fatu ua tupu a’e ai le laau e olaola tetele. Ua fai ma laau e ofaga i ai manu lele, ma latou momoe ai. O lona uiga e leai se mea e faigata i le Atua.

Tatalo: Le Atua agalelei e, fesoasoani i o matou lagona, ia matou talitonu e te mafaia mea uma. **Amene!**

Aso Lulu – Me 7: “Ua alaga fialia le foafoaga atoa” (*All creation rejoices*)

Tusi Faitau – Isaia 55:12-13

Matua – f. 12: *“Auā tou te o atu ma le fialia, e ta’ita’iina foi outou ma le manuia; o atu mauga ma mauga e leo tetele ma le alaga fialia i o outou luma, e pāti lima foi laau uma o le vao.”*

I la tatou faitauga mai le tusi o Isaia, o loo vaavaai le perofeta i se taimi vave e faasa’oloto mai ai tagata o le Atua mai le tafeaga i Papelonía, ma latou toe foi i Ierusalem. O lea saolotoga ua avea ma mafuaaga o le olioli tele, e le na o le toe foi; a o le toe faaleleia o le foafoaga atoa. O le a faatumulia tagata uma i le lagona o le fialia ma olioli ina ua latou maua le faailoga o le saogalemu. A o sauni le faigamalaga a Isaraelu e toe foi, ua pati lima laau uma ma le olioli. O fegaoiaiga uma o le laufanua e faamanatu ai le alofa ma le tautinoga faamaoni o le Atua e faavavau lea i ona tagata. Ua faasa’oloto mai le Nuú o le Atua i le pologa ma le tautaitai tu’i i le tafeaga.

E vivii le natura i le na faia i latou ma e faalagolago i ai mo le togioa e ala i aao alofa o le Atua foafoa (Roma 8:22–23). O laau, vao, e oo lava i le tagata e ao ona tapua’i i le Atua o loo soifua pea i so o se auala, ma mafaufau loloto i lona alofa e le tuulafoaina i latou.

Tatalo: Faafetai le Atua, aua e ui e faagalo oe i nisi taimi o lo matou ola. A o lou aao o loo faasaogalemu ai i matou. **Amene!**

Aso Tofi – Me 8: “Iesu Keriso le laau apu” (*Jesus Christ the apple tree*)

Tusi Faitau – Pese A Solomona 2:1-5

Matua – f. 3: *“E pei o le moli i totonu o laau o le vao, o loo faapea lo’u manamea i taulelea. Na ou fialia i lona paolo, ma ou nofo ai; na suamalie foi ona fua i lo’u gutu.”*

Ua faamatala mai le Pese a Solomona se talanoaga matagofie i le va o ulugalii le tane ma le fafine. O nei talanoaga o loo auamaia ai se ata faatusa o le mafutaga o Kerisiano ma Iesu. O Iesu o le paolo lea i taimi e vela ai le la. E malie ai le fia galala i ana a’oaoga. O Iesu e na te aumaia le tofo suamalie e faatumauina ai pea le matagofie ma le ola faafouina. O se ata alofa, e puipui, ma faanofilemu loto o e mafatia. O lea ata faatusa e maua ai le filemu ma le mautino i le ola fai soo.

Tatalo: Iesu e, ia e faamatala atili lou alofa i o matou loto ia matou ola ai ma le mautinoa. **Amene!**

Aso Faraile – Me 9: “Olaola faatasi i totonu” (*Grafted in*)

Tusi Faitau – Roma 11:17-25

Matua – ff. 17-18: “*Afai foi na gau'i ese nisi ona la, a o oe o le olive vao, ua faapipiina oe ia faatasi ma i latou, ma ua tofu faatasi ma i latou i le pogai ma le sua o le olive, aua e te faasiasia i ona la; afai foi e te faasiasia ia e manatu ua le ola le pogai ia te oe, a ua e ola i le pogai.*”

Olive o se laau malosi lea i tala faamaumau i Sasa'e Tutotonu o Metitirani. E mafai ona ola i se tausaga pe a ma le faitau afe. E mafai ona totōina, ma e mafai foi ona ola i le vao. O lea fuaitauga, o loo tusi atu ai Paulo i le uluai Ekalesia i Roma ma faaali atu ai i Kerisiano o nuu ese lea ua faapipii i le a'a e tasi ma avea o se laau tele, e pei o Kerisiano o loo tofofi e tagata lutaia. O lea sulu malamalama o loo fa'amalosia ai le tasi laau e faapipii ma le isi, ia ola fa'atasi e maua ai se la'au sili atu le soifua maloloina.

Tatalo: Faafetai le Alii e, i lou faamanatu mai le taua o itu tino e tele ua aoga i lou lava tino. **Amene!**

Aso Toona'i – Me 10: “Laau o le amiotonu” (*Oaks of righteousness*)

Tusi Faitau – Isaia 61:1-3

Matua – f. 3e: “*...E igoa i latou, o laau o le amiotnu, o le faatoaga a le Alii, e fai mona viiga.*”

Ua iloa e le perofeta o Isaia le Agaga faauuina o le Atua, o lē na te aumaia le tala lelei, faasaoloto, ma toe faafoisia ma faamāfanafana. O le folafolaga e faapea o i latou ua aveesea mai i le laueleele o le a avea ma laau o le amiotonu. Laau malolosi na totōina e le Ali'i, ua mautu, mausalī ma tumau. O le fuaitau lea na faitauina e Iesu i le sunako i Nasareta ma faatatau ia te ia lava (Luka 4:16–19). O Iesu o le Tala Lelei lea e aumaia le faaolataga, e ala mai ia te ia lava. E mafai ona tatou vaai ese mai i le nutimomoia, faavauvau ma le faatagataotaua, i le tutu faatasi ma le mautinoa; e mafuta loloto i le alofa o le Atua ona ola ai lea ma le atoatoa.

Tatalo: Le Atua e, faauuina i matou i lou Agaga Paia. **Amene!**

FAITAUGA I LE IOSUA – READING IN JOSHUA

1. O i Totonu o le Nu'u na Folafolaina (*Into the promised land*)

Asa Sā Tinā

Aso Sā – Me 11: “Folafolaga, folafolaga” (*Promises, promises*)

Tusi Faitau – Iosua 1:1-18

Matua – ff. 2e, 5e-6: “*...O oe, atoa ma lenei nuu uma, e o i le nuu ua ou foaina atu ai ia te i latou, o le fanauga a Isaraelu lava...ou te le tuua lava oe, ou te le*

tuulafoai lava ia te oe. Ia e faamalosi ma loto tele; auā e te tofia mo lenei nuu le laueleele na ou tauto ai i o latou tamā e foai atu ia te i latou.”

O le tautinoga a le Atua i le nuu folafolaina, e ala i le fanauga a Isaraelu, o se faailoga lea i le toe faafoisia o lo latou faiā ma le Atua. Ua faamanuia ai Isaraelu e le Atua. Ona o le alofa, na amata ai e le Atua lana feagaiga o le toe fuataiga ia Aperamo (Kenese 12, 15 ma le 17) ma, ina ua mavae le tupulaga muamua, na taitai atu ai lea e Iosua tagata o le Atua i lo latou nuu folafolaina. Peitai, o lea laueleele e sili atu nai loo se nofoaga; o se faata’ita’iga lea o le foafoaga fou, lea ua latou aumau ai ona o le tautinoga o le Atua mo ona tagata (Faaaliga 21:3). O le folafolaga lea ua tofusua ai i latou e toe faafo’isia le atoatoa o le fanau a le Atua.

E taumānatunatu pea, o a ni lagona na oo ia Iosua ina ua tofia o ia e le Atua e faaaau le savaliga o Isaraelu? Na silafia e le Atua e matautia le ala o le a savalia e Isaraelu, ona toe fai atu lea ia Iosua ina ia faamalosi ma lototele, ma folafola atu le auai o le Atua ma faatasi mai i latou i so o se mea e latou te malaga ai. O lona Agaga Paia e taitaiina ma faamafanafanaina le faigamalaga.

Tatalo: Iesu le faaola e, fesoasoani ia matou faamalolosi ma talitonu e te faataunuu le tautinoga. **Amene!**

Aso Gafua – Me 12: “Aua nei vavevave ae vaavaai muamua”

Tusi Faitau – Iosua 2:1-24 (*Look before you leap*)

Matua – f. 9: *“Ua ia fai atu foi i ia tagata, ua ou iloa ua foaiina atu e le Alii le nuu ia te outou, ma ua oo mai lo outou matautia ia te i matou, ma ua faavaivaia ona o outou o i latou uma e nonofo i le nuu.”*

O i le fea le ituaiga tagata e te i ai, o se tagata e vavevave, pe faatuai sei vaavaai muamua? O lea fuaitauga e aumai ai se ata o le tagata e faatelegese ona faaiuga. O le auina atu o se tagata vaavaai(spies), ua aumaia ai se ata faatusa o le tagata poto e fuafua lelei ona faatatau i faafitauli tutupu. A o tatou malaga pea faalefaatuatua, e mafai ona tatou tau atu i le pa e pei o Ieriko. Peitai, o le vaavaai muamua e mafai ona fesoasoani i o tatou manatu e saunia i tatou mo faafitauli. A o le faalagolago i le Atua o le ki lea e manumalo ai. O le atamai faaletagata vaai a Iosua sa galue faatasi ma le Atua, na faamaonia i le molimau a Raava lea na ia faapea *‘ua ou iloa ua foaiina atu e le Alii le nuu ia te outou,’*

Tatalo: Le Atua e, a o matou malaga pea i lenei tausaga. Ia faamalosi ia matou e faalagolago atu i lau Afio. **Amene!**

Aso Lua – Me 13: “E faateia oe pe afai e te faatasi ma le Atua”

Tusi Faitau – Iosua 3:1-17 (*When God is with you, expect to be amazed!*)

Matua – ff. 10a, 13e: *“Ua fai atu foi Iosua, O le mea lenei tou te iloa ai ua ia te outou le Atua soifua...o faitalaga o e ave le atoalaau a le Alii, le Alii o le lalolagi uma, ona vavaeina ai lea o le vai Ioritana, o le vai e tafe ifo mai luga; e tu foi le vai e pei o se mea maupuepue.”*

O le to'atele o tagata Isaraelu i lea vaitau, na ona faalogo i tala o le vaeluaina e le Atua o le Sami Ulaula, ae lei vaai tino i ai. Peitai, na faia e le Atua se ala i le vaitafe e faafeagai tonu lava ma lo latou taunuuga i Ieriko, ona matata'u ai le o i latou aua ua vaai tino i latou i lea vavega. E mana'omia e tagata le mulimuli i upu moni e ala i le faatuatua. O le tala lea ia Isaraelu e mafai ona fa'aosofia ai le loto tele ma faamalosi pea tagata faatuatua e talitonu ma faatuatua e faatino e le Atua vavega tetele.

Tatalo: Faamalosi o matou tagata e talitonu i au vavega. **Amene!**

Aso Lulu – Me 14: “O le folafolaga mo se tupulaga fou”

Tusi Faitau – Iosua 4:1-5:1 *(The promise for a new generation)*

Matua – ff. 21-22, 23a: *“Ua ia fai atu foi i le fanauga a Isaraelu, ua faapea atu, ‘A fesili mai i se aso a outou fanau i o latou tamā, “Pe se a le uiga o na maa?”... ia faapea atu, Na soipoia mai Ioritana nei, e Isaraelu i le iliti vai matutu.” Auā na faamateina e le Alii lo outou Atua le vai o Ioritana i o outou luma, ina seia tou soipoia atu...”*

Ina ua mavae le maliu o Iosua, na tupu a'e isi tupulaga fou e latou te lei iloa le Atua lea na faaola ia Isaraelu (Faamasino 2:8–10). O le tupulaga na tuua le vao sa mau faatasi ma le Atua ma iloa ua ia vaeluaina le Sami Ulaula, ae o le tupulaga na mulimuli ae e latou te le'i iloa le Atua na taofia le tafe o le vai Ioritana lea na soipoia e Isaraelu ma tuuina atu i le nuu folafolaina. Pe afai tatou te tuua lenei lalolagi, o le a faapefea ona iloa e tupulaga fou galuega a le Atua i o tatou olaga? E pei ona faamatala e le tusitala o le Fai Salamo 78 ma le 145, 'o fanau e fanau mai, ma tau atu i a latou fanau le Atua fai vavega, malosi, na ia vavaeina le sami ma le vai. O le ta'u atu isi tupulaga le Atua lea, o se poloa'iga (Mataio 28:19–20) a e tataua ona avea o se faanaunauga; ma se fiafiaga i se auala e faigofie ina ia aua nei galo ia i latou. E faapefea ona e manatua le Atua ma mea ua ia faia mo oe?

Tatalo: Le Alii e, faafetai i au galuega mamana ina ia faailoa atu pea lau Afio i lea tupulaga ma lea tupulaga. **Amene!**

Aso Tofi – Me 15: “O le faailoga o tautinoga a le Atua”

Tusi Faitau – Iosua 5:2-15 *(A sign of God's promise)*

Matua – ff. 8-9: *“Ua uma ona faaperitomeina o le nuu uma, ona latou nonofo ai lea i mea e nonofo ai i latou i le togalauapi, seia malolo ai i latou. Ona fetalai mai ai lea o le Alii ia Iosua, ‘O le aso nei ua ou aveeseina ai le luma o Aikupito ia te outou.’ O le mea lea ua faaigoa ai le igoa o le mea o Kilikala, ua oo i le aso nei.*

Atonu o se taimi aupito sili ona tāua lea mo tagata Isaraelu i lo latou toe foi i le laueleele lea na folafola e le Atua iā i latou. O le peritomeina o se faailoga lea o le feagaiga a le Atua, na muai tuuina atu ia Aperamo, o le a avea le nuu o Kanana ma tofi e faavavau mo ia ma ana fanau, ma e sili ona taua, o le a avea o le Atua ma o latou Atua. Ma, ua faamamaina i latou e le Atua. Na

soloiesea e le Atua le maasiasi, ma faamamaina e ulu atu i le laueleele folafolaina o le saolotoga. Ua na o le feagaiga fou o le toto o Iesu, lea ua fai ai o ia ma taulaga, e faamamaina ai i tatou pe a toe fanauina i tatou i le Agaga. O i tatou, ua ia Keriso, o se foafoaga fou (2 Korinito 5:17), ua le toe tausallaina mo a tatou agasala, po o agasala a o tatou tama.

Tatalo: Faafetai Iesu e, aua o lou maliu lea ua faamagalō ai o matou tagata agasala. **Amene!**

Aso Faraile – Me 16: “Faatafunaina pa malolosi”

Tusi Faitau – Iosua 6:1-14 (*Destroying strongholds*)

Matua – ff. 2e, 5: *“...Faauta mai ea, ua ou tuuina atu i lou lima o Ieriko, ma lona tupu, ma ona malolosi...A faalevave ona ili o le pu o le iupeli, pe a outou faalogo i le leo o le pu, ona alalaga lea o le nuu uma ma le leo tele; ona solo ai lea i lalo o le pa o le aai; ona o ae ai lea o le nuu uma taitasi i o latou luma.”*

Sa iā Iosua se ‘autau malolosi, le faitau afe o fitafita poto, ae na faaalua e le Atua lona mana lea na faailoa i ai latou e aua ne’i taumafai e talepeina lea o le pa i le faaaogā ai o lo latou lava malosi. O le faatoilaloina o Ieriko na manaomia ai lo latou faatuatua ma usiusitai i le Atua. O le filifili e mulimuli ia Iesu e manaomia ai le soifua atoa a e le na o se vaega itiiti o le olaga. Atonu o lea folafolaga e mafai ona tatou ulu atu i ai i se fogaleelele taua, e tusa lava po a toatuga e faatoilaloina ai, a e mafai ona faatafunaina e le Atua o lo ma pa o le agasala. Ua ia i tatou le Agaga Paia o le Atua e nofo i totonu ia i tatou. E tatau ona tatou usiusitai i lana ta’ita’iga, ma faalagolago ma le lotomaulalo i lana pule ma lona mana i lo tatou malosi, ma le poto masani.

Tatalo: Le Atua mamana e, uunaia o matou loto e sailiili i le loto matala i lau Afio. **Amene!**

Aso Toona’i – Me 17: “Faamaoni atoatoa i le tausia o folafolaga”

Tusi Faitau – Iosua 6:15-27 (*Wholly faithful promise-keeping*)

Matua – f. 18: *“A o outou, ia outou ma le mea ua faatoina; ne’i faatoina outou pe a outou ave se mea ua faatoina; ona outou faia lea o le togalauapi o Isaraelu ma mea ua faatoina; ma outou faatigaina ai.”*

Ina ua tofia e le Atua Iosua, sa ia faatonuina Iosua ina ia anaana i tulafono uma lava na tuuina atu e Mose lana auauna’ (Iosua 1:7). O le tulafono atoa o le Atua ua faatulaga mai ai se tulaga manuia, o le lelei mo tagata Isaraelu. Soo se taimi lava tatou te filifili ai ma le le usiusitai i lona finagalo, tatou te agasala, e faaalua ai lo tatou le mafai ona amiotonu. Fa’amama le tiga, ma le manatu e iloa le mea sili, ua le liliu atu i le Atua ae na ona faalagolago i le ‘poto’, poto ua maua, ma iu ai ina afaina le ola. I le ulufale atu o Isaraelu i le nuu folafolaina o le malo o le Atua ua na o se vaega. A e mautinoa le tumau pea o nisi o fanauga a Isaraelu i le agasala, ma le le ta’uamiotonuina; ua le mafai ona toe fa’afouina atoatoa. E tatau ona tatou tumau, ma talitonu ia Keriso lo tatou faaola seia taunuu atu i le manuia e faavavau.

Tatalo: Faafetai, le Alii e Iesu, ua avea lou maliu i luga o le satauro, ua matou mautinoa ai le malo i le taimi nei, ma le malo e faavavau. **Amene!**

FAITAUGA I LE IOSUA – READING IN JOSHUA

2. Ola i totonu o le Fanua (*Living in the Land*)

Aso Sā Taulaga Tele – Faiga Me o Pulega

Aso Sā – Me 18 “Sui faaali o le Atua” (*Representing God*)

Tusi Faitau – Iosua 7:1-15

Matua – f. 13: *“Ina tulai ia, ma faapaiaina le nuu, ma e faapea atu, Ia faapaiaina outou e outou taeao; aua o loo faapea ona fetalai mai o le Alii le Atua o Isaraelu, Isaraelu e, ua ia te oe le mea ua faatoina; e te le mafaia ona tu i luma o e ita ia te oe seia outou aveesea ia te outou le mea ua faatoina.”*

Na aauina e Iosua ni tagata asiasi i le nuu o Ai, ma se’i iloilo ai auala e manumalo ai le taua. Peita’i, o le manumalo i le Atua, e lē fuaina i se malosi; e le o le mana poo le pule, a o le Agaga o le Atua. E le mafai ona tatou fafaaina le malo a le Atua, pe afai e le mafai ona tatou mulimuli i ala o le Atua. O le mea lea ua faaletonu ai le nuu o Isaraelu. Ua agasala le nuu auā ua tala pepelo ona latou faaalua le ata o le Atua moni (f. 1). Ua le iloa e Akana le Atua, e lē alofa fo’i o ia i le Atua ma ua le iloa fo’i ona ala; ua faomea Akana i mea na faatoina mai Ieriko(ff. 20-22), ma ua ‘alo ese ai le Atua ma le nuu atoa. O le ute lea o le agasala, e tala pepelo ona faaalua atu le Atua moni, e lē gata mo i tatou lava ia, a e faapea atu fo’i i o tatou tua’oi. O Iesu na mua’i faaalua le ataata moni o le Atua; i lona lotomaulalo, lona alofa, aemaise o le tuueseina o lona sa’o a e faia le finagalo o le Atua.

Tatalo: Le Atua e, fesoasoani mai ina ia matou manatua pea lau Afio i a matou faatinoga. **Amene!**

Aso Gafua – Me 19: “O le totogi o le agasala” (*The wages of sin*)

Tusi Faitau – Iosua 7:16-26

Matua – ff. 16-17: *“Ona tulai lea o Iosua i le taeao lava, ma na faalatalataina mai o Isaraelu a itu aiga, ua maua le itu aiga o luta. Ua faalatalataina mai foi e ia o aiga o luta, ua maua e ia le aiga o sa Serā; ua faalatalataina mai e ia o le aiga o sa Serā ona tagata taitasi; ua maua Sapata.”*

O le faailoaina o agasala, o se gaioiga e tau atu i le ola po o le oti? O le ta’uta’u atu o agasala ma le faamaoni e faaosofia ai le alofa mutimutivale ma le faamagaloga e auala mai i le Atua (1 Ioane 1:8-9). E mafai ona avea lea gaioiga ma ala o le toe fuataina, e salamo ma le taliaina. E suia ai lagona o le popole ua tupu ai lagona fialia i taimi uma, ona ua tautino ma le loto fuatia ifo e faailoa le agasala. Ua suia ai manatu mai uiga sese o nisi, a e ua manatu ai lava le tagata i ia te ia lava mai i lona faaletonu. O le totogi ina o faaletonu ma agasala; i le faamaulalo o le tagata i ia te ia lava. Ua mafai ea ona totogi agasala, ina ua tautino ma le loto faamaoni?

Tatalo: Le Tama alofa e, faafetai i avanoa e mafai ona toe tapena ai o matou tagata ma tautino o matou lava faaletonu. **Amene!**

Aso Lua – Me 20: “O se fuafuaga poto” (*A cunning plan*)

Tusi Faitau – Iosua 9:3-21

Matua – ff. 3-4, 6: *“Ua faalogo e na nonofo i Kipeona i mea ua faia e Iosua i Ieriko ma Ai; ona latou fai togafiti faa’ole’ole lea, ua latou o, ma faataga tausavali;... Ona latou o atu lea ia Iosua i le toagalauapi i Kilikala, ma latou fai atu ia te ia ma tagata o Isaraelu, ua matou o mai nei mai le nuu mamao; o lenei, ia tatou faia se feagaiga ma outou.”*

E fetaiai pea le tagata ma le tele o faafitauli e tutupu i le soifuaga. O ia faafitauli e tupu ai lagona pe afai ua le fiasia se tasi i le isi. Ona taupulepule lea e filifili i se fuafuaga. O lagona o tagata Kipeona e fuafua e faia se faaleleiga ina ua lagona le popole, ina nei faatamaia le ola. Ua tatou vaavaai i lea fuaitau i se vaega se lua. Muamua, o le toatele o tagata o le nuu ua tuu ese a latou feeseeseaiga ma aufaatasi e tau ma Isaraelu. O nei fuafuaga o tagata Kipeona e faamalie ai Isaraelu ia aua nei oo le oti ia te i latou. Ma le vaega mulimuli, o lo latou faitogafiti, ua faasaoina mai ai latou a ua fai ma auauna o le Nuu o Isaraelu.

E lē mafai ona i’u lelei le tetee atu i ala o le Atua! E pei o le tala ia Saulo lea na tauaso i lona mapugata mai lea na ia tauaso faaleagaga ai: ‘Saulo, Saulo e, se a le mea ua e sauā mai ai iā te a’u? o le mea faigatā ia te oe ona aa i tui’ (Galuega 9:4–5; 26:14). I le iuga, ua faataunuuina le finagalo o le Atua, ma e mafai ona tatou maua le olioli ma le faamanuiaga o le galulue faatasi i le vaai atu ua faataunuuina, po o le tumau tauaso i le alofa o le Atua ma pologa i le lalolagi.

Tatalo: Le Tama alofa e, ia faapupula ina o matou mata faaleagaga mo se fuafuaga poto. **Amene!**

Aso Lulu – Me 21: “Tofia i la faatuatua” (*Inheriting by faith*)

Tusi Faitau – Iosua 13:1-14

Matua – f. 1: *“Ua toeaina lava Iosua, ua tele ona tausaga; ona fetalai mai lea o le Alii ia te ia, ua e toeaina lava, ua tele ou tausaga; e matua tele foi le laueleele o totoe e fai mo outou.”*

Ua toeaina Iosua ma e lei maea ana galuega, e lei maua uma foi e Isaraelu le laueleele ma lei tofia ina mo ituaiga uma o Isaraelu. I le fa’atuatua, e tatau ona faasoa atu vaega o le fanua. E iai mataupu silisili lelei e ta’ita’i ina ma le tatau le talitonu o galuega nai loo o lo tatou tauaveina. O le valaauina e ta’ita’i ma tauave tulaga faigata o le galuega. I se isi itu, o nisi lava e mātau le auala e pulea ai se malo. O le mea moni o lea ua uunaia e le Atua le vaevaeina o fanua i ituaiga uma o Isaraelu. Ia tuuina atu ai le matafai oi e faataunuuina ai lona finagalo i le Nuu folafolaina. O lea faiga autu, e aveese mai le faiga po o le vaaiga 'e fausia ai lo latou lava faigamalo. O se mataupu faavae na toe ta’ua

i le tusi o Neemia a o ia tuuina atu le matafaioi mo le toe fausia o vaega o le pa ua faatafunaina.

Tatalo: Faafetai le Alii e, ua e tuuina i matou i laufanua e galueina ma le fiafia. **Amene!**

Aso Tofi – Me 22: “Mamao ma mafutaga” (*Distance and relationship*)

Tusi Faitau – Iosua 22:10-31

Matua – ff. 24-25: “A e le o lo matou atuatuvaale ea i lena mea ua matou fai ai le mea nei, ua faapea ane, pe a fai mai i se aso a outou fanau i a matou fanau, e faapea mai, se a ea la outou na i le Alii le Atua o Isaraelu? Aua ua tuuina mai e le Alii o Ioritana e fai ma tuoi ia te i matou ma outou le fanauga a Reupena ma le fanauga a Kato; tou te le aia i le Alii; ona faateaina ai lea e a outou fanau a matou fanau ina ia latou le matatau i le Alii.”

O nisi taimi e faimalaga ese atu loa nisi o tatou aiga, ua mamao ma o tatou laufanua. Ua le toe galulue faatasi faapei ona masani ai, aua ua ese aganuu ua latou soifua ma ola ai. A ua i ai lagona e ta vavae ese ia tagata mai le lio o aiga. O se ata faapea lea o loo auamaia e le tatou tusi faitau o lenei aso. O nisi o ituaiga a Isaraelu lea ua tofia i le isi itu o Ioritana. Ua i ai se pupuni faaletino i le va o i latou ma tagata uma o le nuu ona o le le mautonu, ua lagona le fefe i mea e ono tutupu ae, ma oo ina tupu ai le masalosalogaga. O nisi nei o mataupu autu e faavae ai se fausia o mafutaga ma le faaleleiga: 1) O le naunau lea e faia feiloaiga ma faatalatalanoa mataupu o loo aafia ai le lagona o le fefe. E ese mai le lagona sa masani ai i le taimi muamua, ma le taimi lea ua aumau ai i nisi atunuu; 2) Ia fefaasoai i le eseese o lagona o le fefe. Ia naunau i le loloto o mafaufauga nai lo o le vaapiapi o lagona; 3) O moomooga o mafutaga ia toe mafuta. Ia tulaia atu i le tuufaatasia nai lo o le tuueseeseina.

Tatalo: Le Alii e, le Atua, o oe lava o le Tolu Tasi Paia. Fesoasoani ia matou momoo pea e faia sootaga o aiga. **Amene!**

Aso Faraile – Me 23: “Feagaiga ma taunuuga”

Tusi Faitau – Iosua 23:1-16 (*Covenant and consequences*)

Matua – ff. 2e-3: “... Ua toeaina lava a’u, ua tele o’u tausaga; a o outou o mea uma ua faia e le Alii lo outou Atua i ia nuu uma ona o outou; auā o le Alii o lo outou Atua o ia na tau ai le taua mo outou.”

E matuinoa galuega uma, e mafai e le Atua ona faamaea. O lea faiga o se faatinoga ia malamalama ai le tagata i le atoa o le faataunuaina ma le maea o galuega e tusa ai ma le mafutaga ma le Atua ma le feagaiga ia faataunuaina. O le faamatuu atu o galuega i tupulaga fou o se luitau e faatulai ai le fesili, e faapefea ona faataunuaina e tupulaga fou se galuega e pei ona tatou faia? O galuega lelei uma na mafai ona faatinoina o se vaega taua lea o tala e faatusalia ai matafaioi na faia e le Atua i aso, taimi, ma tausaga. Aua o se matafaioi e faatino ona o le alofa ua faamaoni.

Tatalo: Faafetai le Atua i lau feagaiga e faavavau ma e iai lona taunuuga.
Amene!

Aso Toona'i – Me 24: "O se feagaiga ua faafouina"

Tusi Faitau – Iosua 24:16-33 *(A covenant renewed)*

Matua – ff. 22-23: *"Ona fai atu ai lea o Iosua i le nuu, O molimau outou ia te outou, na filifilia e outou o le Alii e auauna ia te ia. Ona latou fai mai ai lea, o molimau lava i matou. Ona fai atu ai lea o ia, o lenei, ina tuu ese ia o atua ese ua ia te outou, ma uai o outou loto i le Alii le Atua o Isaraelu."*

E manino lava Iosua i uiga na faaalua e Isaraelu ia te ia, e foliga mai ua na o laugutu ua latou tautino ai, ae ua leai so latou loto. O le ala faamalosi lea o Iosua i a Isaraelu ia latou manatua le feagaiga ma lo latou Atua. E mautinoa lava ia Iosua le vave ona tauaso o Isaraelu i le Atua pe afai na o upu a e le o latou loto. O le ala toe tautala lea o Iosua *"o lenei, ina tuu ese ia o atua ese ua ia te outou, ma uai o outou loto i le Alii le Atua o Isaraelu."* O le augani lava o Iosua mo Isaraelu ia faafouina ai lo latou feagaiga ma le Atua, ma ia tumau ai se ia oo i le taunuuga.

Tatalo: Le Alii e, ia faasusulu ina pea o matou tagata i lou malamalama.
Amene!

O LE EVAGELIA A LUKA (3) – THE GOSPEL OF LUKE (3)

1. Galue mo le Malo o le Atua *(Working for God's kingdom)*

Aso Sa – Me 25: "A'oa'oga i galuega" *(On the job training)*

Tusi Faitau – Luka 9:1-27

Matua – ff. 1-2: *"Ua faapotopotoina e ia le toasefulu ma le toalua, ua tuu atu ia te i latou le mana ma le pule i temoni uma, ma ia faamalolo i ma'i. Ua aauina atu i latou e ia tala'i i le malo o le Atua, e faamalolo foi i e mamai."*

Soo se galuega, e a'oa'o ai le poto masani e faapitoa mo se tagata faigaluega. O lea faiga e mafai ona ta'ua e pei o le malamalama poo le sulu. O lea ua maua e Iesu lana afaigaluega. Ua a'oa'o lelei ma tuu atu le poto masani ia te i latou, e o atu e faatino lo latou valaauina. O vavega ma a'oa'oga a Iesu, o lea ua latou o malaga ma le faatuatua e faatunuu ma tufa atu o lea alofa uiga ese o le Atua. Ua latou toe foi ane, ona latou ta'u atu ai lea ia Iesu, o mea uma lava na latou faia. Sa tãua manatu faaalua, o se vaega tãua o lo latou aoaoga ua mafai ona aveia i latou, e tauaveina le mana o le Atua e ala i le galuega na amata e Iesu.

O le matagofie lea o se galuega e mafai ona faasoa le poto masani ia mafai ona faaauuina. O le ala lea na uuna'ia ai e Iesu le 'au soo ia mulimuli atu ia te ia, ia mafai ona manino le vaai ma ia malamalama i le mafuaga na afua ai ona faatino, ma le taua o le faalagolago atu i le Atua ma lona finagalo. O ala

na latou savalia e oo foi i tagata na faia ai le vavega, o aai foi ma lea aai, ua faatino ai le galuega a Iesu.

Tatalo: Le Atua alofa e, faafetai i meaalofo o le poto ua matou tufa ma faasoa ai. **Amene!**

Aso Gafua – Me 26: “Ua tatou i ai i se faigamalaga” (*We are on a journey*)

Tusi Faitau – Luka 9:37-45

Matua – ff. 44-45 : *“Ia outou matua faalogologo i nei upu, aua o le a tuuina atu le Atalii o le tagata i lima o tagata.” A ua le iloa e i latou lea upu, ua iloa ia te i latou, o lea na latou le lagona ai lea mea; ua latou matatau foi e fesili ia te ia i lea upu.”*

A tatou mafaufau alofa i le au soo, a o latou savavali faatasi ma Iesu, ma faalogo i ana a’oa’oga, ma olioli i le mafuta faatasi ma ia. Sa latou oo i vavega e tele ma toe foi ane ma le naunauta’i e faamanuiaina aoaoga faamisiona. A e ina ua oo i se taimi e fetaia’i ai ma faafitauli i le leo o se tamaitiiti e pei ua tuulafoaina e lona tama i le eleele. Ua faafuasei lava ona mou atu o le malosi, e pei ona faamanino mai i le tagi lotulotu o le tama i lona atalii ua ulufia e temoni. O lea manatu ua sese ai le au soo, aua ua ia te i latou mana, a ua latou le faatuatua i ai.

Tatalo: Iesu le faaola e, ia aoaoina i matou i le ola tofotofoina e tupu tele ai le faatuatua. **Amene!**

Aso Lua – Me 27: “O le tau o le avefaa ma soo” (*The cost of discipleship*)

Tusi Faitau – Luka 9:46-62

Matua – ff. 51-53: *“Ua oo atu i ona po e siita ai o ia, ona matua faasaga atu lea o ia e maliu atu i Ierusalem; ua aaauina atu e ia nisi e muamua atu i le feau; ua latou o atu ma afe i le tasi aai o Samaria e sauni ai mo ia. A ua le talia o ia e i latou, aua ua faasaga atu lana malaga i Ierusalem.”*

Ua silafia e Iesu o lana misiona e faataunuu lea i le satauro. Na ia ui atu i se auala tuusao mai Kalilaia e aga’i atu i Ierusalem e ui atu i le vai aai o Samaria, o se nuu ua leva ona ‘ino’ino i ai tagata Iutaia. Peita’i, ua lagona le fialia o Iesu e faaloaloa atu ona lima e faauō ai i ia tagata ma saili se mea e malolo ai, ma e oo lava se ia mauaina se nuu e sili atu ona talileleia. E leai sana mea e fai i le talosaga a ona soo mo le faamasinoga a le Atua i le nofoaga e tasi mo ona tagata.

I lo latou galuega sa mulimuli ane, ua le maua e le au soo se tasi e taliaina lo latou savali ae ua na o le teena. O teena e le masani ona oo ia i latou, peitai o nei faafitauli na filifilia lava e Iesu. Aua o loo i ai le faamoemoe o Iesu. Ua tatou fialia ea e tuu atu o tatou lima e faamausali ai se faiga paaga po o le faiga uo ma nisi? Ua tatou mautinoa na faali ma faailoa e Iesu le taunuu o le ola ofoina, e ala i lona alu ae i Ierusalem e maliu ma toe tu mai ai i le aso tolu; e pei ona ia taualaga ai i ona soo.

Tatalo: Faafetai le Atua, i le faatupuina o le ola ofo e fesoasoani mo tagata o loo moomia. **Amene!**

Aso Lulu – Me 28: “Galuega misiona” (*Mission work*)

Tusi Faitau – Luka 10:1-24

Matua – ff. 1-2a : *“Mulimuli ane ua tofia e le Alii nisi e toafitugafulu, ua aauina atu i latou e taitoalua e muamua atu ia te ia, i aai uma ma mea uma o le a maliu atu i ai o ia. Ua fetalali atu foi o ia ia te i latou, “E tele le saito e seleseleina, a o le au faigaluega e toaitiiti ia...”*

Na aauina atu e Iesu o ona soo e muamua atu ia te ia i aai uma. Masalo, o nei toafitugafulu e sili ona vavalalata ma ia. A o lea misiona ua faatoateleina ai nisi ua aoaoina mo lea galuega. Peitai, o le naunautai a Iesu, ia oo atu le au soo i le lalolagi atoa. Ua taitoalua ma savavali atu i lea aai, ma lea aai; ma faamasani tagata o le nuu, e tala'i atu le tala lelei iā Iesu, ma tatalo mo ē mama'i. Ma ua aoga tele lea galuega misiona, o le fitusefulu ma le lua na toe foi ma le tala fiafia. Na faavae e Iesu se faatulagana o le faaauau pea ina ua mavae lona maliu ma lona toe tu, a o faapotopoto tagata talitonu ua faataapeapeina i totonu o fale, ma auai toe foi i lo latou lava nuu.

Tatalo: Le Atua e, ia faamanuia i le galuega misiona o Ekalesia uma o le lalolagi. **Amene!**

Aso Tofi – Me 29: “Siitiaga” (*Ascension*)

Tusi Faitau – Luka 24:50-53

Matua – ff. 50-53 : *“Ua ave e ia ia te i latou i tua, ua oo lava i Petania; ona sisii ai lea o ona aao, ma faamanuia ia te i latou. Ua oo ina o faamanuia e ia ia te i latou, ona te'a ese o ia ia te i latou, ua siitia i le lagi. Ua latou toe foi mai i Ierusalem ma le olioli tele; sa i le malumalu i latou e le aunoa, o latou o vivii atu i le Atua.”*

E tusa ai ma kalena faatulaga ekalesia, o le aso siitiaga lea e faailoga aloaia i le vaitau o le Eseta, ma e faamamafa lea i le sefulu aso a'o lumanai le Aso o le Penetekoso. O le siitia o Iesu i le lagi, lea o loo faamaumauina e le evagelia o Luka. I le faamatalaina o lea vaega ua tapunia le isi faitotoa, ae matala le isi faitotoa. O le uiga o le manatu o lea ua tapuni le faitotoa o le oti i le vaaiga masani e gata ai le ola faatuatua o tagata; a o lea ua matala le faitotoa o le ola e faavavau e maua ai le mautinoa o tagata faatuatua uma, e tauivi pea ma luitau o le ola auauna. O lea taumafaiga ina ia mausali ai pea le ola taumafai e ala i le malo o le Atua (*kingdom of God*). E le o le faitotoa ua tapunia, a o le faitotoa ua matala ma avanoa mo le lalolagi atoa.

Tatalo: Le Atua o le ola, faafetai mo lea faitotoa matala pea, ina ia matou tapena ma galulue ai. **Amene!**

Aso Faraile – Me 30: “O le tuaoi lelei” (*The good neighbour*)

Tusi Faitau – Luka 10:25-42

Matua – f. 27: *“Ua tali mai o ia. “E te alofa atu i le Alii lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa*

atu foi i le lua te tuaoi, ia pei o oe lava ia te oe.” Ona faapea atu lea o ia ia te ia, “Ua tonu lau tali; ia faapea ona fai, e te ola ai.”

Sa valivali e Iesu le ata o le tagata malaga, a o ia i ai i le ala o faigata, o loo savalivali na o ia i lea aai e tele ai tagata fao mea ma tagata tau faamatau. Peitai, o le au Sa Levi ma le au Ositaulaga, ua latou manatunatu poto ina ua tali e faapea, “E te alofa atu i le Alii lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa atu foi i le lua te tuaoi, ia pei o oe lava ia te oe.”

O le avea ma se tuaoi lelei e le na o le tuuina atu o tupe ona faapea lea ua alofa. E moomia foi le tali atu i aso uma. E mafai ona faauigaina le ositaulaga o o tatou taimi, tomai ma le poto e fesoasoani ai i isi. Ae afai tatou te lē faia se galuega, pe afai tatou te savavali pea e pei o le ositaulaga ma le sa Levī, ae le mafai ona tū ane ma fesoasoani. O lona uiga e le o se tuaoi lelei lea. O le alofa i le Atua ma le avea ma tuaoi lelei e i ai le malosi atoa, ma le manatu atoa.

Tatalo: Le Atua e, ia aumaia le mautinoa o le olaga tuaoi lelei, e tausia ai le ola felagolagomai. **Amene!**

Aso Toona’i – Me 31: “Le Alii e, a’oa’o i matou i le tatalo”

Tusi Faitau – Luka 11:1-13 *(Lord, teach us to pray)*

Matua – f. 1: *“Sa i le tasi mea o ia, ua tatalo ua uma, ona fai mai lea ia te ia o le tasi o lona au soo, “Le Alii e, ia e a’oa’o mai ia te i matou i le tatalo; e faapei o loane foi ona a’oa’o i ona soo.”*

O le taumafaiga atoa o le ola tatalo. E ola lea i se soifuaga faasoo, o se aoaoga maua luga i le tapenaga faaleagaga, i le taulai atu lea o lagona ia Iesu mo se talanoaga i le va o le tagata ma le Atua. O lea ua faamanino e Iesu se auivi taua o le ole atu lea e ala i le tatalo ia loto gatasitasi ma ia faalagolago i le auai mai o le Agaga Paia e fesoasoani i manatu ma lagona. O le alofa i le Atua ma alofa atu i lo tatou tuaoi, o le alofa e faatino mai le loto o le kerisiano lena, ma le tatalo mo le fa’amagaloga mai le Atua. O le fa’atulagana lea e manaomia ai le olaga Kerisiano. O upu uma atoa ai ma galuega.

Tatalo: Le Atua e, ia matou iloa ona alofa i lau Afio ma le loto atoa e le aunoa. **Amene!**

O LE TALALELEI A LUKA (3) – THE GOSPEL OF LUKE (3)

2. Sauniuni lou Tagata (Prepare Yourself)

Aso Sā – Iuni 1: “Vaai ma avea ma malamalama”

Tusi Faitau – Luka 11:14-36 *(Beholding and becoming light)*

Matua – ff. 34-35: *“O mata, o le moli lea o le tino; o lenei, pe afai ua lelei ou mata, e malamalama uma ai lou tino; a e afai ua leaga, e pouliuli ai lou tino. O lenei, ia oe, nei pogisa le malamalama ua i totonu ia te oe.”*

I le vaitaimi o Iesu, sa faalagolago tele tagata i mōli suāuu e faamalamalama i le pogisa. O lea la, ina ua faatusaina e Iesu o mata i le mōli suāuu, o loo ia fetalai e uiga i lo tatou faalagolago atoatoa i o tatou mata e faamalamalama ma ta'ita'ia ai o tatou ala. E pei o se moli e tuu atu i o tatou luma, ma ta'ita'ia o tatou mata. O le fesili, O fea la o loo faasaga ai mōli o ou mata?

E le'i tuuina mai e Iesu ni tulafono e tusa ma mea e ao ona faasaga ai o tatou mata. Na te le'i ta'uina mai faasaina foi ni telefoni ma TV e faafiafia ai o tatou "matamata". Peita'i, e pau le fetalaiga a le Alii, "Ia oe, ne'i pogisa le malamalama ua i totonu ia te oe." O le augani a le Alii, faasaga tonu ou mata ina ne'i pouliuli lou malamalama.

Tatalo: Le Atua o le malamalama, matou te faafetai i lou faamalalamaina o matou mata i mea posiga a lenei lalolagi. **Amene!**

Aso Gafua – Iuni 2: “E amanaia e Iesu totonu o oe”

Tusi Faitau – Luka 11:37–54 (*Jesus cares about the inside of you*)

Matua – f. 39: “*Ua fetalai atu le Alii ia te ia “Outou faresaio, ua faama-maina lava e outou le tua o le ipu ma le tanoa; peitai o totonu o outou ua tutumu i mea ua faoa ma le amio leaga.”*

Na silafia e Iesu lenei uiga masani e pei ona feagai ma ia tagata ao Lafoga ma le a'o'ao i le Tulafono. O foliga vaaia masani o ia tagata e vaai i lo latou lava lagona, ae le o le mea moni ma le loloto o tulafono. Na fetalai Iesu 'ia agalelei atu i e matitiva, ona mama ai lea o mea uma o i totonu i ai [latou]' (fuaiupu 41). E finagalo Iesu i le mama mai totonu. E finagalo Iesu ia talafeagai o latou tagata atoa i fafo ma totonu. O le suia o totonu e umi lava se taimi, pe a tatou te le iloa muamua ona aoao i ai tatou lava. E na o Iesu lava atonu e mafai liua atoa ma faaosofia i le vaaiga matautia o le fa'afeagai o le ola fa'amamāina ma le loto atu i le Atua.

Tatalo: Iesu e, faafetai i lau fetalaiga e matou te taumafai e liua o matou tagata tuai e avea ma tagata fou i lou malamalama. **Amene!**

Aso Lua – Iuni 3: “Mau'oa i le Atua” (*Being rich towards God*)

Tusi Faitau – Luka 12:1–21

Matua – ff.20-21 : “*A ua fetalai atu le Atua ia te ia, O oe na le vale, e amiina atu lou agaga nai ia te oe i le po nanei; ae fai ma ai mea ia ua e saunia? O loo faapea foi le faaputu oa ia te ia; a e le mauoa i le Atua.”*

O le fuaitauga i lo tatou matua e faatatau lea i le 'manuia' e agai lea i le Atua. Ua faasoa Iesu i le 'au soo e uiga i le tamaoaiga e sili ona latou maua i le Atua, nai lo le popole i oa o le lalolagi e pei o meaai. E mafai ona tatou maua le tamaoiga i amio faalia, mauoa i galuega ma o tatou sootaga. O le uiga o le manatu e taua tele i le Atua le tagata. Soo se taleni ma amio e faaalua e tagata o tamaoaiga foi lea o le Atua i le tagata. E faapefa ona faatamoaigaina le tagata e agai lea i le Atua? O a ni foliga vaaia o le tamaoaiga ua foi mai e le

Atua? Atonu o le finagalo o le Atua e foai mai le tamaoiga e faaolua ai le malamalama ina ia mafai ona faaaauaina.

Tatalo: Faafetai le Atua i tamaoiga foai fua e ala i le mafaufau e faaolua ai o matou tagata i lenei soifuaga. **Amene!**

Aso Lulu – Iuni 4: “I lou popole, tago e matau mea itiiti”

Tusi Faitau – Luka 12:22–48 *(In your worry, observe the small things)*

Matua – ff. 24-25: *“Ia outou mafaufau i oreva; latou te le lulu saito; latou te le selesese foi; e leai lava so latou potu oloa poo se fale saito, a e fagina i latou e le Atua; e le sili ea lo outou lelei, i manu? O ai ea so outou ua mafai ia te ia i lona popole ona faasili lona umi i se aga e tasi?”*

Masalo e i ai taimi e lagona ai le tiga o le popole. Atonu e i ai foi taimi e lagona ai le faigata o le lagona popole. O nisi taimi e mafai e le popole ona faaosofia lagona lē mautonu, ona afaina ai lea ma le mafaufau, atoa ma le tino. Na silafia e Iesu, o le popole e i ai lona malosiaga e taotaomia ai i tatou, o lea na ia talanoa ma fautua mai ai, e pei ona ia i upu o le matua. Ua faatusaina i tatou i oreva, o le manulele e leai se fale saito e faaputu ai ona saito, a e fagina i latou e le Atua. Ua faaaogāina e Iesu mea itiiti, mea e faatauva ma le lē amana’iaina, a e ua a’oa’oina ai i tatou, o loo tausia pea i tatou e le Atua. Aua le popole! Faamoemoe ma faalagolago i le Atua.

Tatalo: Le Atua e, faafetai i lou Agaga Paia e galue ina lagona popole ma aumaia le faatuatua i taimia ma aso o le olaga. **Amene!**

Aso Tofi – Iuni 5: “O nisi taimi o le fausiaina, e foliga o la e talepeina”

Tusi Faitau – Luka 12:49—13:9 *(Sometimes building looks like breaking)*

Matua – 12:51-53 *“Fa te outou ea ua ou sau e avatu le filemu i le lalolagi? Ou te fai atu ia te outou, e leai; a o le fevaevaeai. Aua e amata i nei ona po e i ai i le fale e tasi tagata e tolima e fevaevaeai i latou, o le toatolu e faamasesei ma le toalu, o le toalu fou e faamasesei ma le toatolu.”*

O le faaliga na iloa e le ‘au leoleo mamoe i le fanau mai o le Keriso, na faailoa ai e Agelu le faailoga o le manuia o le a maua lea e le lalolagi uma aua o le faaola ia mo tagata uma (Luke 2:14) o se folafolaga matagofie tele aua o loo i ai le faamoemoe. Peitai, o lea lava folafolaga ua suia le filemu i le fevaevaeai. Ua faailoa mai i lea fuaitauga se metotia fou e auala mai ai se mafutaga faaleaiga a o se tali atu i loto fevaevaeai. O talitonuga ma lagona eseele lea ua faailoa e Iesu e tutupu ai lava le fevaevaeai. O le taliaina o Iesu o se vaega e aupito i sili lea ona taua i le olaga atoa. E aveese ai lagona faaletagata ae fausia ai lagona o le faatuatua ma le ola talitonu. E mafai faapefea e le masalosalo ona fausia se malo?

Tatalo: Le Tama alofa e, matou te moomia pea lou Agaga Paia, e aumaia le mautino i o matou loto. **Amene!**

Aso Faraile – Iuni 6: “O ō tatou manatunatuga ma le mālō o le lagi”

Tusi Faitau – Luka 13:10–35 *(Our imaginations and the kingdom of heaven)*

Matua – ff. 18-19: *“E tusa le malo o le Atua i ni a? Ou te faatusaina i ni a? E tusa ia ma le fua o le sinapi, ua ave e le tasi tagata, ma lafo i lona fanua; ua tupu, ua ave ma laau; ua momoe foi manu felelei ona la.”*

O lea ua faatusa e Iesu le malo o le lagi, e pei o le sinapi. E faatauva a ua tupu ai le laau tele, ua momoe ai manu felelei. Ua faali manino e Iesu le malo o le lagi e mafai ona atoatoa i se vaega aupito i sili ona faatauva. O nisi taimi e mafai ona iloa lea malo i le aganuu faakerisiano. O le aoaoina i le Tusi Paia, fesiligia pea amio e tala ma feagai lelei i lea malo. O le fesili a Iesu na faailoa ai le atamai ma le ofoofogia o galuega mamana o le Atua i le faaogaina o le foafoaga. O lea fesili e mafai ona faaosofia ai mafaufauga e sailiili pea i nisi o auala e mafai ona iloa tino ai le malo o le lagi.

Tatalo: Le Alii e, faafetai i lou faamanatu ma lou faasoa mai e ala i manatu ma lagona e mafaufau ai pea i lou malo o i le lagi. **Amene!**

Aso Toona’i – Iuni 7: “Mana’omiaina o le lagona tāua”

Tusi Faitau – Luke 14:1–24 *(Needing to feel significant)*

Matua – ff.13-14: *“Peitai o oe, pe a e sauni le faigaai, ina talai ia i e matitiva, i e mumutu, i e pipili, ma e tauaso; e manuia ai oe; aua latou te le mafaia ona tau mai ia te oe; a e tau oe i le toe tutu mai o e amiotonu.”*

O le fetalaiga manino a Iesu e uiga i lagona e faatauaina i se tulaga e silisili pe sua foi. E le o tulaga poo nofoa e sili ona lelei i se laulau ai, a e tatau foi ona amanaia le mativa, mumutu, pipili ma e tauaso; e mautinoa lava le manuia o le a mauaina. Atonu o se fatagana lea ua faamanino e Iesu mo tagata uma e uiga lea i le manuia e maua pe afai e faatauaina lagona manaomia e manumalo ai ma maua le manuia i soo se faamoemoe uma. O le valaaulia o lagona e taumafai e ave ma tagata faatauaina e manatua ai pea Keriso. Ua tuuina mai ia i tatou le faamoemoe, a o se tulaga e ao ona lagona ai le faatauva i le taliaina soo se lagona taua mo le ola ai i aso uma. O le faailoaina o lagona fai toatasi e faoa ai manatu o le ola fefaasoaai po mafutaga. E faapefea ona faaeaina o tatou lava lagona?

Tatalo: Le Alii Iesu e, faafetai ua e amanaia o lagona e ave ma laasaga o le manuia i le tuuina atu atoa o matou tagata. **Amene!**

TATALO I TUSITUSIGA O LE FEAGAIGA FOU – PRAYER IN THE NEW TESTAMENT LETTERS

Aso Sā Penetekoso

Aso Sā – Iuni 8: “Le Agaga Paia, tuualalo i tatalo”

Tusi Faitau – Galuega 2:1-18 *(The Holy Spirit, prompter of prayer)*

Matua – ff. 2-4a: *“Ona faafuasei mai lea o le taalili mai le lagi, peiseai o le matagi ua agi tele mai, ua tumu uma ai le fale sa latou nonofo ai. Ua iloa foi e*

i latou o laulaufaiva peiseai o le afi ua vaevaeina, ua nofo i o latou luga taitoatasi. Ua faatutumuina foi i latou uma i le Agaga Paia..."

O le faitauga o lenei aso, o le oo mai o le Agaga Paia i le aso o le Penetekoso; ua faatutumuina ai tagata uma i le Agaga Paia, ma ua tuualalo o ia i o latou tatalo ma afua ai ona tautala i gagana eseese. O le galuega a le Agaga Paia ua faapei o se faufautua e tuualalo mai i o tatou agaga, ina ia tatou alofagia le Alii le Atua ma lona finagalo faaalua i lalolagi, e pei ona auina mai ai le Alo pele e to'atasi. O le Agaga Paia, o lo tatou fesoasoani sili i taimi fitā. O ia o le meaalofo a le Atua, o loo mafuta ma lotolotoi mai ai le Atua i loto ma agaga o tagata. O le auina mai o le Agaga, ua mautinoa ai le alofa tunoa ma le alofa mutimutivale o le Atua mo le lalolagi. Ua auina mai e le Atua lona Agaga Paia, ina ia mafai ona tatou molimau ia te ia, e ala mai i lana Upu i totonu ia te oe ma a'u, ma tatou uma.

Tatalo: Le Atua e, faafetai i le galuega o le Agaga Paia, e faamallosia ai o matou loto e galulue e faia lou finagalo e pei ona faia i le lagi. **Amene!**

Aso Gafua – Iuni 9: “Faalatalata i le malamalama, iloa le pouliuli”

Tusi Faitau – 1 Ioane 1:5-10 (*Approaching the light, aware of the darkness*)

Matua – ff. 5, 6: *“O lenei fo’i le fe’au na matou fa’alogologo ai mai ia te ia, ua matou fa’ailoa atu ai fo’i ia te outou, o le malamalama lava o le Atua, a e leai lava se pouliuli o ia te ia. Afai tatou te fai atu, ua tatou mafuta fa’atasi ma ia, a e savavali i tatou i le pouliuli, ua tatou pepelo ai, ua tatou le faia fo’i le upu moni.”*

O le faitauga o lenei aso, tatou te toe tō manatu ai i le Atua o le malamalama ia. E lē mafai fo’i e le pouliuli ona manumalo ai. O lo tatou faalatalata pea i le malamalama, e sili foi ona tatou iloa o tatou lava ata lafoia. E mafai ona iloa o loo tatou latalata pea i le Atua, pe a o tatou mamao ma le pouliuli. A e ia tulimata’i le vaai ma olaina le finagalo o le Atua, ona susulu lea o lona malamalama i totonu ia i tatou.

Ua faata’oto mai e le tatou matua, ni auala se lua tatou te filifili ai. O a tatou filifiliga e ō faatasi ma la tatou tatalo i le Atua, ina ia faasino mai le ala tonu e tatau ona savalia. O le musumsuga a lona Agaga Paia ia i tatou, e uuna’ia i tatou i le faia o le mea sa’o. E i ai taimi tatou te filifili ai i fiafiaga o le lalolagi, ma ua pogisa ai la tatou vaai i ala o le malamalama. A o le faamanatu a le Talalelei, ia tatou faalatalata i le malamalama. O le Atua o ia o le malamalama, e manino ai la tatou vaai i mea uma o i le pouliuli.

Tatalo: Le Atua e, ia faamallosia i matou e lou Agaga Paia e savavali i ala o le malamalama, e manino ai la matou vaai i mea o le pogisa. **Amene!**

Aso Lua – Iuni 10: “Vaai i le Atua a o galue ma avatu le faafetai”

Tusi Faitau – Efeso 5:15-20 (*See God at work and give thanks*)

Matua – ff.15-16,20 : *“O lenei, ia faaeteete outou ina ia outou savavali ma le faatuatua, aua ne’i faapei o e valelea, a ia faapei o e popoto; ia faaaogaina e*

outou aso o lenei olaga, aua o ona po nei ua leaga.... Ia faafetai pea lava ona o mea uma, i le Atua le Tama, i le suafa o lo tatou Alii o Iesu Keriso."

O le ola tatalo e mafai ona aanoa i mea o loo tutupu i le soifuaga. O mafaufauga ma lagona na afua mai ona o gasologa masani o le soifuaga. O faatinoga uma ma amioga faalia e masani ona vaaia e tutupu a'e ai mafaufauga e uiga lea i galuega fuafua a le Atua. O le tatalo, e mafai ona vaavaai loloto ai le tagata lava i le sootaga ma le malamalama i le Atua o loo afua ai ona faatino le tatalo. O a ni faatinoga ua tatou faia e iloa ai le Atua? A e faapefea foi ona iloa le Atua i lo tatou ola i aso o lenei olaga?

O nisi nei o auala tatalo e mafai ona iloa ai le Atua galue, o le faatoaga o loo maua ai ulu, fai, ma talo. O lea galuega ofoofogia o loo faatino pea lava pea e le Atua i lo tatou ola i aso fai soo; lea e lagona ai le agaga faafetai i le Atua, ona o se atunuu e tupu ma olaola pea le elelee e maua ai mea e ai. O nisi taimi e taua ai le mapu ane i se taimi puupuu ma tatalo atu i le Atua i le faafetai ona auala ua ia faaali mai ai ana galuega e ao ona faaauau pea e le tagata.

Tatalo: Le Alii e, faafetai i le ola e faaauau ai pea le ola galulue e faailoa lau Afio i galuega silisili ua faatino mo le lalolagi. **Amene!**

Aso Lulu – Iuni 11: “Ua fusia faatasi Kerisiano e ala i le tatalo faatasi”

Tusi Faitau – Efeso 6: 18-20 *(Christians bound together by mutual prayer)*

Matua – ff. 18, 19: *“Ia outou tatalo i le Agaga i aso uma lava i talotaloga ma fa’atoga uma; ia outou mataala pea i lenei lava mea, ma matuā tausisi i le fa’atoga mo tagata paia uma lava; mo a’u fo’i, ina ia tu’uina mai le upu ia te a’u, ina ia ou fa’amalosi ona tautala atu ma fa’ailoa atu le mea lilo a le tala lelei.”*

O le vaega lea o le tusi a le Aposetolo i Efeso, na ia faailoa ai i le tāua o le tatalo. Ia tatalo i le Atua i taimi uma, e le gata mo i latou, a e mo tagata uma. O lagona a Paulo ina ia galulue faatasi Efeso ma Tuiko, ina ia maua e ia le lototele i le galuega. Ia faaalia foi i lea auauna tigā o le galuega na feagai ma le Aposetolo. O le naunauta’iga, ia galulue faatasi itu tino uma o le galuega. O tatalo a tagata e faafogaina e le Atua tatou lagona. E tau lē fesiligia foi, poo a mana’oga e tataua ona ave i ai le faamuamua ma faaleo i le Atua. Pau la tatou galuega, o le faaleo o tatou lagona e ala i le tatalo. E lē gata ia i tatou, a e ia tatalo foi mo isi tagata. E tali mai le Atua i lona taimi tataua, ma soo se ala ua ia finagalo ai.

Tatalo: Le Alii e, ia e faatupuina i o matou loto le fiafia e mafuta atu i le tatalo. Fesoasoani i nisi ua faavaivai e sa’ili atu e ala i le tatalo. **Amene!**

Aso Tofi – Iuni 12: “Faafetaia’i ma le Atua i ou popolega”

Tusi Faitau – Filipi 4:4-9 *(Encountering God in your worries)*

Matua – ff.4, 6-7 : *“Ia outou olioli i le Alii e le aunoa; ou te toe fai atu, ia outou olioli.... Aua nei popole outou i se mea e tasi, a ia faailoa atu o outou manao i*

mea uma lava i le Atua, i le tatalo, ma le faatoga, atoa ma le faafetai. O le manuia foi mai le Atua, o loo silisili lava i mea uma e manatu i ai, e leoleoina ai o outou loto atoa ma o outou mafaufau ia Keriso Iesu.”

Faafefetaia'i ma le Atua i ou popolega. O lea ua aumaia e le fuaitauga o le asō le faamalosi, 'aua ne'i popole i se mea e tasi. Auā o le manuia e mai le Atua. O le silafaga manino o le Atua e le lilofia se mea e tasi. O le faatoga ma le faafetai, ia faailoa i le Atua ina ia mafai ona tali mai i manaoga atoa ma le filemu. E moomia i lea faiga le amiotonu, amio mamā ma le lelei, atoa ai ma le ta'uleleia. O le tatalo o se valaaulia e faatino i soo se taimi, e oo foi i le popole. O lea lava faamalosi o loo aumaia ai le feiloaiga mamalu ma le Atua, e aveese ai le popole i le olioli lea i le Alii. E faapefea ona faafefetaia'i ou lagona popole ma le Atua? O le tatalo!

Tatalo: Le Atua e, faafetai i le fiasia o loo aumaia i o matou loto e aveesea ai le lagona popole i aso uma o le olaga. **Amene!**

Aso Faraile – Iuni 13: “O ta'ita'i ma ē ua ta'ita'iina”

Tusi Faitau – 1 Timoteo 2: 1-10 *(The leader and the led)*

Matua – ff. 1, 3: *“O lenei, e muamua i mea uma ou te apoapoa'i atu ia faia olega, ma tatalo, ma fa'atoga, ma fa'afetai mo tagata uma lava; mo tupu ma i latou uma ua i ai le pule, ina ia tatou nonofo ma le lē atuatuva'e ma le filemu, i le amio Atua uma lava ma le matagofie; auā o le mea lelei lea ma le mālīe i luma o le Atua lo tatou Fa'aola.”*

O le faamanatu ia Timoteo, o loo atagia ai le faaauauina o galuega na fita'ituga ai le Aposetolo o Paulo. O le faamanatu mo le au faatuatua, ia taula'i i le Atua le vaai e ala i le tatalo. O le aupega sili lea mo soo se tagata faatuatua i le Atua; e maua ai le mafutaga vāvālalata ma le Atua. O le tatalo e pei ona augani ai Timoteo, ua aofia ai tagata uma. O a foi ni tofiga maualuluga ua tatou maua, ia aua ne'i galo le fesoota'iga ma le Atua i le tatalo. A tumau pea lo tatou sootaga ma le Atua i le tatalo, ona mālīe lea i luma o le Atua mea uma tatou te faia.

O le tatalo, o le auala lena e faailoa ai i le Atua lagona lēleoa o le tagata. O le faamanatu ia Timoteo, ave le faamuamua i le tatalo. A lelei ona tatou fausia lo tatou sootaga lea ma le Atua, ona manino lea o le mafuta mai o le Atua i aso uma o lenei soifuaga. O a foi faafatiamata'i e tutupu faafuase'i i la tatou savaliga, ia maua pea lo tatou lototetele e tali ai faigata.

Tatalo: Le Atua alofa e, fesoasoani mai ina ia o matou lagona le tāua o le ola mafuta atu e ala i le tatalo. **Amene!**

Aso Toanai – Iuni 14: “O le mana o le tatalo faalautele”

Tusi Faitau – Iakopo 5:13-18 *(The power of prayer in common)*

Matua – ff. 13-14, 16e: *“Ua tigaina ea so outou? Ina tatalo ia. Ua fiasia ea se tasi? Ina pese ia. Ua ma'i ea so outou? Ina aami atu ia i toeaia o le Ekalesia,*

*ia latou tatalo mo ia, pe a uma ona faauu ia te ia i le suauu i le suafa o le Alii...
Ua aoga tele le tatalo faatauana a le tagata amiotonu."*

O fuaitauga o lenei vaiaso atoa o loo aumaia ai ni feau taua tele ma aoaoga e uiga i le tatalo. O le faamoemoe, ia avea le olaga tatalo ma masaniga o tagata faatuatua uma, ma nisi o loo fia malamalama i le Atua ma lana fesoota'i mai. O le a se vaaiga pe afai e fetaiai ma le Atua, ma faapefea ona taua lea sauniga o le tatalo? Sa tomua lea tusitusiga i le Aso o le Penetekoso i le faapotopotoga ua latou loto gatasitasi ma ua liligi ifo ai le Agaga Paia. O lea faamanatu mo le faaiuga o lenei vaiaso lea ua taualuga e uiga lea i le mamana o faatinoga o le tatalo. O se vaega taua o lea mamana e mafai ona gafatia i le faamalosi o le tasi i le isi e uunaia pea le mafutaga ma le Atua i aso uma. E mafai ona faaogaina atoa ai le malosi ma le mafaufau e tuufatasia e mafuta ma le loto maulalo.

Tatalo: Le Alii e, aumaia le loto tele e mafai ona saili malosi ma le manuia i lau Afio, e ala i le fiafia e faatino sauniga mamalu. **Amene!**

FAAMAFANAFANA MA FAAMOEMOE: MAI LE ISAIA 40-55 (1)

COMFORT AND HOPE: FROM ISAIAH 40-55 (1)

Aso Sā Tamā

Aso Sā – Iuni 15: “O Upu o le Faamoemoe” (Words of hope)

Tusi Faitau – Isaia 40:1-5

Matua – ff. 1-2: *“Ia outou faamafanafana, ina faamafanafana atu ia outou i lo’u nuu, ua fetalai mai ai lo outou Atua. Ia outou faamatalaloto ia Ieruselema, ma outou alalaga ia te ia, ua iu ona po o lona tiga, ua tauia lana amioletonu; auā ua na maua faalua mai le lima o le Alii le tau i ona o ana agasala uma.”*

O le faitauga mai le Isaia 40-55, o loo sasaa atoa ai le perofetaga a le Atua e ala i upu faamafanafanaga ma le faamautinoa mo le nuu ua nuti momoia ona o le tafeaga. Ua tele o le lē mautonu ma le fememea’i, ma ua latou fesiligia: Ua tuulafoa’i ea i tatou e le Atua? Aiseā ua faatagaina ai e le Atua nei mea ua tutupu? O nisi ia o fesili e tatou te lagona tutusa ai ma Isaraelu, pe oo ona tatou fetaia’i fo’i ma taimi fitā o le soifuaga. Faapei ona la faia mo lona nuu o Isaraelu, o loo silafia e le Atua o upu e aumaia ai le faamoemoe; ma o loo musumusu malie mai i lo tatou tusi faitau o lenei aso: *“Ia outou faamafanafana, ina faamafanafana atu ia outou i lo’u nu’u.”*

O nai fesili faatupu manatu mo faitauga tusi o lenei vaiasosā: Ua mana’omia ea ona e iloa o loo alofaina oe e le Atua? Ua mana’omia ea ona e faalogo atu ua faamagaloina oe e le Atua? Ua e mana’omia ea le faamafanafanaga a le Agaga?

Tatalo: Le Atua e, faafetai ona o lou faamafanafanaga i taimi fitā o lenei olaga. Ia ia’i matou le musumusuga o le faamoemoe. **Amene!**

Aso Gafua – Iuni 16: “Tala lelei” (Good news)

Tusi Faitau – Isaia 40:6-11

Matua – ff. 8-9 *“E magumagu le muti, e toulou le fuga; a o le afioga a lo tatou Atua, e tumau lea e faavavau. Alu ae i le mauga maua luga, o oe lē au mai le tala lelei ia Siona; ia matuā leo tele, o oe lē au mai le tala lelei ia Ieruselema; ia leo tele, aua le fefe; fai atu i aai o Iuta, Faauta i lo outou Atua.”*

O le nuu o Isaraelu sa fetaia'i ma se taimi tugā o le olaga; ua na o tala faanoanoa e sāua ai le faalogo mai sasa'e ma sisifo, a o faaunuu ai le nuu i lo latou tafeaga i Papelonía. O le mea lea, e lē tau mate la le faatonuina o le auauna a le Atua, e tau alaga atu ma le leo tele i le nuu, ua oo mai le tala lelei o le Atua; e toe faapotopotoina o latou e le Atua, ma toe faafo'isia i latou mai le tafeaga. Ioe, o se tala e tatau ona alalaga!

E puupuu o tatou olaga i lenei lalolagi, e magumagu e pei o le mutia; peita'i, ua faamanatu mai e le perofeta, o ē ua faamoemoe i fuafuaga a le Atua, e tumau lava i latou, e pei lava o afioga a le Atua. O le tala lelei o le alofa o le Atua mo i tatou e faavavau, e tatalaina ai fo'i le faamoemoe mautinoa o le ola e faavavau ma le mana silisili ese o le Atua. O lenei, ia tatou taufetuli ai nei i luga o mauga i o tatou loto, ma ia talepe ai i lalo o tatou lava tuaoi, ma ia e alalaga atu: “O lo'u Atua lenei!”

Tatalo: Le Atua e, faafetai ona o lou tala lelei e faavavau lava, ma e talepeina ai le pule uma o lenei olaga. **Amene!**

Aso Lua – Iuni 17: “O la'u auauna lenei” (Here is my servant)

Tusi Faitau – Isaia 42:1-7

Matua – ff. 6-7: *“O a'u o le Alii, na ou valaauina oe i le amiotonu; ou te taofimauiina lou lima, ma a'u leoleo ia te oe, ou te avatua foi oe e fai ma feagaiga a le nuu, o le malamalama o nuu ese; e faapupula i mata o e tauaso, e aumaina i fafo nai le fale puipui le ua fusifusia, atoa ma e ua nonofo i le pogisa ia aumaia i latou nai le fale ua taofiina ai.”*

Atonu na lagona faanoanoa le fanauga a Isaraelu, ina ua lē taulau i latou e tusa ma le finagalo o le Atua; ua lagona ai le faatauva ma le lē agavaa. Auā sa tuuina atu e Isaia le tele o lapata'iga e auauna ai i le Atua, ma ia liliuese ai mai le leaga; a e latou te le'i faalogo, ma ua ave faapagota ai nei. Peita'i, e le'i faamuta ai e le Atua la latou talaaga. E le'i tulieseai ai i latou ma vavao esea mai i ona luma; a ua na folafolaina ai le auina atu ai o lana auauna e togiola ma toefaafo'isia i latou, auā o le Atua e lē aunoa ona tuu avanoa, ma e le finagalo ia fano se tasi. E lē tuulafoa'ia e le Atua ona tagata, e tusa lava pe tuulafoa'i o ia e ona tagata.

Tatalo: Le Atua e, faafetai e te lē tuulafoa'i i matou; a ua e auina mai lou Alo pele e to'atasi, ina ia le fano se tasi e faatuatua ia te ia. **Amene!**

Aso Lulu – Iuni 18: “Pese i se pese fou” (Sing a new song)

Tusi Faitau – Isaia 42:10-16

Matua – ff. 10-12 *“Pepese i le Alii i le pese fou, o lona viiga mai le tuluiga o le lalolagi, outou o e ō ifo i le sami, atoa ma e o tumu ai; outou nuu tu matafaga, ma e o nonofo ai. E leo tele mai le vao ma ona aai, o faoa aai e nofo ai Kitara; e alalaga e o nonofo i le papa; latou te faataio mai tumutumu o mauga. Latou te avatu le faaneeneega i le Alii, ma latou ta’u atu lona viiga i nuu tu matafaga.”*

Ua umi se taimi a o fifilemu ai le nuu. Ua galo a latou solo. Ua lē usuina a latou pese. O a latou musika, e na o a latou miti e tātā ai. O lea ua nonofo i latou i tafatafa o le vaitafe ma fetagisi, a o latou manatunatu i taimi na latou pepese faatasi ai ma sii a’e o latou leo i le tapua’iga. E mafai faapefea ona latou usuina pese e uiga i lo latou Atua i lenei taimi, i lenei nuu ese? A o lenei, ua tatalaina i latou, ma e le mafai e le toafa ona taofia lona viiga. Ua taalili i tuluiga o le lalolagi i le pese fou o le olioli: Ua manumalo le Atua, ma ua faasaolotoina i latou.

Ua faamanatu atu e Isaia i ē na faaaunuua: o le Atua e mo i latou; ma i le taimi tonu o le Atua, na ia afio mai ai i le mana e lavea’i ai i latou. E ui lava sa latou faaosesa, a e sa tau pea le Atua mo i latou. O le pese na latou faalogoina i a latou miti ma fetagisi ai i luga o vaitafe, e le’i alu ese lava. Na lalagaina ai i latou i taimi uma, e tusa lava pe foliga ua lilofia o latou lalolagi atoa i le filemu ma le faanoanoaga. Ma, ua mafai nei ona latou tutu faatasi ma lo latou malosi atoa: ‘Pepese i le Alii i se pese fou!’

Tatalo: Le Alii, matou te pepese atu i lau Afio i le pese fou o lenei aso. Ia lē aunoa ona ou pese, e tusa lava pe a oo mai mea tigā. **Amene!**

Aso Tofi – Iuni 19: “Valaauina i lou lava igoa” (*Called by name*)

Tusi Faitau – Isaia 43: 1-7

Matua – ff. 1e-2: *“... aua le fefe, auā ua ou faatauina oe, ua ou valaauina oe i lou lava igoa; e faia oe mo’u. A ē sopoia atu le vai, ou te ia te oe; a ē sopoia atu vaitafe, e le lofia ai oe; a ē savali i totonu o le afi, e le mu ai oe; e le susunuina foi oe i le mumū o le afi.”*

E le i faafoliga Isaia i ana perofetaga e tusa ma le fe’au mo luta o loo i totonu o le tafeaga; na tuu sa’o lava le upu a le Alii, ma faailoa atu i le nuu, e lē sologalelei pea taimi uma. O le a feagai le nuu ma meatigā e tele. E faalumaina oe, e sauāina fo’i. A e *“aua le fefe, auā ua faatauina oe, ma valaauina oe le le Alii.”*

O le nuu o sa Iutā ua fetaia’i ma le aasa o le tafeaga. A o le toe faamanatu a Isaia, taofiofimau lou faatuatua i le Alii, auā e valaauina oe e le Alii i lou igoa. Ua aumai e Isaia se faamanatu lelei mo i tatou, e tusa ma le soifua faaKerisiano. O a lava mea tutupu i le olaga, ua uma ona valaauina i tatou e le Alii e fai mona nuu filifilia. Ia mamau pea le toovae, ma ia faalagolago ma faamoemoe i le Alii, ina ia tatou sopo’ia ai vaitafe fitā o le olaga.

Tatalo: Faafetai Iesu i lou valaauina o matou lava igoa. Ia matou taofimau i lou suafa pa’ia, matou te sopo’ia ai mea fitā o le olaga. **Amene!**

Aso Faraile – Iuni 20: “Se ala i le vao lafulafua”

Tusi Faitau – Isaia 43:18-21 (*A way in the wilderness*)

Matua – ff. 18-19: “*Aua tou te manatua mea na muamua, aua foi le mafaufau i mea anamua. Faauta, ou te faia se mea e faatoa iloa, e tupu ae nei lava; tou te le iloa ea? E moni, ou te faia se ala i le vao lafulafua, ma vaitafe i le nuu naumati.*”

O le Atua e fai mea fou i le ola a le tagata! O le upu lea a le perofeta o Isaia mo le nuu o loo nofo tafea i totonu o le vao lafulafua ma le nuu naumati. Ua faailoa atu e le perofeta, o le Atua e fai vavega – e na te faia se ala fou i le vao lafulafua, e na te faia foi vaitafe i le nuu naumati. O le mea fou o le a faia e le Atua, o le faaolaina o oe ma a’u le tagata agasala.

O le Atua e fai vavega pea i totonu o a tatou lava gaogaosa. E le tuulafoaina i tatou e ia, a e naunau ina ia tatou saili atu ia te ia. Ia faalagolago ma faatutua atu ia te ia, ona faataunuu lea e le Atua o ana faamanuiaga e tusa ma le taimi tatau a le Atua. Ia tatou ne’i avea le fiu ma ala e faavaivaia ai. A e pei ona faamanatu mai le upu o ananafi, e valaauina oe e le Atua i lou lava igoa.

Tatalo: Le Alii e, ua e faia se ala fou i o matou lava olaga lafulafua, ia e auamai le vaitafe malie o lou alofa e faafouina ai i matou. **Amene!**

Aso Toona’i – Iuni 21: “Liligi atu le Agaga” (*The Spirit poured out*)

Tusi Faitau – Isaia 44:1-8

Matua – ff. 3-4: “*Auā ou te liligi atu le vai i le nuu naumati, ma vaitafe i le eleele matutu; ou te liligi atu lo’u Agaga i luga o lau fanau, ma la’u faamanuia i luga o e tutupu mai ia te oe. E tutupu ae i latou i totonu o le mutia, e pei o garava i auvai o vaitafe.*”

O le tusi a Isaia ua lalagina ai le fe’au o le faamafanafanafa ma le faamoemoe ola o le Atua mo lona nuu. Ua malamalama lelei foi le perofeta, ua lagona e le nuu le vavaeesea ma le tuulafoaiina, ona o le faaunuu ai i nuu ese; ua ia iloa foi o le a latou tofo i le saolotoga o le toe fuata’iga ma le faamanuiaga sili o le a aumaia e le Atua i luga o a latou tupulaga i le lumanai. Ua ia iloa o le a liligi ifo e le Atua le vai i luga o lo latou laueleele fia-feinu; ma ua ia iloa foi e i ai se aso o le a togiolaina atoatoa ai le laueleele i totonu o se lagi fou ma se lalolagi fou; lea o le a maua ai e i latou uma o e ole atu ma le olioli le saolotoga fiafia.

Ua tuuina atu e Isaia i tagata se upu moni fou ma le ofoofogia: o le a liligi ifo le Agaga. Ua latou iloa, na o le Agaga e i luga o tagata ta’ito’atasi—o perofeta ma tupu—a o lenei ua faamautinoa atu ia i latou, o le a i ai le Agaga mo tagata uma. A o e agai atu i le vaiaso a sau, ia e ola atoatoa i le ofoofogia o le mafanafana paia ma le fiafia i le faamoemoe e le uma.

Tatalo: Agaga Paia e, faafetai ona o lou faamafanafanaga; ua e aumaia le faamautinoa ia i matou e ala i le faamoemoe ma le mamalu. **Amene!**

FAAMAFANAFANA MA FAAMOEMOE: MAI LE ISAIA 40-55 (2)

COMFORT AND HOPE: FROM ISAIAH 40-55 (2)

Aso Sā – Iuni 22: “E leai lava se tasi” (*There is no other*)

Tusi Faitau – Isaia 45:1-7

Matua – ff. 4e-5: “... ua ou ta’ua lou igoa, a o e lei iloa a’u. O a’u o le Alii, a e leai lava se tasi; e leai se Atua, na o a’u lava; ua ou fusia oe, a o e lei iloa a’u.”

O le tala o lenei Aso Sā, faimai na faaaoga e le Atua le tupu o Kuresa e fai ma siufofoga faaperofeta mo le nuu o Isaraelu, e ui na latou le iloa o ia. E ui lava i lea, peita’i o loo manino iinei le pule aoao o le Atua i mea uma, ma le lē faailoga tagata o le Atua. O lona uiga, e lē tataua ia i tatou ona faailogaina tagata e auala mai ai le upu a le Alii; auā le faapea na o ē ua amioatua e faaaogāina e le Atua. A tuu i se isi faamatalaga, auā ne’i faailoaina le faigaluega e te fiasia i ai, a ia tutusa uma auauna ua valaau i le galuega.

O se tasi nei o faafitāuli o loo tula’i mai pea i nei ona po. Ua tele ona faailogalanu le faiga o le tapua’i. A tula’i mai se ta’ita’i lotu e le fiasia i ai, ona lē fia tapua’i lea i le Atua auā ua musu e faalogo i lona auauna. Le ekalesia e, ia aua ne’i faapea lou tautua ma lou tapua’i i le Atua; auā e le faailoga tagata le Atua, ma e leai lava se isi Atua e tusa ma lo tatou Atua.

Tatalo: Alii e, Iusu, fesoasoani ia ou iloatino o ē ua i ai lou meaalofo aemaise o le loto e faia ai le fe’au ma galuega o le talalelei. **Amene!**

Aso Gafua – Iuni 23: “Onosa’i a le Atua” (*God’s patience*)

Tusi Faitau – Isaia 48:6-13

Matua – f. 8: “E moni, ua e le faalogo; e moni, ua e le iloa; e moni, talu anamua ua le uai mai ou taliga; auā na ou iloa e te matuā amio faa’ole’ole; na igoa oe, o le fouvale, talu ina fanau mai.”

E ese le malie o le Atua ma ona uiga. O le uiga o le manatu, e i ai taimi ua tatou manatu ai, ua tatou iloa le Atua. Peita’i, o le taimi tonu lea ua sili ona tatou lē iloa ai le Atua. O le tele o le faaali mai e le Atua o ia lava, o le tele foi lea o le faauiga sese o ia! O le matua o lenei aso o loo faaalina ai lenei feteena’iga faalemafaufau – o loo naunau le Atua e faaalina atili o ia lava ma ana fuafuaga, peita’i o le nuu fouvale ua faauigasese pea mea ua latou manatu ua latou iloa ai le Atua. O se ata atoa lea i le onosa’ia e le Atua o uiga faafaigata o lona nuu filifilia. E ui i le faalogotatā ma le latou lē iloa moni poo ai le Atua, na tumau lava le alofa o le Atua i Isaraelu.

A i ai se mea e tasi ua finagalo lea Atua e ao ona tatou malamalama i ai ia te ia ma ona uiga, ia le aunoa ona tatou mafuta atu pea ma le Atua.

Tatalo: Faafetai le Atua i lou mafuta mai pea i aso uma o lo matou olaga faatauva; ia faapea fo’i ona le aunoa le mafuta atu ia te oe. **Amene!**

Aso Lua – Iuni 24: “E lē faagaloina oe” (*You are not forgotten*)

Tusi Faitau – Isaia 49:7-18

Matua – ff. 13, 16a: *“Ia alaga oe le lagi e, ia olioli oe le lalolagi e, ia leo tetele outou mauga, ma ia alalaga fiafia; auā ua faamafanafanaina e le Alii lona nuu, ua ia alofa foi i ona tagata ua tigaina ... Faauta, ua ou taia lou faatusa i o’u alofilima...”*

Ua tusi atu Isaia i se nuu o loo nofo pologa ma mafatia pea i totonu o le tafeaga. Peita’i, o tusitusiga a le perofeta e peiseai ua uma ona taunuu le faasa’olotoina o le nuu. Sa i ai le nuu i se nofoaga o le pogisa, a o afioga a le Atua ua saunia ai se faamoemoe mautu: ua uma, ua mae’a, ua mautinoa – e ui lava e lei oo i le taimi e faataunuu ai. Ioe Isaraelu e, “E lē faagaloina oe”. Atonu e i ai fo’i a tatou nofoaga pogisā o loo taotaomia ai o tatou olaga. O afioga a le Atua e tatou te maua ai le faamautinoa, ia tumau pea le faamoemoe i le Alii, auā e lē faagaloina oe e le Atua. I tala atu o le tigā ma le pogisā, o loo i ai le olioli ma le fiafia i le Alii.

Tatalo: Le Alii e, fesoasoani ia ou lagonaina lou afioga ma le upu pea oo ina ou mamaoese ma lau Afio. **Amene!**

Aso Lulu – Iuni 25: “Faamafanafanaga, e oo lava mo le toafa”

Tusi Faitau – Isaia 51:1-6 (*Comfort even for the desert*)

Matua – f. 3: *“Auā e faamafanafanaina Siona e le Alii, e faamafanafanaina ana mea faatafunaina uma lava; na te faia lona fanua lafulafua e pei o Etena, ma lona toafa e pei o le faatoaga a le Alii; e maua ai le fiafia ma le olioli, o le faafetai ma le leo o le pese.”*

E faigofie ona manatu o tagata o lo’o i totonu o se vao ona o a latou lava filifiliga le lelei. Ae na malaga Isaraelu i le toafa e oo atu i le nuu na folafola mai e le Atua. Na filifilia e Ioane le Papatiso le toafa e fai ma nofoaga o le galuega ma na taitaiina e le Agaga Paia Iesu iina ina ua uma lona papatisoga. E mafai ona avea le toafa ma nofoaga o le valaauina ma le tuputupu ae. Atonu o loo e i ai nei i se nofoaga faapei o le toafa, ma e manatu e lē o i ai le Atua ma oe. Peita’i ane, e oo foi lava mo le toafa, e i ai le faamafanafanaga o le Atua!

O le ki i le toafa o le vaai i le mea na e sau ai, o le a le Atua na e iloa i aso ua mavae. O lou faasinomaga e mauaa i le mea moni na faia ai oe i le faatusa o le Atua - ae le o se nofoaga o loo i ai nei.

Tatalo: Le Alii e, e ui o loo matou i ai nei i totonu o le toafa, fesoasoani ia matou iloa atu o lau Afio ma lou faamafanafanaga. **Amene!**

Aso Tofi – Iuni 26: “Filemu ma le olataga” (*Peace and salvation*)

Tusi Faitau – Isaia 52:7-10

Matua – f. 10: *“Ua to ese e le Alii le ofu i lona aao paia i luma o nuu uma; ua iloa foi e tuluiga uma o le lalolagi le olataga mai lo tatou Atua.”*

Ua to ese e le Alii aleu uma o lo tatou olaga, ma ua iloa e tagata uma le olataga ua aumaia e le Atua! O lona uiga, i totonu o le lotolotoi o mea tigā ma mea fitā, ia tatou pepese pea auā ua faailoa mai ai e le Atua lona togiola. Ua tatou iloa foi lona faamafanafanaga i totonu o le gaogaosā, le tuufua matūtū

o le toafa ma le faaaunua i nofoaga ese, ia tatou 'oli'oli i lea mea – e lē ona o lea mea, a e ona o le i ai o le Atua faatasi ma tatou i totonu i lea mea.

Tatalo: Le Alii e, faafetai o loo e faatasi mai i nofoaga fitā o le olaga; ma o loo faailoa mai ai le lou filemu ma lou olataga atali. **Amene!**

Aso Faraile – Iuni 27: “Le Alofa faavavau o le Atua”

Tusi Faitau – Isaia 54:1-8 (*God's everlasting love*)

Matua – f. 4: “Aua e te fefe, auā e te le mā; aua foi e te maasiasi, auā e le faamāina oe; auā e galo ia te oe lou mā ina o ē teine muli; e te le toe manatua foi lou luma ina o ē nofo fua.”

O le tusi faitau o lenei aso ua aumaia ai se ata faatusa, o se fafine nofo toatasi ua faapupuu i totonu o se tama'i faleie ua punitia. E leai sana fanau, na tuua o ia e lana tane ina ua le mafai ona ia tuuina atu ia te ia se atalii. Ua na o le maasiasi ma le faalumaina ua fai ma ona soa. Ua leai sona faamoemoe, o lona lalolagi fo'i ua la'ititi ma pūmoomoo; ua oo foi ia te ia le fiu. Peita'i ane, ua silasila le Atua ma ua fetalai mai ai: Ia faalautele lou fale ma ia faaavanoa, auā mea e tele o le a faia e le Atua mo oe.

Tatalo: Le Alii e, faafetai mo le natia o lo matou mā ma lo matou faalumaina; faafetai tele ona o lou alofa mutimutivale. **Amene!**

Aso Toona'i – Iuni 28: “O le foa'i a le Atua” (*God's offer*)

Tusi Faitau – Isaia 55: 1-11

Matua – f. 5: “Faauta, e te valaau i nuu ese sa e le iloa; o nuu ese foi sa latou le iloa oe, latou te taufetuli mai ia te oe, ona o le Alii lou Atua, ma le Paia o Isaraelu; auā ua ia ta'uleleia oe.”

O tusitusiga a Isaia mai lena vaiaso atoa, ua matua'i faagaeetia ai lava i tatou uma ta'itoatasi: o le faamafanafanaga i nofoaga tuufua, o le tele ma le matagofie o i totonu o le toafa, o le olioli i le iloina o le a toe fuata'i mai mea ua faatafunaina, o le maasiasi e suia i le mamalu, o le itiiti ua faateleina, ma le ola i lona atoatoaga! A o le mea moni, o le fe'au e mo se malo, a e le na o se ta'ito'atasi – o se fe'au o le faamoemoe i atunuu uma.

O se tasi mea ofoofogia e uiga i le Atua – na te le taofia mana'oga o tagata ta'ito'atasi, a e faamanuia tutusa ma malo i le taimi e tasi! O le alofa foa'i fua lea o le Atua e tulaga ese ai le Atua i atua o le lalolagi uma.

Tatalo: Le Atua e, faafetai ua e faamanuia ia te i matou ta'ito'atasi, aemaise o le aotelega o lou nuu ma lou atunuu atoa. **Amene!**

ANOANOA'I MA LE MANA'O – ABUNDANCE AND WANT

1. Faulala'i (*Plenty*)

Aso Sā – Iuni 29: “Le Atua e fialia e faamanuia”

Tusi Faitau – Teuteronome 28:1-14 (*The God who loves to bless*)

Matua – ff. 1-2: *“Afai foi e te matuā faalogo i le siufofoga o le Alii lou Atua, e anaana e fai ana poloaiga uma lava ou te fai atu ai ia te oe i le aso nei, ona faasilisiliina lea o oe e le Alii lou Atua i nuu uma lava o le lalolagi; e maua foi e oe o nei mea uma e manuia ai; e oo lava ia ia te oe, pe afai e te faalogo i le siufofoga o le Alii lou Atua.”*

Sa folafola atu e le Atua ia Aperamo, o le a faamanuiaina ana fanau ma avea ma faamanuiaga i nuu uma o le lalolagi (Kenese 12:1–2). A o le'i oo ona faaalua mai Iesu, na osia e le Atua se feagaiga ma Isaraelu e aofia ai tulafono ma tuutuuga – o faamanuiaga ma le malaia faaTeuteronome. Peita'i, o nei fuaiupu o loo faaalua ai ni mea tãua se tolu: muamua, o uiga o le Atua – o lona mana'o ia olaola ma fialia le tagata e faamanuia; lona lua, o lona manatu mamafa i vala aogã o le olaga o le tagata, ae lē na o le faavavau; lona tolu, o le folafolaga lautele – e manatu le Atua i le tagata ta'ito'atasi, a e o lenei faaaliga e mo se atunu'u o loo ola mau.

Tatalo: Faafetai le Atua mo lou naunauta'i e faamanuia tagata. Ia matou maua le loto faafetai ona o le anoanoa'i o au faamanuiaga. **Amene!**

Aso Gafua – Iuni 30: *“Le alofa mutimutivale o le Atua ma le anoanoa'i o avanoa”* (God's compassion and abundant possibility)

Tusi Faitau – Mataio 9:35-38

Matua – f. 36: *“Ua silafia e ia le motu o tagata, ona mutimuti vale ai lea o lona alofa ia te i latou, ona ua lailoa i latou ma tuulafoaiina, e pei o mamoe e leai so latou leoleo.”*

Na malaga mamao le Alii o Iesu, ma ua faataamilo i aai ma faoa aai uma e tala'i le talalelei o le mālō. Ua silafia ai e le Alii le tele o saito e fia seleseleina, a o le au faigaluega ua to'aititi ia. Ua faatupuina ai le alofa mutimutivale o le Alii, auā o sa Iutā ua pei o se lafumamoe ua leai so latou leoleo. I lenei tala, ua faamatala e Mataio le mana'oga a le Alii faaola, i le mana'omia tele o ni auauna faigaluega e seleseleina saito mo le Atua. Peita'i, e lua ni lu'itau e fetaia'i pea ma lenei faafitāuli. Muamua, e lē au lagona e le to'atele le tigā alofa mai o le Alii, ina ia seleseleina le saito mo le Atua; peita'i ua latou lalafi ma fealoalofa'i. Lona lua, e le o tagata uma na feiloai ma Iesu na fia avea ma ona soo; e le o tagata uma foi tatou te faamanuia i ai e faatuatua mai—ae ui i lea, o loo faaaau pea ona tumu le lalolagi i tigā.

Tatalo: Le Alii e, ia liu suavai o matou loto ona o puapuaga a lenei lalolagi, ma ia ofoina le fia auauna mo lau Afio ma le talalelei. **Amene!**



TAUTUA PRINTING PRESS

1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkasonline.org>